



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



Über dieses Buch

Dies ist ein digitales Exemplar eines Buches, das seit Generationen in den Regalen der Bibliotheken aufbewahrt wurde, bevor es von Google im Rahmen eines Projekts, mit dem die Bücher dieser Welt online verfügbar gemacht werden sollen, sorgfältig gescannt wurde.

Das Buch hat das Urheberrecht überdauert und kann nun öffentlich zugänglich gemacht werden. Ein öffentlich zugängliches Buch ist ein Buch, das niemals Urheberrechten unterlag oder bei dem die Schutzfrist des Urheberrechts abgelaufen ist. Ob ein Buch öffentlich zugänglich ist, kann von Land zu Land unterschiedlich sein. Öffentlich zugängliche Bücher sind unser Tor zur Vergangenheit und stellen ein geschichtliches, kulturelles und wissenschaftliches Vermögen dar, das häufig nur schwierig zu entdecken ist.

Gebrauchsspuren, Anmerkungen und andere Randbemerkungen, die im Originalband enthalten sind, finden sich auch in dieser Datei – eine Erinnerung an die lange Reise, die das Buch vom Verleger zu einer Bibliothek und weiter zu Ihnen hinter sich gebracht hat.

Nutzungsrichtlinien

Google ist stolz, mit Bibliotheken in partnerschaftlicher Zusammenarbeit öffentlich zugängliches Material zu digitalisieren und einer breiten Masse zugänglich zu machen. Öffentlich zugängliche Bücher gehören der Öffentlichkeit, und wir sind nur ihre Hüter. Nichtsdestotrotz ist diese Arbeit kostspielig. Um diese Ressource weiterhin zur Verfügung stellen zu können, haben wir Schritte unternommen, um den Missbrauch durch kommerzielle Parteien zu verhindern. Dazu gehören technische Einschränkungen für automatisierte Abfragen.

Wir bitten Sie um Einhaltung folgender Richtlinien:

- + *Nutzung der Dateien zu nichtkommerziellen Zwecken* Wir haben Google Buchsuche für Endanwender konzipiert und möchten, dass Sie diese Dateien nur für persönliche, nichtkommerzielle Zwecke verwenden.
- + *Keine automatisierten Abfragen* Senden Sie keine automatisierten Abfragen irgendwelcher Art an das Google-System. Wenn Sie Recherchen über maschinelle Übersetzung, optische Zeichenerkennung oder andere Bereiche durchführen, in denen der Zugang zu Text in großen Mengen nützlich ist, wenden Sie sich bitte an uns. Wir fördern die Nutzung des öffentlich zugänglichen Materials für diese Zwecke und können Ihnen unter Umständen helfen.
- + *Beibehaltung von Google-Markenelementen* Das "Wasserzeichen" von Google, das Sie in jeder Datei finden, ist wichtig zur Information über dieses Projekt und hilft den Anwendern weiteres Material über Google Buchsuche zu finden. Bitte entfernen Sie das Wasserzeichen nicht.
- + *Bewegen Sie sich innerhalb der Legalität* Unabhängig von Ihrem Verwendungszweck müssen Sie sich Ihrer Verantwortung bewusst sein, sicherzustellen, dass Ihre Nutzung legal ist. Gehen Sie nicht davon aus, dass ein Buch, das nach unserem Dafürhalten für Nutzer in den USA öffentlich zugänglich ist, auch für Nutzer in anderen Ländern öffentlich zugänglich ist. Ob ein Buch noch dem Urheberrecht unterliegt, ist von Land zu Land verschieden. Wir können keine Beratung leisten, ob eine bestimmte Nutzung eines bestimmten Buches gesetzlich zulässig ist. Gehen Sie nicht davon aus, dass das Erscheinen eines Buchs in Google Buchsuche bedeutet, dass es in jeder Form und überall auf der Welt verwendet werden kann. Eine Urheberrechtsverletzung kann schwerwiegende Folgen haben.

Über Google Buchsuche

Das Ziel von Google besteht darin, die weltweiten Informationen zu organisieren und allgemein nutzbar und zugänglich zu machen. Google Buchsuche hilft Lesern dabei, die Bücher dieser Welt zu entdecken, und unterstützt Autoren und Verleger dabei, neue Zielgruppen zu erreichen. Den gesamten Buchtext können Sie im Internet unter <http://books.google.com> durchsuchen.

Nohm's
Schwabaggeschichta

von

Carl n. Richard Weitbrecht.

✓

164. c. 42.





3/-

Nohmöl

Schwäbagſchichta.



Von

Carl und Richard Weitbrecht.




Stuttgart.

Druck und Verlag von W. Kohlhammer,
1882.



In h a l t.

	Seite
Vorwort	III
Hear muß Dine! Von Richard Weitbrecht	1
Wa' mers übermacht. Von Carl Weitbrecht	37
8 End vom Liadle. Von Richard Weitbrecht	75
Des Räpple. Von Richard Weitbrecht	97
Vom Lisle. A' Kendergschicht. Von Carl Weitbrecht	163
So a' Ged. Von Richard Weitbrecht	171



P o r w e x t.

„Die günstige Aufnahme, welche vor vier Jahren unsere Geschichten aus dem Schwedaland*) gefunden haben, ermuntert uns, einen weiteren Versuch in dieser Richtung zu machen.“ So etwa könnte ein nach der üblichen Schablone stilisiertes Vorwort zu diesen neuen Geschichten aus unserer lieben Heimat beginnen.

Wir hatten uns allerdings nicht über den Mangel an freundlicher Aufnahme zu beklagen. Auch über die Grenzen des engeren Vaterlandes hinaus und selbst bis zu den Schwaben in Nordamerika haben wir für unsere Geschichten freundliche Leser in schöner Anzahl gefunden, dabei auch manch ergötzliches Beispiel von der naiven Virtuosität im Bücherentlehnen bewundern können, in welcher bekanntlich Deutschland allen anderen Ländern voraus ist.

Doch war es nicht irgend welche Ermunterung oder Mötigung von außen, die uns neue Geschichten schreiben

*) Sie erscheinen in zweiter Auflage und in derselben Ausstattung wie das vorliegende Buch auf Ostern 1882.

hieß, sondern die innere Nötigung, künstlerisch, poetisch so manches zu gestalten, was sich im täglichen Umgang mit unserem Volke darbot. Es liegt trotz allem, was heutzutage bejammert, teilweise auch mit Recht beklagt wird, doch noch eine solche Fülle von Ernst und Humor, von Gemütstiefe, Frömmigkeit und schlichter Tüchtigkeit in unserem Volke, daß es nur der gestaltenden Hand bedarf, diese Schätze ans Tageslicht zu fördern. Daß es auch an tragischen Verwicklungen nicht fehlt, mögen die beiden Erzählungen „Wa' mers übermacht“ und „s End vom Liadle“ zeigen. Für den Stoff der letzteren Erzählung brauchen wir wol einsichtsvolle und von törichter Brüderie freie Leser nicht erst um Entschuldigung zu bitten; andere denken wir uns überhaupt nicht unter unserem Publikum.

Was in diesen Geschichten erzählt wird, ist zum größten Teil miterlebt, und es war viel häufiger nötig, zu beschneiden als hinzu zu tun. Wir dürfen auch versichern, daß manche Charaktere, manche Scenen, welche voraussichtlich von klugen Kritikern als nicht „volksmäßig“ bezeichnet werden dürften, mehr als einmal uns vorgekommen sind, ja daß manche derartige Scene fast wörtlich dem Leben nachgeschrieben ist. Bei aller poetischen Freiheit, die wir uns natürlich in der Gestaltung nahmen und nehmen mußten, dürfen wir diese Geschichten doch für wahr und echt schwäbisch ausgeben.

Darum erscheinen sie auch wieder im Gewande der schwäbischen Mundart. Hierüber seien uns noch einige Worte gestattet.

Die Mundart, deren wir uns bedienten, ist im Allgemeinen diejenige, welche man die mittelschwäbische nennen kann, und welche wir von Kindheit an sprechen gelernt haben. Ihr Gebiet erstreckt sich etwa vom Albtrauf bis übers lange Feld bei Ludwigsburg gegen den Stromberg hin. Bei den mannigfachen Schattirungen übrigens, welche auch innerhalb dieses Gebietes, oft von Nachbarort zu Nachbarort, auftreten, konnte es sich selbstverständlich nicht darum handeln, Eine Lokalmundart streng festzuhalten. Zudem verlangt bei schriftstellerischer Verwendung des Dialekts zuweilen der Wollaut, der Stimmungsgrundton des Zusammenhangs und was dergleichen mehr ist, daß ein Wort z. B. hier weicher, dort rauher Klinge, daß also das einmal die weichere Wortform, welche diese Dialekt-Schattirung, das anderermal die rauhere, welche jene Schattirung darbietet, angewendet werde. Und so ist aus den verschiedenen Schattirungen des Mittelschwäbischen eine mundartliche Farbe geworden, welche — so hoffen wir — die mundartliche Treue mit der von den genannten Rück-sichten geforderten Freiheit verbindet. Sollten einige Ausdrücke den mittelschwäbischen Leser etwas fremder anmuten, so möge er bedenken, daß der Eine der Verfasser seit Jahren auf der Ulmer Alb lebt und keinen Anstand nahm, einzelne

besonders treffende Ausdrücke aus dem ihm hier geläufigen Dialekt aufzunehmen. Daß der Andere in der vorliegenden Sammlung verhältnismäßig schwach vertreten ist, mag seinen Grund gleichfalls in seinem dermaligen Wohnort haben — hinterm Heuchelberg gehts mit dem Schwäbischen zu Ende.

Die Schreibart hat uns auch diesmal viel Mühe gemacht. Es gilt — ähnlich wie bei der graphischen Darstellung jedes Dialekts, so auch bei dem unsrigen — daß zu erstreben, daß dem Schwaben das mundartlich richtige Lesen nicht erschwert, dem Nichtschwaben dasselbe erleichtert werde — ein Compromiß, der sich wie alle Compromisse nicht ohne Inconsequenzen durchführen läßt.

Im großen Ganzen sind wir der Schreibart unseres ersten Buches getreu geblieben. Nicht etwa, weil wir diese für die absolut richtige hielten, sondern weil uns keine der vorher oder seitdem gedruckten schwäbischen Dichtungen eine wesentlich bessere Schreibart zu haben schien. Ganz ohne jede Lautbezeichnung zu schreiben oder zu eingemischten lateinischen oder gar umgekehrten Buchstaben unsere Zuflucht zu nehmen, konnten wir uns schlechterdings nicht entschließen. Wir haben uns mit Apostroph und Circumflex durchzuholzen gesucht, aber diese so sparsam als möglich angewendet.

Es mögen hier sowol für den Schwaben als Nichtschwaben einige Bemerkungen über unsere Schreibart stehen.

Um den Leser nicht durch ein fremdes Wortbild irre zu führen oder über die Bedeutung im Zweifel zu lassen, schreiben wir alle Wörter mit solchen Consonanten und Diphthongen, die im Schwäbischen so gut wie gar nicht vorhanden sind, gerade so wie sie im Schriftdeutschen geschrieben werden. ß ist also immer wie b zu sprechen (es lautet gleich: er zahlt a' baar = er zahlt ihn baar und er zahlt a' paar Schoppa' = er zahlt ein paar Schoppen, spenna wie schbenna), t wie d (Tag wie Dag), k wie g oder gg, außer im Anlaut, aber auch hier manchmal, z. B. Kutschér wie Gutschér, also starke wie starge, Acker wie Agger. Ebenso ö wie e: bös wie bes, könna wie lenna; ü wie i: über wie iher; eu und äu wie ei: neu wie nei, Gäul wie Geil, Fräule wie Fraile.

Was die Endsilbe -en betrifft, so wird diese in den meisten schwäbisch geschriebenen Büchern e geschrieben, also bleibe, gehe für bleiben, gehen. Wir schreiben sie a, also bleiba, geha, und zwar ohne Apostroph, durch welchen wir sonst das durch ausgefallenes n entstandene nasale a bezeichnen (also z. B. a' = ein). Wir ließen hier den Apostroph weg, weil die Endung allzu oft wiederkehrt, und wir eine Häufung von Apostrophen, überhaupt aller nicht üblichen Lautbezeichnungen vermeiden wollten. Mit a aber nicht mit e bezeichneten wir die Endung, einmal, weil der Nichtschwabe der richtigen schwäbischen Aussprache der Endung -en viel näher kommt, selbst wenn er reines a spricht, als wenn er

einen e-Laut hören lässt. Aus demselben Grunde schreiben wir das nachschlagende nasale a zwar ohne Apostroph, aber a, nicht e, also guat, reacht, hear, wia. Fürs andere wegen der Deutlichkeit, denn der a-Laut bezeichnet bei demselben Wort den Plural, bei dem der e-Laut den Singularis bedeutet: des Mädle, dia Mädla, des Schwälble, dia Schwälbla u. s. w. Bei andern Wörtern ist's umgekehrt: vo'-ma' Bekannta = von einem Bekannten, er hält Bekannte = er hat Bekannte, wo a-Laut und e-Laut in der Aussprache ganz deutlich unterschieden ist.

Haben wir den Apostroph in der Regel bei dem nasalen a der Endung weggelassen, so setzen wir ihn doch wo das Wortbild den Leser irre führen könnte, z. B. Modena' (= Modenen, Plural von Mode), nicht Modéna, damit der Leser nicht zuerst an die italienische Stadt denke, oder um zwei gleichlautende Wörter zu unterscheiden, z. B. a' = ein, a = ab; da' = den, dâ = du; hoilich = heilig; hoilich = heimelig; schau' = schon, schau = Imperativ von schauen. Wo der Apostroph nach einem Vokale oder Diphthongen steht, macht er immer dieselben nasal, meistens in Folge eines ausgesunkenen n, also: der schö'scht = der schönste, a' Schei' = ein Schein', vo' = von, Ma' = Mann. Nach Consonanten setzen wir den Apostroph nicht, also z = zu, ghet = gehabt; gh im Anlaut ist also zu lesen wie g-h = t. Das nicht durch Ausfallen eines

n entstandene nasale a bezeichnen wir mit å (då = du, Burgåmoischter = Bürgermeister), den eigentümlichen Mittellaut zwischen a und o mit ö (höt = hat, mö = wo), wobei wir ausdrücklich bemerken, daß der Circumflex nie Dehnungszeichen ist, sondern Lautbezeichnung, und daß ein solches Wort sowol lang als kurz ausgesprochen werden kann, z. B. då = du kurz, mö = wo lang; ðð = da sowol lang als kurz.

Die oft wiederkehrenden verschiedenen no haben wir nach Möglichkeit unterschieden; wir schreiben also z. B. den schwäbischen Satz „no, tent no no no des“ = nun, tut dann nur noch das“ mit verschiedener Lautbezeichnung: „no‘, tent nö no noh des.“

Wir geben zu, daß der schwäbische Leser ganz wol ohne alle diese Dinge durchkommt, und doch glauben wir ihm das rasche Weglesen dadurch erleichtert zu haben. Der nicht schwäbische Leser aber wird mit Hilfe der Lautbezeichnungen sich nach den ersten paar Seiten rasch eingeleSEN haben. Wie sehr gänzlicher Mangel an solchen Bezeichnungen das Lesen erschwert, haben wir erst neulich bei P. A. Roseggers vortrefflichem steirischen Geschichtenbuch, „Tannenharz und Fichtennadeln“, zur Genüge erfahren, wo eben in Folge dieses Mangels die bekanntesten Wörter uns oft ganz fremd und unbekannt anblickten. Wir hoffen deshalb, daß wir uns die saure Mühe, namentlich der Druck-Correktur, nicht umsonst gegeben haben.


In der Erklärung dialektlicher Wörter und Ausdrücke haben wir uns auf das notwendigste beschränkt. Für den Schwaben sind Erklärungen ja unnötig, der Nichtschwabe wird leicht, was nicht erklärt ist, aus dem Zusammenhang entnehmen.

So mag das Büchlein hinausgehen und wieder von gut schwäbischer Art und Sitte erzählen. Wir sind natürlich überzeugt, daß es, wie die schöne Phrase lautet, „unter keinem Weihnachtsbaume fehlen sollte,“ und wenn das der Fall sein wird, so haben weder wir, noch unser Herr Verleger, welcher sich eine schöne Ausstattung angelegen sein ließ, etwas dagegen einzuwenden.

Schwaigern und
Mähringen bei Ulm } im Oktober 1881.

Die Verfasser
Carl und Richard Weitbrecht.

Hear much Nine!



1.

Z Bucklenga hōts vor a' Zōhra sei'fa'zwanzga¹⁾) bāis ausgseha. Et daß a' verlotterte oder liaderlicha Gmo'ind gwā wär — bhüet es Gott, so guat wia de bescht vom Ober- ond Unterland. Ond was d Ma'sleut a'betrifft: de Alte send schaffich ond haufich²⁾ gwā, de Jonge fechte starke Burscht, lond Brachtskerle hois dronter ghet, wia s alte Schultheiſa sein Frieder ond s Hofbaura sein Matthes. — Ond d Mädla-n airst! So hōt mer weitrom koine gseha! Flenk, luschtig, grad gwachsa ond grad raus mit der Jong, ällerhand Stroich em Kopf ond Musik en de Füaß, wann no vo' weitem a' Hauhzich en Aussicht gwā ischt.

Aber dd isch grad ghangt! Woiz Gott wia lang der Pfarr schau' ko' Pärle maih vo' der Kanzel ra gschmissa hōt³⁾! Ond daß a' Burscht vom Ort a' reachte Hauhzich em Ort ghet hätt, dovo' hōt mer schau' gar ner maih gwifft. Hia ond dd ischt amöd Diner komma vo'-ma' a'dera Ort ond hōt sich dia Mädla bseha, oine om de a'der, ond s muasch schau' guat ganga' sei', wenn er oine vo' Bucklenga gnomma hōt. En der Omgegend hent se a' Sprüchle ghet: „Wer Vater ond Mutter et ehrt kommt uf Bucklenga“, ond wann dia Burscht vo' de a'dere Dörfer

¹⁾ fünfundzwanzig.

²⁾ sparsam.

³⁾ verkündigt hat.

ällamdl des gsait hent en de Wirthshäuser, nô send d Bucklenger wüatich worda ond hent Händel a'gsanga, ond wann se nô azoga send, nô hent se henter-en hergschria:
„En Gruß an d Bucklenger Bückel!“

Des isch nemlich gwä, mòrom d Lent hent et nôch Bucklenga nei' heirdta wölla: s Dorf hót sein Mama et mit Dreacht ghet. Bucklich isch gwä vo' oba bis onta; s ischt so a'-ma' Berg naufbaut gwä — mòlerisch hót amdl a' Herr aus der Stadt gsait — zwischa Gärta ond greane Bäum drenne, reacht nett zuam Wöhla, aber bucklich. s ischt a' feschta Stoig durs Ort nufganga, ond wann mer au a' nuia en lange Wendenga a'glegt hót, daß mer zidzadzif nuf komma-n ist — bucklich isch halt doch gwea, ond d Gaul hent fescht zieha müasha, bis se en Waga no zuam Dorf naus bröcht hent. Ond nô isch aischt reacht a'ganga: d Wiesa send dronta em tiafa Tal glega ond d Aecker uf der Höh, einer so kromm dô wia der a'ter ond — s ischt wöhr — a' Haidanarbeit hóts koscht, bis mer gäret, gsät ond gerntet ghet hót. Drom send au d Bucklenger — au de Reiche — fleißig ond ällweil bei der Arbet gwä; des hót en aber gar ner gschadt, ond se send dâbei besser blieba, weder dia Ort, wo rengs rom uf der Ebene glä send.

Aber für da' rechta Bauer isch halt a'-n ebene Gegend de schö'scht Gegend, wann alle Aecker so grad ond glatt dölieget wia anepätscht¹⁾, ond ma' em Dorf et berguf ond a renna muaz, wa'-mer no en Schoppa trenka will. Nelles nôch bei anander, alles grad ond eba so mägs der Bauer, ond drom hent se ihre Mädla-n ond ihre Buaba-n

1) durch Schlagen eben gemacht.

et nôch Bucklenga heira lassa wölla: dô muâß sichs Bieh
ond der Mensch jô d Seel rauschauſa. Ond wia amôl
Bucklenga da' Abscheu ghet hôt, nô send au gscheitere
Baura dâvo' a'gsteckt woara ond a' mancher, mô eitgetlich
sei' Mädle et o'gern ema'¹⁾) Bucklenger gä het, tuats jezet
et wega de a'dere.

Ond d Buaba vo' Bucklenga dia hättet ezet grad
gern Mädla vo' a'dere Ort ghet, ond hent wärle to', wia
wenn d Bucklenger Mädla für sia et guat gnuag wäret.
Ond drüber send Bucklenger Mädla falsch woara: wa
brauchet dia s halb Ländle aus z laufa, saget se, se sollet
ons nemma! Ond O'reacht hent se et grad ghet. Dia hôt
mer haira solla en ihre Konfelslubena, wann ällamôl
wider a' Bua hôt Dine vo' draufha nemma wölla ond et
kriagt hôt, aparte wenn er vorher mit Diner vo' Buck-
lenga ganga-n ischt. s baisscht Maul — i muâß saga,
— hôt de schö'scht em Flecka ghet, s Kasta'jörgs Marie,
d Nôchbere vons Hofbaura Matthes. Et daß se a'
Rassel gwä wär ond gern gschempft hätt, aber s Maul
braucht hôt se, wias er onser Herrgott verlieha hôt, ond
der hôt jô de Weiber s ihr mit-era' Extraschmiere gschmiert.
Gar ner gsait hôt se aber, ond blos en sich nei' glachet,
wann der Matthes hoi'komma-n ischt ond hôt wieder koinen
kriagt, ond des isch schau' zweimôl fürgfalla. Aber der
Matthes ischt an dem Samstich Obed, mô onser Geschicht
a'hebt, halt wieder mit s alta Schultheiha Frieder zsema
gstanda-n en der Schuier vom Frieder. Ond vo' was
hent se gschwätz? Mer könnets es ei'bilda!

¹⁾ einem.

„Matthes,“ sait der Frieder, „dô guck mei' Schuier a',
voll vo' oba bis onta, ond dô guck en mein Stall nei',
selt s Vieh ond selt d Gäul ond henta drom —“

„Soll-e au voll d Säula bschaua?“ sait der Matthes,
„i woiz schau', was d saga witt —“

„Ond dô will koina hergau' ond mi nemma!“

„Narr, Vieh ond Gäul ond Säula geits überall, et
bloß z Bucklenga!“

„Ond guck mi a' —“

„Ond du mi!“ sait der Matthes.

Ond se gucket anander a' ond müahat boide lacha, wia se
so vor anander standet: zwei feschte stramme Burscht, dene s
raut Leaba aus em Gficht gschaut hot. No sait der Matthes:

„Höchst reacht, Frieder, mer send zwei Kerle, mō sich
bei jedem Mädle seha lau' könnet.“

„Selt lauft s Hofbaura Marie,“ sait der Frieder,
„schau, descht¹⁾ a' saubere! Matthes, wa moi'scht?“

„Dia isch jô vo' hia!“ sait der Matthes — so domm
können d Ma'sleut raus schwäza — guckt er aber doch
noch, bis mer ihre lange dicke Zöpf nemme gseha hot.

„Du Matthes,“ sait ezt der Frieder, „wia wär's, wa'mer
s amöl z Aldenga drüba probira tätet. S brauch a'
Weib. Meine Alte send taut, mit Mägd ka' mer et haus'a,
wenn et a' Weib dô ischt —“

„Z Aldenga? Dô gôht schau' vornaweg koina ge'
Bucklenga.“

„Isch dô ner, no isch mō anderschter ebbes; komm, Mat-
thes, mir zwei müahet en viar Woch'a Dine hau' —“

¹⁾ das ist.

„Wärle, sell wöllet mer, hear muaz Dine!“ sait der Matthes.

„Hear muaz Dine!“ sait der Frieder, ond wenn der sich amdl ebbes en Kopf gsezt ghet hót, nô hót ers au tau, „hear muaz Dine, ond wa' mer se mit sechs Gäul uf Bucklenga schloifa muaz!“

2.

En der Rosa z Aldenga isch hauch herganga; der Frieder ond der Matthes ond noh a' paar Kamerada send vo' Bucklenga rüber komma gwä ond hent sich et lompa lau'. Ond was d Bucklenger hent könna, des hent d Aldenger aisch¹⁾) reacht könna, ond bsonders der reich Oberbauer hót vi' Flasch noch der a'dera zahlt. Wega dem send au dia hoide Bucklenger dô gwä. Dear hot nemlich sei's Mädla ghet, et arg sauber, älle klei', aber reich.

„Mädla,“ hót oft der Oberbauer zua-n-en gsait, wenn se sichgstreckt hent uf ihre haucha Absätz, mō der Schumacherfriz hót extra fürs macha müazha, „Mädla,“ sait er „i stell ich²⁾ uf en Geldsack nuf, nô send-er grauß gnuag. Fürnehm Mädla ond no koin Bucklenger!“

Und so send dia Mädla hauhfärtig gwä, wia d Stadtjomfera, ond au en de Kloider hent se dia Stadtmodena' a'gfanga.

Der Oberbauer hót sich ei'bild, mōrom dia zwei Bucklenger heut so nobel darherkomma send, er hót aber glei denkt, s friag koiner oine vo' de Seine. Wa'mer so viel

¹⁾ erst.

²⁾ euch.

hôt, gôht mer et en so a' bucklîchs Nesch't, aparte wenns
z Abenga Burscht gnuag hôt!

Wia drom dia zwoi zua-n-em komma send, hôt er ällerhand schöne Sprüchtau', hôt sogar gsait, mer wiß jô et, ob seine Mädla oin möget ond — sell hôt er en der Stadt glernt ghet — ohne Noigeng soll vo' seine Mädla koine heira. Ob se aber dia häbet, sell wiß er et ond se sollet amôl en d Rosa nüber gau', er komm nô glei au. Z seha hent se vo' alle sei's ner kriagt, außer was se so em Vorbeigeha an der Kuche, mô d Lisbet ond d Gret gstande send, hent verschnappa¹⁾ könna; ond daß vo' dene Mädla koine jô sait, des hôt der Oberbauer gwiss gwischt. Wia nô der Frieder ond der Matthes wieder zum Haus naus ganget, nô gucket se alle sei's zuam Kamerfeaschter naus, ond de Fengst, d Lisbet, a' Mädle vo' a' Jöhrener achtzehna, sait: „No', Alte, wöllet er?“

„Mir? Uf Bucklenga! Bischt et gscheit?“ „Mer woiß jô gar et, was se nô au hent!“ „Witt Dus vielleicht?“ „Du wärescht domm gnuag!“ so gôths über d Lisbet nei' ond dia stöhnt dô ond sait ner. Jetzt rüast der Vater d Mädla en d Stub rei' ond sait:

„Was iß?“

„Wa wurd sei?“ saget se.

„Wöllet er?“

„Mir?“

„Jô Ihr.“

„Noi!“ saget vier zsema, d Lisbet sait ner.

„Hau's jô glei gsait, s fehlt an der Noigeng,“ sait der Bauer, der schau' lang für jede sich Din ausdächti ghet

¹⁾ im Vorbeigehen zu sehen bekommen.

höt, den se amôl nemma müaß, ond wenn s en et schmecka könn. Aber jezt tuat er ganz anderschter ond sait noh amôl:

„Mädla et o' bedacht!“ ond fangt nô bei der Aeltesten a':

„Was iſch, Rathre', witt du?“

Desch't a' leze gwä, drom sait se:

„Hau-n i schau' Vater ond Muater et gehrt, weil d me uf Bucklenga to' witt?“

Ond der Bauer lacht ond frôgt:

„Ond du, Gret?“

„Vater“, sait dia, „i hau' so en furza Odem!“

Der Bauer muâß wieder lacha ond frôgt weiter:

„Annabärbel, was iſch mit dir?“

Dia hot schau' Din am Bändel ghet ond sait: „S et ond we'-mer mer en Bucklenger uf em Porzla'teller brächt!“

„Aber du“, sait jezet der Bauer zur vierte, der hauhfärtigsta:

„Viaber em Teufel helfa s Füier schüra!“ sait dia so reacht vo' oba ra.

„No', ond de Klei', dia braucht mer eigentlich gar et z frôga. He, Lisbeth, tätescht du Din vo' dene zwoi nemma?“

„S?“ sait dia, „älle boide!“

Jezt aber hätt mer solla dia andere Mädla seha. Eb der Vater sich noh vom Schreck erholt ghet ond a' Wort raus brôcht höt, send dia andere über d Lisbeth nei' gfahra.

„Was du? D Zengst! Du witt zaischte naus aus em Haus?“ „Halt Mädle!“ schreit d Rathre', „zaischte komm i?“

Aber d Lisbet iſcht et ufs Maul gfalla gwä, fangt a', d Hä'd zsema z lega ond sait em Schulerto' her: „Das vierte Gebot: Du sollst Vater und Mutter ehren, auf daß du lange lebest —“

Weiter ischt se et komma, weil schau' d Gret gschria
höt, ond vo'-ma' kurza Odem höt mer ner gmerkt:

„Eb du Din nemmscht, nemm-en i vorher, wa brauchst
du Din z wölla, hâ? Du Krott, du kleine, bischt jô noh
et ausgwachsä!“

Ond d Annabärbel höt gar nemme an ihren Aldenger
Schaz dächt ond schreit:

„Du? Vor dir komm i noh lang!“

„Ond i au noh, ond wenns bardu¹⁾ gheirt sei' muß,
der Frieder vo' Bucklenga wär mir au reacht.“

„Ond mir der Matthes,“ schreit d Gret.

„So Mädla“, sait jetzt der Bauer, „i moi“, s wär
Heu gruag honta. D Lisbeth ischt de jengst, dia ka' warta,
bis de andere aus em Haus send. Dia darf et, ond ihr
Alte hent jô et wölla. Isch et so?“

Wia dia sehet, daß d Lisbeth koin kriagt, no saget
se älle, jô se nemmet koin vo' dene Bucklenger, und der
Bauer göht en d Rosa nüber.

Dort send se schau' a' guate Weil gseffa, ond d Gläser
send et leer worda. Der Frieder isch wüatich gwä, weil
er schau' gewiht höt, was komm; der Matthes höts leichter
gnomma ond denkt, s gäb noh viel andere, s mülaß au
et a' Aldengere sei'.

Zaischte höt ma' ner gschwäzt von de Mädla, ma'
höt blos tronka ond übers Wetter ond d Felder ond soite
Sacha dißkerirt; zletscha ischts aber em Frieder z lang
woara, und er frôgt da' Oberbaura, was s sei?

„Ner isch!“ sait der.

¹⁾ par tout, unter allen Umständen.

„Môrom et?“ frôgt der Frieder.

„Se wöllet et.“

„Bauer, schwäzet et! Er wisset guat, daß bei ons et uf des a'kommt, was d' Mädla wöllet; was der Vater will, sell gilt. Also wöllet Ihr?“

„S! Noi!“

„Ond ezet frôg e noh amôl, môrom et?“

„Weil e et will?“

„Ben i Uich et guat gnuag? Hann i et gnuag Neder ond Vieh, ond mei' Haus isch nui hergricht, en der Kucha' stöhrt a' Konschtheerd.“

„Frieder, sei still“, rüast der Matthes rüber, „ond wann dâ der König wärſt, er gäb der koine. Mer send jô vo' Bucklenga“, sezt er derzua ond lacht so halba, hôt aber derbei denkt, wann a' oizicher ebbes gega sein Ort sag, nô gangs em lez.

„Jô des send-er?“ sait so a' jonger Aldenger.

„Ond was isch des nô args?“ frôgt der Matthes.

„Was des args sei?“ lachet d' Aldenger, ond nicket mit de Köpf, wia wann se saga wöttet¹⁾): „Mer woiß nô schau!“

„So guat wia ihr, send mer au noh!“ sait der Frieder, „ond kurzom, Bauer, saget: wöllet Er oder wöllet Er et?“

„Meine Mädla send noh z jong“, sait der, „i gib's noh et furt?“

„Noh z jong?“ lachet der Matthes, „Höfcht da' Tauf-schei' vo' deiner Rathre? So a' Jährla achtazwanzg schätz e se.“

¹⁾ als ob sie hätten sagen wollen.

„Dia wött e aischt gar et“, sait der Frieder, „dô dei' Lisbeth —“

„De Fengst! Wa hent denn ihr für Modena' en uirem Bucklenga. Schneidt mer au da' Haber vor-em Kora?“¹⁾

„Dô könnet Er lang warta,“ rüast der Matthes, der emmer frecher worda-n ischt, „bis Ich Diner d Ka'thre anemmt. Ganget no glei zuam Juda', vielleicht —“

Jetzt ischt aber der Oberbauer falsch wora ond d All-dinger hent gmoit, se müafzet au falsch mit-em werda, weil er der reichst em Flecha gwä isch, ond so a' jonger Burscht schreit:

„Was machet d Bucklenger Bückel?“

Der Matthes will ussprenga, aber der Frieder sait:

„So jezet wiffet mer, mō mer dra' send. Also, Oberbauer, dâ tuascht Koine hear?“

„Noi!,“ schreit der wütatich, „wie oft soll es noh saga! Liaber sperr es en en Saustall, als daß es uf Bucklenga laß!“

„Isch reacht! Sperr!“ sait der Frieder, „Kommet, ihr Bucklenger!“

Se standet uf ond machen, daß se furt kommet, ebs Händel gsezt hót, ond der Matthes rüast beim Naus-geha:

„Komm no amöl Diner vo' uich ge' Bucklenga ond wöll a' Mädle, mir wöllet ich zoiga, daß ihr au Bückel hent!“

¹⁾ Korn.

3.

An dem Sonntich, mō dia Burscht z Aldenga gwä send, send wia ällamdl am Sonntich d Mädla vor-em Dorf duffa' ¹⁾ gseßsa. s ischt a' schöner Obed gwä, noh et ganz Sommerszeit ond noh et hoiz am Tag, aber au nemme küal am Obed. Aus de Bucklenger Häuser ischt der Rauch vom Obedessa' schau' en kleine Wölkla auferkomma, ond d Sonn hót de obere Häuser vom Ort noh a'gschei't, daß dia Dächer glänzt ond dia Rauchwölkla ganz goldich glizeret hent. Des Dörflie ischt so ruhig ond friedlich dō glä zwischa de frischgreana Bäum, ond s Obedläuta ischt so über dia Dächer anezoga, langsam ond feierlich, ond mit dem Läuta' ischt et bloß oi' Obedbeata' zuam Hemmel nuf gestiega.

Die Mädla aber, dia dronta em Tal, mō der Weg vo' Aldenga hear kommt, gseßsa send, hent et beatt. Dō isch reacht weltlich herganga, ond dia Mäuler send ganga wia Büzmühlena'. Dia Mädla vo' Bucklenga hent nemlich auf dia Burscht gwartet, mō vo' Aldenga komma send. Sonst an Obed send dia bei-n-en duffa uf dene Bälka gseßsa, heut' send dia Mädla alloi' gwä, ond ebbes hsonders hent se vorghet, sell hót mer wol gmerkt.

„No', kommet se noh et?“ rüäst d Marie ond schickt Dine furt, se soll ans Eck nom gau' ond gucka. Ond für sich setzt se derzua: „Wenn aber der Matthes oina —“

Weiter kommt se et. Schau' schreit d Christe' vo' oba ra: „Se kommet!“

¹⁾ draußen.

„Auf Mädla!“ sait d' Marie, ond wia a' Regement Soldaten standet se na', rechts ond links vom Weg.

„Dass aber Roine lacht!“ schreit nô d' Marie ond schau' biegt der Loitra'waga oms Eck rom, uf dem dia Burscht gesessa send. Alla send lustig gwâ, bloß der Frieder net. Der hôt dia Sach am a' ernstera Zipfel gnomma, weder de a'dere, weil ers für a' Scha'd ghalta hôt, daß Roine uf Bucklenga woll.

„Guck Frieder, wa wöllet dia?“ rüast der Matthes, der gefahra-n ischt¹⁾), ond eb er noh a' Antwort ghet hôt, send se mitte onder de Mädla dren gwâ, ond d' Marie rüast:

„Halt! Werda?“

„Guat Freu'd!“ schreit der Matthes vorter und macht furt: „Mädchen, wa witt?“ Ond er langt mit em Peitschasteck zua-n-er nom an ihre ronde raute Backa na'. Aber d' Marie et faul, reißt em d' Peitsch raus ond sait — wia se no au so a' ernsts Gsicht na' bröcht hôt! —

„Möhre?“

Em Matthes ond dene a'dre Bursch isch lächerlich worda, se hent et reicht gwischt, was des sei, ond a' par hent vom Waga vorter sprenga wollä.

„Doba bleiba!“ schreit der ganz Hauf von de Mädla zsema und dia Burscht bleibt. Aber wia se so dia nette Mädla a'gucket, mû se vorher so grenz gacht hent, nô puffet Diner da' Wdra: „Bliz d' Gret!“ „Wetter d' Lisbeth!“ „Beim Bluscht²⁾ s' Kasta'jörgs Marie!“

¹⁾ die Zügel führte.

²⁾ beim Blut (sc. Christi).

„Môher?“ schreit die noh amdl, ond koi' Schildwach
hôts besser könna.

„Bo' Aldenga,“ sait der Matthes.

„Môrom?“

Koi' Antwort.

„Mer wissets schau!“ schreit dô d Gret, „geits z Bud-
lenga koiné Mädla?“

„Wärle s geit!“ rüäst Diner vo' de Burjcht, „ond
aischt nette!“

Des hôt dene Mädle schau' gfalla, ond a' paar hent
glaçhet. Aber d Marie macht furt:

„No', wann ischt Hauhzich?“

„Am Vemberberlestag!“ rüäst der Matthes. Ond
der Frieder sait:

„Matthes, fahr zua!“

„Oha sa-n-i ‘),“ sait jezt d Marie ond d Wort
purzlet er no so raus, wia d Grombira ²⁾ aus-em Sac
„so send-er wieder amdl furt gwä ond hent s Oberbaura
feif' wollä? Uich pfeift mer! Ond ezet kommt-er wieder
hoi', aischt no hauhfärtich, wia wenn-er ebbes wäre!
Was send-er denn? Neß send-er! Kerle wia euch kaust
mer am Groscha'stand. Ihr Wetterfahna! En der Woch
ond am Sonntich obed laufet er ons ndch, ond am
Sonntich Mittag de Aldenger! Jô wärle, so isch. Isch
et so, Hansjörg?“ — der wird raut — „isch et so,
Christian?“

„Mädle!“ sait der, „wa witt?“

¹⁾ sage ich.

²⁾ Kartoffel.

„Was i will? Lisbet, komm amöd her ond verzähl
em Christian, was er am vorichä Sonntich gschwätz höt.
Auf s Maul, Lisbet! No Kurasche!“

„Lisbet!“ rüäst der Christian, „dâ wirsch't doch et?“

„I werd“ — sait dia, aber d Marie macht schau'
weiter.

„So macht ers, ond kriaget doch nerged's Koine.“ —

„No müäfset mer halt geh¹⁾ uich nemma,“ sait der
Matthes.

„Ons?“ sait d Marie, „Ons? Dô brentet er ich!²⁾
Was a' rechts Bucklenger Mädle ischt, nemmt koine Land-
streicher, wia euch! Isch et so, Mädla?“

„Jö!“ saget dia, aber et so ganz aus-em Herza raus.

„Er hairets,“ sait d Marie, „ihr Allerweltsgucker,
ond wenn er hondertmöd möchtet, noh frögt ses aischt noh,
ob mir wöllet. Moinet-er, mer seiet eure Guatgnuag?
Was send ihr denn?“

„Bliz noh amöd, höt dia a' Raffel!³⁾“ rüäst der Hans-
jörg, und der Matthes sait: „Marie, wann du amöd stirbst,
dir muäf mers Maul extra z tautschla.“ Aber der Frieder
ischt o'geduldich worda, ond sait noh amöd: „Matthes
fahr zua!“

„Jö fahret no zua,“ rüäst d Marie, „äls zua, em Teufel
barsuaß zua!“

„Ond se haut mit der Peitsch dene Gäul a' paar nei',
daß dia uspacket ond em Galopp furtfahret.

¹⁾ eigentlich: gehen um etwas zu thun, jetzt, bald.

²⁾ täuscht ihr euch.

³⁾ Maulwerk.

S Matthes Peitsch aber hót d Marie bhalta. Wia se nô ndcher en ihrem Stüble gwä ischt, hót ses doch et lassa könna ond hót zuam Feaschter naus nôch-em Matthes gucket — der hót düba em Hof usgraumet. Se ischt et mit sich zfrieda gwä.

„Marie,“ sait se zua-n-er selber, „ka'scht denn dei' Maulnia halta, muascht denn du emmer de aischt sei' bei alle Stroich!“

Ond nô leint se sich zuam Feaschr naus ond' gucket älla'weil abe.

Wia aber nô der Matthes rufguckt — moinet er, nô sei se zurückfahra? Noi', d Peitsch, mö se älls noh en der Ha'd ghet hót, nemmt se, hebt se naus ond rüast:

„Matthes, witt se?“

„Ka'scht se bhalta,“ sait der no so ane, gôht en da' Stall nei' ond bronnlet:

„W reachts Mädle, vo' oba bis onta; aber s Maul!“

4.

„Du, Frieder,“ sait am Metich morga der Matthes zuam Frieder, „was isch, machet mer weiter?“

„Wa werdet mer et?“ sait der, „hear muaz Dine!“

„Ischt schau' reacht,“ sait der Matthes ond krazt se em Hör, „ischt schau' reacht, aber —“

„Was aber, Matthes, du wirscht doch et atrennich¹⁾ wear?“

¹⁾ abtrünnig.

„Wa werd i?“ sait der, s ischt em aber a' bisle schwier außerkomma, „wann wöllet mer?“

„Um nächsta Samstich! Mei's Vater Bruader schreibt mer, z Hasa'dorf häbs Mädla gnuag ond aparte s Burgâmoischter s de seine wäret grad reacht für ons.“

„Für di!“ sait der Matthes.

„Noi' au für di! Er woiß, daß mir hoide Weiber brauchet. Mer sollet no am Samstich komma. Et hau-färtich, sell mög mer z Hasa'dorf et, no so, wia mer seie.“

„Em Ghäshemed?¹⁾“ frögt der Matthes.

„Schwäz et! — Matthes, wa hosc?“

„S? Nez!“ sait der, pfeift ond guckt so zua s Frieders Feaschter naus.

„Also agmacht,“ sait ßder Frieder, „am Samstich! Mei's Vaters Bruader kommt rüber ond göht mit.“

„Isch reacht!“

Ond der Matthes göht nöchdenksam hoi'. — — —

Um Samstich send se früah raus ond send dia paar Stond ge?²⁾ Hasa'dorf gloffa. Der Gotlob, s Frieders sei Vatersbruder, isch mit ond höt gsait, er woll die Sach schau' richt, se brauchet se gar koi' Müah z gä. Wia se en Fleck a nei'komma send, nô send se zaischte en da Sterâ ond hent se gstärkt. Vo' dort send se zum Burgâmoischter.

„Also des wäret dia zwöi,“ sait der Gottlob zum Burgâmoischter.

¹⁾ blaues Leberhemd.

²⁾ nach.

„So Ihr wärets,“ sait der, „dô sitzt!“ Nô schreit er en d' Kuche naus:

„Gang, Annemrei, ond lang en Moscht! Kätter, bâch Küachla‘, s send Leut dô.“

Se sitzt ane und schwäzet ner. Der Matthes guckt en der Stuba rom, der Frieder uf da' Tisch nei', der Gottlob bseint se uf a' schöne Red und der Burgâmoischter wartet bis Diner ebbes schwätz. Endlich sait der Gottlob:

„Schö' Wetter heu't!“

„Jö!“ sait der Burgâmoischter.

„Schau' alles gsät?“ frôgt der Matthes.

„Helles,“ sait der Burgâmoischter ond stöhnt nô uf. „I muâß doch ge nôch dene Mädla gucka,“ sait er ond gôht naus.

„W' rechter Ma',“ sait der Gottlob.

„Jö,“ saget dia zwöi.

„Wartet, i will dussa mit-em schwäza,“ macht der Gottlob weiter, stöhnt uf ond gôht au naus. Der Frieder ond der Matthes bleibt alloi' henna'.

„Matthes,“ sait der Frieder, „was iß? I glaub, dô muâß mer selber nôch de Mädla gucka.“ Ond er stöhnt uf ond gôht au naus.

Der Matthes sitzt alloi' denna, stützt da' Kopf uf d' Hâ'd ond denkt an ällerhand vom Unterland bis ens Tirol.

Uf oimol gôht d' Tür uf, ond Annemrei steckt da' Kopf rei', fährt aber glei wieder naus. Der Matthes sieht den Kopf ond sait:

„Jesseß, hât dia en Gre'd¹⁾!, s wurd doch et dia sei', mô-n i kriag!“

¹⁾ Grind = Kopf.

Nô sitzt-er wiedr na' wia vorher ond wartet.

Nellsmittelscht¹⁾ ischt der Frieder nausganga ond hôt nôch de Leut guet. Baischta fendet er neamerz,²⁾ endlich sieht er a' Mädle, d' Kätter.

„Du,“ sait er, „mô ischt der Burgâmoister?“

„En der Kamer“ antwortet dia.

„Ghairischt du-em?“

„Jô.“

„Isch des dei' Schwester?“ sait er ond deutet uf a' Mädle, mô vom Bronna kommt, reacht schlampich ond wüascht.

„Jô, dia isch! Gang no nei' en d' Kamer zuam Vater.“

Der Frieder gôht nei' ond hait grad noh da Gottlob saga:

„Also, s' ischt alles reacht?“

„Jô!“ sait der Burgâmoischer, wia der Frieder rei' kommt.

„Kommischt grad reacht,“ sait der Gottlob, „d' Kätter kriagst du, ond d' Annemrei der Matthes. Am nächsta Sonntich kommt mer ond bchauet dia Sach, nô ka' mer Heirestag³⁾ macha.“

„So?“ sait der Frieder, „Jetzt wöllet mer au mit de Mädla schwäza, kommt rüber zuam Matthes!“

„Mer kommt glei,“ saget dia, „gang no amôl nüber!“

Wia der Frieder nüber kommt, ischt dô weitrom koi' Matthes. Der Frieder rüast; koi' Antwort. Er nemmt

¹⁾ inzwischen.

²⁾ niemand.

³⁾ Verlobung.

d Kappa' ond göht en da' Sterâ na, ob der Matthes et dort sei. Der stöhnt schau' onder der Tür ond will furt.

„Matthes, du kriagscht se!“ sait der Frieder.

„Wele?“¹⁾ Dia mit dem Gre'd?“

„Noi' de a'der!“ sait der Frieder uf grôtwol.

„Nô kriagscht du dia?“ sait der Matthes.

„Wurd wol so sei?“

„Nemmscht se?“

„J!“ sait der Frieder ond mer hôt et gwißt, isch des Jô oder Noi'.

„J gang hoi!“ sait der Matthes, „Isch des au der Brauch, oin so siža lau'? Wenn se ebbes wöllet, nô sollet se komma. Nô wöllet mer wieder guða.“

„Matthes bleib!“ sait der Frieder, ischt aber au schau' a' bisle gneigt gwä, z gau'. „Bleib! Düha beim Burçâ-moischter geits Küaðla', quate schmalzbähene!“

„J gang,“ sait der Matthes ond brommlet ebbes, mô tau' hôt wia: „Selbersfressa!“

„Nô gang i au!“ sait der Frieder zuam Matthes.

„Aber a' Weib hemmer wider et!“

„Was schadts!“ sait der Matthes, „wenns en Ernst ischt, werdet se schau' komma. Bhüat Gott, Sternwirte! J hau' doch zahlt? Komm, Frieder!“ Ond leis segt er darzua:

„Z Bucklenga geits au Mädla!“

5.

An dem Samstic̄h Morga, mô dia zwoi z Haſa'dorf gwä send, ischt d Marie en d Stadt ganga ond hôt

¹⁾ welche.

Butter ond Dier verkauft. So gega Mittag ischt se wieder
zrück komma, ihren Krätta' ¹⁾ uf-em Kopf, voll vo' dene
Sacha, wia mers halt am Samstich uf-em Märkt kaust.
W' Viertelstond vor-em Dorf schau' kommt er ihr kleine
Schweschter entgega: se soll macha, daß se hoi' komm, s
sei Diner dō, mō se woll. S sei reacht, se komm glei, hdt
se gsait ond schickt ihr Schwester wieder furt.

Vom Hasa'dorfer Weg rei' ischt dō grad der Matthes
komma; der Frieder hdt noh a' Gschäft em nächsta Ort
ghet ond hdt en alloi' laufa lau'. Schau' vo' weitem sieht
er d Marie, wia se daherläuft, stolz ond aufrecht, da
Krätta' frei uf-em Kopf, d Jacka' en der oina Ha'd, weils
er hoiz worda-n ischt, ond de a'der en d Seit gstemmt. W'
paar Brachtsärm hent aus dene schnaiweiße kurze Aermel
rausguckt, d Böpf send er weit nonter ghangt, ond ihre
Auga hent unter-em Krätta' fürre bligt — a' reachts Paar
Spizbuaba, mō zua dem Schelma'maul „Kamerad“ gsait hent.

Der Matthes macht, daß er se ei'holt, er bietet er d
Zeit ond sait:

„Möhre, Marie?“

„Bo' der Stadt“! sait dia ond hdt noh et gwikt, möhre
der Matthes kommt; s muaz er aber so gwä sei', wia
wann er wieder amöl ge Heira' ganga wär, drom setzt se
derzua:

„Mö Du her kommscht, woiß-e!“

„Möhre?“ frôgt der.

„Bo' der Weiberschete,“ sait se ond lachet a' bisle,
„hau'-n-e et Reacht?“

¹⁾ Korb.

„Höfcht Reacht,” sait der Matthes.

„So, au amöl wieder?” sait d’ Marie schau a’ bisle spizich, „ond mö hoscht se denn nô?”

„Wursch schau’ seha, wann se geh kommt!” sait der.

„Dô wurscht lang warta könna,” sait d’ Marie, „du kriegst deiner Lebtag koinne. Eschieht der aber schau’ reacht!” sezt se derzua ond gucket en so a’ bisle vo’ der Seita-n a’. Ond der Matthes gucket grad au a’ bisle nomm zua-n-er, ond dia boide Auga hent sich a’ Sekond a’blitzt, nô ischt aber glei der Donner komma.

„So meischt!” sait der Matthes, „Desmöl bischt uf-em leža’ Weg. Drüba z Hasdorf s Burgamoisichters sei’ Annemrei kann e hau’, wann e will. Soll e se nemma, Marie?”

Er macht dia Frdg mit Fleiß ond gucket d’ Marie dâbei a’. Dia wurd a’ weng raut, ond über ihr Esicht zucts so a’ bisle, mer hôt et gwißt vo’ was, wia se sait:

„Bo’ wega z meiner au d’ Kätter derzua! Send reachte Mädla, sell muaz e saga: d’ Annemrei — a’ Schlampere,¹⁾ a’ Dreckappel²⁾ oba raus ond dommer weder ihrs Vaters demmste Kuah; ond d’ Kätter — dia ka’ loi’ Wassersuppa kocha, koinne Knöpfla’ macha, et en Salat a’richta. Neils gnomma, Matthes!”

Der Matthes hôt er Reacht gä,³⁾ sait aber laut.

„O was! Reachte Mädla send’s, nobel ond gschidt, ond Geld hent se wia Heu.”

¹⁾ nachlässig gekleidete Weibsperson.

²⁾ unordentliche, unreinliche Weibsperson.

³⁾ gegeben.

„So Geld hent se wia Heu!“ sait d' Marie — ond jezt ischt se giftich wora, — „heirdt no den Geldsak, er wird bald leer sei! Dia Mädla verstandet s' Aushausa!“¹⁾

„A wa! So a Stompa²⁾ wird et glei gar!“³⁾ sait der Matthes, hôt er aber em Herza wieder Reacht gä.

„Wurd et leer,“ macht en d' Marie noch „wurd et leer! Wanns Weib ner ischt! Was nuzt oin d' Kuah, wenn se Mil geit, ond en da' Melktübel schlät! Wursch' schau' merka.“

„Desch't mei' Sach!“ sait ezt der Matthes.

„Mir ka's ei's sei,“ sait d' Marie, „nemm wen dâ witt. Aber mi laß en Kuah!“

„Marie“ sait dô der Matthes ond nemmt en andra To' a', „i hau' au scho' dächt —“

„Was hösch't dächt?“

„Z Bucklenga gäbs au Mädla!“

„So, hösch't des gmerkt? Du bischt a' Gscheidle! Wia alt bischt? Viera'zwanzgâ, ond merfst des jezt aißt! Du paßsch't zur Annenrei!“

Des hôt da' Matthes jezet wieder verzürnt ond er sait:

„Jô s' hôt Mädla, aber s' wills neamerz!“

„So? s' wills neamerz?“ macht d' Marie, „Kerle wia euch tät gar koine nenima! Nells zua gloffa, gang us Stuagert ond hol der dort oine, so oine mit Bändela' ond Fegla', wann mir Ich et guat gnuag send!“

Ond jezet tuat se hoide Fäuscht en d' Seita ond stöhrt vor da' Matthes na' ond sait:

¹⁾ verschwenden.

²⁾ ein zum Theil gefüllter Sack (s. c. Geld).

³⁾ leer.

„So, jezt will er der no ebbes saga: s ischt Diner dō,
der so a' Bucklengere will —“

„Jō, wen au!“

„Mi!“ sait d Marie, „wanns wissa witt. Ond jez
nemm-en aischt, ond wanns a' Krüppel ischt! Was brauch
i Euch!“

„So nemm-en!“ sait der Matthes trozich, „nemm-en,
mer könnet nō mit anander Hauhzich hau'! I nemm d
Annemrei.“

„Ond i schenk der dei' Peitsch zur Hauhzich!“ sait
d Marie ond gōht schnell weiter.

Der Matthes guckt er nōch, ond se gfällt em aischt
wieder, wia se so des Wegle zua ihrem Haus nuf läuft.
s ischt em gwā, wia wann er ebbes vo' Neid uf den
spūra tät, mō d Marie nemmt, bloß hōts ers selber et
reacht gwisst. Aber s muas wol so ebbes gwā sei', weil
er sait:

„Ond wenns a' Aldenger ischt, nō schlag em d Knocha
em Leib zjema!“

6.

Ond a'-n Aldenger isch gwā, der mō d Marie hōt
wölla. Am Sonntich isch em ganze Flecka romi gwā:
d Marie nemm den Aldenger, ond der Friedr ond der
Matthes dia zwoi vo' Hasa'dorf, ond en acht Täg kommet
se ond macht Heirestag. Der Aldenger heirdt ens Dorf
rei', nō gäbs drei Hauhziche uf oimdl.

Dene drei isch aber alle et wol en ihrer Haut gwā.
D Marie hōt eigentlich em Born gsait ghet, er soll amdl

Komma, s sei er oī' Deng! Wia-n-er-r aber nō glei en
ihr Stüble nōchgōht ond en Kūz von-er will, nō langt se
noch s Matthesā seiner Peitsch.

„Naus dō! sag i,“ sait se, „so weit se mer noh lang
et!“ Arg vergnūagt hōt se et ausgseha, grad so wenich,
wia dia zwöi Burscht.

„Matthes“, sait der Frieder, „wöllet mer denn?“

„Zezt aischt reacht!“ sait der Matthes, ond sezt nō
derzua: „Woisch au noh, was mer de Aldenger versprocha
hent, wenn Diner rei' heirdt?“

„Burscht, doch et Ernscht macha!“

„Dō wäger¹⁾ mach-e!“ sait der Matthes ond gōht.
De' halb Woch lauft er wia em Dusel rom, daß mer-n gar
nemme kennt hōt. Amöd verwißt en der Frieder uf em Feld,
wia-n-er a' Fauscht ge' Aldenga macht, ond a' andersmöd em
Gäfle, wia-n-er zuam Feaschter vo' der Marie nauf guckt.

Matthes, Matthes, wa isch mit dir! Merksch ezet,
daß z Bucklenga au Mädla geit! Wanns no et z spōt
ischt. Um nächsta Sonntich ischt Heirestag, ond drei Woche
druf Hauhzich mit der Annemrei! Woisch dia mit dem
Gre'd!

Au em Frieder isch et reacht wol gwā bei derā Sach;
er hätt am liebschta d Sach sei' lau' -- wa braucht er
au' schau' z heira, er isch jō noh so jong! So denkt er au
amöd wieder ond sezt se he' ond schreibt an sein Vatersbruader
a' Briaſle, er woll et. Glei schickt ers em nom, ond der
läft saga, sei schau' reacht, er komm selber. Richtig am
Samstich stöhrt er dō.

¹⁾ allerdings.

„Frieder“, sait er, „mir hōts tremt“¹⁾.

„So, was denn?“

„S sei reacht so, wiaß sei; du fahrest guat mit der Kärtter.“

„Mir hōt au schau' viel tremt,“ sait der Frieder.

„Träume kommen von Gott! stöhnt en der Bibel,“ sait der Gottlob.

„Aber de deine et, sell woiß e gwiß,“ geit em der Frieder zurück.

„Mōrom et? S bleibt dābei. I be' der nächst, mō für die sorga muäß, ond du muascht a' Weib hau'. Mach koinne Sacha! Guadem, s ißht älles agredt; morga kommet se rüber, i hau' onser Verwandtschäft ei'glada — morga ißht Heiretstag. Bhüet Gott!“

Der Frieder langt an sein Kopf ond sait ner maih. Song ißht er noh gwä, a' andere hōt er grad et gwißt, „ond“, sait er, „bei jeder Heirdt muäß onser Herrgott s bescht to'. S wurd schau' reacht werda.“ Aber so laut ond stolz wia noh vor vierzeha' Täg hōt er nemme gsait: „Hear muäß Dine!“

Wia-n-ers em Matthes sait, wiaß stand, hōt der gar ner gsait ond bloß zur Marie ihrem Feaschter naufguckt. Er hōt to', wia wann em älles oi's wär, er hōt selber nemme gwißt, mō-n-em der Kopf stöhnt. Da' ganza Samstich ißht er en Gedanka rom gloffa.

„Wanns no et Sonntich würd!“ sait er so gega-n Obes, ond sitzt auf da'. Dengelsto' hentrem Haus ane ond guckt en da' Boda nei'. So sitzt er lang dō ond endlich stöhnt

¹⁾ geträumt.

er uf: „Heula' könn-e, i Esel! Aber mei' Peitsch muß her!
Dia soll der Aldenger Kriüppel et en d Ha'd kriaga! Noi',
liaber hau' i en mit durch!“

Aber wia dia kriaga! Daß s em d Marie et guatwillich
geit, höt er gwisst. Mit Gwalt er nemma, sell höt er
au et wölla. Was tau'? Steahla?

„Noi', Matthes,“ sait er zua-n-em, „s ischt et gsthala,
se ghairt dei'! Wanns Obed ischt, holscht se.“

Ond richtig, wia der Dämer¹⁾) komma-n-ischt, göhrt er
durchs Gärle durch ond steigt hentia übers Dächle uf
dem kleine Vorbaule nauf ond stöhrt vor der Marie ihm
Kamerfeaschter. Daß dia om de sell Zeit em Stall ischt,
höt er gwisst, ond so isch au gwä; ihr Stüble ischt leer.
Aber neit hōts en dem Stüble ausgseha, alles an sei'm Ort,
sauber usgraumt, au a' paar Blomastöck am Feaschter, dia
hent, weils Obed gwä ischt, arg guat gschemeidt. Er schmeidt
dra' ond tuats nō a' bisle uf d Seit, daß er eine könn.
Uf oimol hait er en der Stuba dren Ebber gau', verschrikt,
ond a' paar von dene Stöck fallet en d Kamer eine. Ond
en dem Augablick goht au d Kamerfür uf, ond d Marie
stöhrt zwischa der Tür. De letzte Sonnastrahla send
durçh dia Tür rei' gfalla, ond om de ganz Gestalt vo' der
Marie isch wia a' Hoilichaschei' rom gwä. Wia-n-a'
Hoiliche höt se aber et ausgseha, ehnder wia der Engel uf
dem Bild drüba en der Kirch, mō d Verdammte en d Höll
na schmeift. En Augablick stöhrt se wia anebannt, nō sprengt
se rei', nemmt s Matthes sei' Peitsch, hebt se uf ond
schreit:

1) die Dämmerung.

„Naus dō aus meiner Kamer! Was hōſt du dō
z to'?"

Der Matthes, noh halba ontrem Feaſchter, bleibt ruhich
ond woiß et was ſaga. Aber d Marie macht furt:

„A ſaubrer Burscht biſcht, ſell muaz e ſaga. Steigt
en mei' Kamer rei' ond hōt morga Heiretstag! Naus
oder i hau!"

„Halt!" rüaſt der Matthes, „Marie, i hau' gwiß ner
Dreachtis wölla."

Mittlerweil iſcht d Sonn vollends nonter ganga' ond
s iſcht donkel en der Kamer wora. Jezt aber iſchts
der Marie z viel gwä; ſe ſprengt uſſ Feaſchter zua ond
gibt em Matthes en Stoß. Der wadlet, will ſe an
ebbes heba, kriagt Peitsch ond fällt mit derā rücklengs abe
aufs Dächle ond übers Dächle nonter, verbrochene Ziegel
henta drei".

„Jefſes, was han-i tau'!" rüaſt Marie, ond des groß
ſtarck Mädle briht zſeima, fällt uſ en Schemel he', ond
grauße Träna ſend er d Backa-n abe gloffa.

„Wenn er taut iſcht!" ſchreit ſe uſ oī'mol, ſprengt
uſ ond na ens Görtle. Dō liegt der Matthes wia taut.
D Marie hōt gmoit, d Knia brechet er, ond dia paar Schritti
zua-n-em na' ſend er ſchwerer worda, als älle Bucklenger
Büdel nuf. Endlich iſch ſe bei-n-em ond ſchüttlet en.
Der Matthes macht d Auga-n uſ ond gucket ommer, wia
wenn er ner von em selber wiht.

„Mei' Arm!" ſait er bloß ond macht d Auga wieder zua.

Nöch ema' Weile aber macht ers wieder uſ, ond gucket
d Marie a'. Wia verwirrt ſait er: „Iſch ſchau' Sonntich?
Biſcht duſ, Annemrei? Furt!"

„Noi' i he' d Marie," sait dia en der hella-n Angst
„kennscht me et?"

„Jetzt ischt der Matthes wieder ganz zua-n-em komma
ond probirts s Aufstau". Der Marie hilft em. Der Arm
aber, mit dem er noh d Beitsch ghebt hdt, ischt aberghangt.

„Der ischt a," sait der Matthes.

„Ond i he' Schuld!" sait d Marie ond gucket en so
bittweis a', ganz anderschier weder sonscht. Dia Auga send
koine Spizbuba maih gwä, noiv' reachte armeliche Betiser,
ond dia Träna', mb dren ghangt send, hent om en
Almosa' bitt.

„Noi' i!" geit er der Matthes zruck, „s gschieht mer
reacht. Komm Marie, führ me nüber, mir isch schwach."

D Marie führt en. Er stützt sein gsonda-n Arm uf
der Marie ihre Achsla ond gucket so über se nei'; so ganget
se a' paar Schritt reachi langsam ond bedächtig, ond em
Matthes wärs reacht gwä, wenns a' Stond bis zua seim
Haus gwä wär. Wia se an der Tür send, sait der Matthes
so halba luschiich:

„So! Jetzt ka' mer morga et Heiretstag macha, wenn
i em Bett lieg. Gelt Marie, des ka' mer et?"

„Noi', des ka' mer et!" sait dia.

„Gut Nacht, Marie!" sait der Matthes ond geit er d
gsond Ha'd ond s ischt em gar et gwä, wia wann er se
wieder fahra lau' sott¹⁾.

„Matthes," sait d Marie, „eb dâ wieder gsond
bischt —"

„Was Marie?" —

1) sollte.

„Eb dâ wieder gsond ischt, mach i et Heiretstag.“

„Ond i mach gar koin,“ sait der Matthes, „d Bucklenger Mädla, mò mer möcht —“

„Mägstu oine?“ frôgt Marie schnell, ond ihr Herz klopft er. Der Matthes macht furt:

„Dia mò mer möcht, schmeizet oin übers Dach na ond —“

„Hebet oin nô wiedr uf“ sait d Marie ond wurd raut. S ischt guat, daß Obed gwâ ischt, sonscht hätt mer gseha, wia se am ganza Leib ziittret. Jez ischt aber grad der Mo'd über d Häuser ruf komma, ond dia Blätter von dene Bloma' hent so glizeret, ond s Laub vo' de Bem ¹⁾ hôt so grauscht, ond düba en de Büsch hôt a' Nachtigall a'fanga z schla ²⁾). Ond uf dia boide Gsichter ischt au a' Strahl vom Mo'd gefalla ond er hôt ebbes gseha, des muaz em extra gefalla hau'. Er macht so a' schiafs Gsicht ge' Aldenga ond Hasa'dorf nüber, ond schlupft aischt henter a' Wolf nom, wia d Marie ond der Matthes nôch ema' Langa Ständerleng von anander ganga send.

7.

Am andre Tag hôt mer em ganza Flecka gwißt: der Matthes sei nächt zua sei'm Feaschter raus gefalla ond hâb da' Arm brocha, mer hâb da' Dokter zua-n-em gholt, der hâb en wiedr ei'gricht, aber em Bett müaz er liega. Ond uf der Marie ihr Däckle sei a' Stoî vom

1) Baume.

2) schlagen.

Haus ra gfalla ond häb d Platte verschлага. Et lang nöth am Mittageffa send d Aldenger ond d Hasa'dörfer komma, nobel derhergsahara wia ses ghairt, we'-mér zuam Heirestag kommt.

Der Frieder ist grad beim Matthes gwä, wia se en sei' Haus eine ganget.

„Du hdsch guat!“ sait er ond gôht nüber. Dô ischt nô alles richtig gmacht wora, ond der Frieder hôt d Kätter kriagt.

Bei der Marie ischt freilich anderscht gwä. D Stub ischt voll gesessa, mer hôt d Sacha bschaut ghet, der Vater ond d Muater vo' der Marie hent alles zreacht gmacht. Blos an der Marie hots noh gfehlt; dia ischt et herganga. Wia nô alles agmacht gwä ischt, rüaft mer nôch er. Dronta em Gärtle stand se ond guck an ihr Kammerseaschter nuf, sait mer. Der Vater rüaft er ruf. Se kommt en d Stub eine.

„So,“ sait er, „jezet wäret mer fertich; mer hent alles vo' gä,¹⁾ der Christof kriaget s ganz Baura'werck; mir ziehet ens ober Stüble nuf. Ond jezet ganget mer en da' Adler, kommt!“

Der Christof stöhrt uf ond gôht zur Marie na'.

„Woischt du, ob i di will?“ sait dia noh leis.

„Mach koin Sacha,“ geit er-r zrück, „s isch alles fertich!“

„Aber i be' et fertich,“ sait d Marie, gôht zua ihrem Vater nom ond sait:

„Vater, i nemm da' Christof et?“

Wia des d Marie sait, hent älle Mcul ond Nâsa' uf-
gspert: so ebbes isch so lang mer Heirestag macht, noh
nia fürkomma.

¹⁾ her gegeben, Ausding gemacht.

„Du nemmschst en et?“ sait der Vater, „Mach koin Grangel¹⁾ Mädle —“

„Ond i will Ich jecket au ebbes saga,“ sait d' Marie.
„I be' d' Hauptsaech bei derâ Gschicht, ond wenne i et will, was isch nô?“

Uf dia Frôg hent se koi' Antwort gwißt, ond d' Marie sait zur Muater:

„Muater, wia oft höscht Du schau' gsait, der Vater hätt solla a-n-andre nemma, er häb aber di möga ond häb et von der glassa ond s sei reacht so gwä? I mög da' Christof et, ond i will en et.

„Se hôt Reacht,“ sait Muatter, ond gibt em Alte en Puff, „schwätz!“

Der hôt aber et gwißt, was jecket saga, ond brengt blos raus:

„Muascht du emmer dein oigena' Kopf hau'?“

„Noi' Vater,“ sait d' Marie, „i tua en ällem, was Er hau' wöllet, aber en derâ Sach —“

„Schwätz i au noh a' Wörtle mit,“ sait a' Stemm vo' der Tür hear. S isch der Matthes gwä. Er isch läsweiß gwä ond hôt da' Arm en-erâ Schleng ghet. Aber da' gso'da legt er om d' Marie. Dia strahlt, wia wenns vo' enna' raus en-er brenne tät, ond der Matthes sait:

„D' Marie wird mei' Weib, mer send mit anander ei's woara. Ond ihr“ — sait er zua ihre Alte — „send noh viel z jong zuam Bo'gä; treibet ihr euer Sächle noh om ond geant²⁾ d' Marie mir rüber!“

¹⁾ Wirwarr.

²⁾ geht.

Der Marie ihre Alte hent em Reacht gä. S ischt et emmer guat, wenn d Eltern vo' gäbet, se werdet o'wert, ond s viert Gebot gôht oft aus, wann se a'môl reacht alt send ond ner Diges maih hent. Em Vater vo' der Marie isch ei'gsfalla, was amôl so-n-a' alter Ma', mö au vo'gä hôt, gsait hôt: Ner maih sei mer, hôt er gsait, wa'mer nemme Herr em Haus sei. Da' Vater soit ma uf da' Heiretstag mezga ond Muater uf d Hauhzich. Drom ischts en et so o'lieb gwä, daß so komma-n ischt, ond wenn au d Aldenger baise Gfichter gmacht hent, se hent müaßa wieder leer azia.

„Gschieht en Reacht,“ sait Marie zuam Matthes „se hent euch au et wölla!“

„Wenn se es aber wölla hättet!“ sait der Matthes und lacht.

„Was zjema komma soll, komnit zjema“ sait d Marie ond sezt leis derzua, „ond wa'ma' oin zaischta s Dach abe schmeiñt.“

8.

An oi'm Tag hent der Frieder ond der Matthes Hauhzich ghet, ond bei boide isch guat ganga. Beim Matthes ond der Marie vo' A'sfang a'. Aber au beim Frieder: d Rätter hôt ebbes glernt ond sich Müah gä, ond wenn se ebbes et reacht gwîst hôt, nô hôt er d Marie gholfa, ond mit Fleiß ond mit guatem Willa gôht äles.

Nôch Jôhr ond Tag ischt der Frieder ond der Matthes amôl wieder mit em Oberbaura, mö hôt seine Mädla liaber en Saustall sperra wölla, weder uf Bucklenga gä, zjema


- komma. Der isch grad noh so hauffärtich gwä, wia selbigs-möll. Von seine Kleine Mädla send aber alle siža blieba, bis uf de Zengst, weil er sein Geldsack, uf den ers hôt nuffstella wollä, verspekeliert ghet hôt. Dô hôts nô der Matthes et verheba könna ond sait zua-n-em:

„Oberbauer, wenn Er Uiren Saustall bauet, nô will e au a' paar Führer derzua to': s geit en graufa!“


En a' paar Jôhr hôt au Bucklenga nemme da' Abscheu ghet, ond we'-mer jetzt ge' Bucklenga kommt, sieht mer gnuag Weiber aus a'dere Dörter. D Bucklenger Burscht nemmet aber au gern Weiber vom Fleck'a selber, aparte, wann se so schö' send, wia em Matthes ond der Marie ihr Mädle, d Kätter. Ond s Frieders ond der Kätter ihr Bua, der Matthes, hôt koine so lange Gsperranzena'¹⁾) gemacht ond et so weit en alle Dörfer rom gsuacht, wia sei' Vater ond der Matthes.

Freile, daß der jong Matthes ond de jong Kätter anander gnomma hent, ischt eigentlich ganz natürlich zugganga: an oi'm Tag send se mit anander täuft wora, ond an oi'm Tag mit anander kompfermirt; dô hent se halt au an oi'm Tag mit anander Hauhzich gemacht. S ischt wôhr! Wenn-Er ge' Bucklenga kommt, kairet no bei-n-en ei' ond saget en schöne Gruaß vo' mir! Ond der jong Matthes wurd Ich dia ganz Sach selber grad so verzähla, wia-n i se verzählt hau'. Ond der Alt wurd derzua raucha ond nicka ond nôch sei'fa'zwanzg Jôhr noh sei' Marie a'guða wia am Heirestag.

¹⁾ Umstände.



Wa' mers übermacht.



1.

Wa'-mer s' sauberscht Mädle em ganza Flecka hót seha wölla, nô hót mer nos Krommholza Bäbele a'guða dürfa. Maihner sag e et von-er, dô hilft doch koi' Nedanix, dia muas mehr gseha hau'; ond wa'-mer en dene Gschichtabüacher a' Mädle noh so gnau mit der Feder akonterfeit vo' de Zöpf bis zua de Schuah, zletschta stellt se doch a' jeder des Mädle für, wia-n-er måg, mehrschtentoils aber so, wia em a' jeda sei eigener Schatz aussieht. Drom soll se au a' jeder des Bäbele grad ei'bilda wia-n-er måg; aber sell sag e nohmöl: s' sauberscht Mädle em ganza Flecka ischt se gwä.

Freile au fascht s' ärmscht. Ihr Vater ond ihr Muater seind schau' lang taut gwä ond hent bärich so viel Vermöga zurückglau, daß mer en hót da' Sarg macha lau' ond nôcher a' Koschtgeld fürs Bäbele zahl'a könna. Viel isch et gwä mit dem Koschtgeld ond s' hót lang koiner des Mädle drom nemma wölla. Um End hóts der Schreinerjakob to', weil sei' Weib a' Gschwischtrichkend zuas Bäbeles Muater gwä ischt. En dem sei'm Haus ischts Bäbele usgwachsa bis en ihr zwanzigschts Jöhr; se hót aber bei dear baifa Naffel,¹⁾ hei's Schreinerjakobs Weib et viel

¹⁾ jänkisches Weib.

guate Stonda ghet. Nellweil schaffa vom Ufamärgaläuta¹⁾ bis lang nôch der Betglock dia sieba Kender vo's Schreinere onds Hauswesa hôt bsorgt sei wölla, ond d Schreinere ischt liaber uf d Schwätzete ganga als daß se selber viel gschafft hätt. Se hôt ällbott vo' ihrem Ma' da' Buckel voll kriagt, des hôt se aber et anderschter, no noh gifticher gmacht. Nôch der Kompfermatio' hôt s Bäbele en en Dentscht en d Stadt wölla, aber d Schreinere hôt se et furt glau' — se hôt dôzmôl schau gmerkt, was für a' schaffichs a'stellichs Mâdle des Bäbele ischt, ond bis en ihr zwanzigstes Jôhr, wia-n-e gsait hau', hôts d Schreinere na'brôcht, daß s Bäbele hôt bei-n-er bleiba mülaßha.

Wann aber oiner glauba tät, des Bäbele sei uf dia Manier a' verschüchterts Heale²⁾ woara, der brennt se. Noi', dia ischt ällweil fescht en ihre Schuah gstanda ond hôt da' Kopf nia hanga lau'. Blos a' bisle still ond trozich ischt se mit der Zeit woara ond hôt oi'm et viel guate Wort om en Vaza gä. Se hôt ruhich vor se ane gschafft, alles prompt ond akkerat, aber sprizich ond kurz a'bonda hôt se dâbei sei' könna, so daß sogar d Schreinere mit ihre sieba Schwerter em Maul älsgmach Respekt vor er kriagt hôt. Ond stolz ond sprizich ischt se au gega d Buaba gwä; s hôt keiner sa³⁾ könna, daß se-m amôl a' froindlichs Wörtle gä hätt, so viel er au scho' z Gfalla ganga send.⁴⁾ Se ischt arg misstrauisch gwä; de Reiche, hôt se dächt, dia nemmet wieder Reiche, Arme geits et

¹⁾ Avemaria = Morgen- und Abendläuten.

²⁾ Hühnchen.

³⁾ sagen.

⁴⁾ nachlesen.

viel em Fleck, ond dia mōs send, vo' dene send de vine derndch ond de andere måg ez halt i grad etta, wann e-n au sonst nez baiss nochsa will; a' der Nas rom führ'a laß e me aber vo' koi'm, ob er nō reich sei oder arm, dō ben i mer z guat dazua!

Drom ischt se au grad gega dia am sprizichscha gwä, mō am froindlichsta zua-n-er gwä send; ond mō-n-er s Stiefelbaura Hansjörg amöls s Nuijohr a'gschoffa hōt ond-er nō nocher aischt noh hōt wölla a' Brezet a' da Feaschterlada mōla, nō ischt zmdl s Feaschter usgang a' vābeles Arm ischt außer komma ond hōt-em da' nassa Wischlompa om da' Kopf gschla, daß em Haira ond Seha verganga-n ischt.

Wann aber viner hält en ihr Herz eine guckä könna, nō hätt er gmerkt, daß ihr Stolz au noh en andere Grond ghet hōt. Nemlich hehlenga¹⁾ hōt se doch Din gern gseha, aber blos ganz hehlenga — koi' Mensch hōts gmerkt oder gwischt, ond s Oberbaura Heiner am allerwenichscha, grad weils den am nächscha a'ganga hätt.

Der Heiner ischt nemlich der reichscht Baurabua em Fleck, ond au der flottescht ond leichtsennichscht. D Weibslleut send alle ganz rärrisch mit-em gwä ond er hätt no alle zeha' Fenger nausstreckadürfa, nō hätt er a' jedem a' Mädle oder au a' Wittib ghet. Absonderlich d Stangabronnabäre, mō seit a' paar Jöhr Wittib gwä ischt, hōt se an en ghängt wia-n-a' Zed ond hōt allem usbotta, daß se en an Bändel kriag. Au der alt Oberbauer, s Heiners Vater, hätt's et o'gern gseha, wann er

¹⁾ heimlicherweise.

dui Wittib gnomma hätt. Ufm Stangabronnahof ischt Säch gnuag ond koinen Kender dō gwä, ond beim Oberbauer selber hōts em Still a' bisle gwacklet; des hōt aber koi' Mensch gwisst als der Schmühl en Tabahausa.

Em Heiner aber isch gar et oms Heira z to' gwä. Dem hōts behagt, so rom scharmuzira, bald dui, bald de sell am Bändel hau', en de Wirthshäuser d Gulde sprengalau' ond da-n Nischta spiela — ond wanns nō au hiennend¹⁾) ebbes gsezt hōt mit sei'm Alta, so hōt er se's et arg z Herza gnomma, hōt wieder a' paar Woch'a da' Brava gspielt, gschafft, daß Juier gä hōt ond se so a'stelligh zoigt, wia zwanzich andere et — nō ischt der Alt bald wieder zähm gwä. Der hōt jō so wia so en sei'n Buaba nei' guckt maihner weder christlich, ond sei' Schuld isch et gwä, daß der Heiner et der graischt Tuanetguat uf onfers Herrgotts Erdboda woara-n ischt. Des ischt maihner an der Bäure glä — a' brav's fromms Weib mit a' paar große stille Auga — dia hōt da' Heiner ällweil wieder om da' kleine Fenger wickla könna ond mit a' paar Wort bei-n-em ausgricht, was der Alt mit äll seim Gschempf äll sechs Woch'a et an-a' na' bröcht hōt. An der Oberbäure isch glä, daß der Heiner doch en guata Kern bhalta hōt ond blos a' leichtsinnicher, weiterlaunischer Kerle gwä ischt, wia so reiche haufärtige Baurabuaba oft send, daß er aber doch em Grond koinen schlechte Stroich gmacht hōt. Der Herr Pfarrer hōt a' paarmol zua der Oberbäure gsait, wann se em ihr Not klagt hōt: se soll

¹⁾ hie und da.

no warta, beim Heiner brauchs noh amöls en reacht-schaffene Puff, daß er se faß, nô könn er noh a' ganz wackerer Kamerad wearra.

Der Heiner also isch gwü, den hôt s Bäbele hehleng gern ghet. Er hôt-ers halt au a'tau¹⁾) ghet wia mancher andera, blos daß s bei ihr tiefera Bstand ghet hôt. De Andere hent se ällamöls bald mit ema' andera Buaba tröscht, wanns der Heiner hôt sprenga lau'. s Bäbele aber hôt wol gwißt, daß dôvo' en Ewigkeit koi' Red sei' könn, daß s Oberbaura Heinrich so a'-n arms Mädle nemm wia sia — ond mō-n-ers a' gozichsmöls probirt hôt ond au mit dem saubera Bäbele hôt abenda wölla — er hôt schätz woll dächt, er, der Heiner, kriag au de sprizichscht em ganze Fleck rom, ond hôt se amöls a' Sonntich Obed henta duß an de Gärta gestellt ond hôt flott a'gfanga mit Fladdusa ond schöne Neda — nô hôt se'n no a'guckt aus ihre Kirschanauga ond ner gsait weder: „Aus, Heiner! Moi'scht i sei au vo' der sella Sort?“ — ond der Heiner ist dôgstanda ond hôt guckt ond hôt se vorbeigau' lay' ond hôt er nôchguckt ond ischt hoi' ganga ond hôt sei' Pfeif en s Stubaneck nei'gschmissa, daß des silber Bschläg weg-gfloga-n ischt, ond sei' Muater ganz verschrocka gfrögt hôt, was er denn häb? Ner häb er, hôt er gsait ond ischt ens Bett, ond de näächste Täg ischt er so nôchdenksam wia noh nia sei'm Gschäft nôchgangga. Bald aber hôt ers wieder trieba wia vorher, blos s Bäbele hôt er ei' für ällemöls em Frieda glau' ond wann-er er verkomma-n ischt, hôt er tau' als gsehn-er se etta.

¹⁾ angehan.

s Bäbele aber hót macha möga, was se hót wollä, se hót den Heiner et aus-em Senn bröcht; se hót halt gmoi't, so gäbs doch uf der ganza Welt koin Buaba maih¹⁾) wia den, ond doch hätt se-m au wieder d Auga auskraza könna, daß er so-n-a' leichter Vogel sei, ond oft hót se em Stilla dächt, móroms ezet au onser Herrgott et anders ei'gricht häb uf der Welt, daß sia a' Bauratochter mär oder der Heiner a'-n armier Kerle! — Ond über solche Gedanka ischt se ällaweil stiller ond trüjicher woara, ond d Leut hent gsait, s sei schad für des Bäbele, dia werd noh a' ganzer Holzäpfel.

2.

So ischt oi' Wässerle oms ander da' Bach na ond em Flecka hóts so wenich nuiß gä wia vor Jöhr ond Tag au. Zwör z schwäza hóts älbott²⁾) allerhand gä, aber deswega ist mer doch sei'm Gschäft nöchganga wia mers usem Land tuat, ond wann au s Di' gstorba-n ischt oder de Sell gheiret hót oder a' Bauer a' nuia Schuira baut hót — der Flecka ischt gstanda mó-n-er gstanda-n ischt, em Sommer hóts dussa z schaffa gä ond em Wenter henna oder au amöl a'-ma' Tag ner, en de Konkelstubena hent se de alte Liadla gsonga ond en der Kirch de alte Choräl ond am grauße Rohrbronna hent d Gä's pfaderet ond hót mer s Vieh trenka lau' oin Tag wia da-n andera.

Aber ezet zmol, ez geits ebbes Nuis: em Oberbaura vergantet mer! s ischt der aischt em Flecka, dem des passirt,

¹⁾ mehr.

²⁾ öfters.

ond der Schmuhl vo' Tabahausa — der hót da' Oberaura nei'gritta, der soll no brav aus-em Flecka bleiba, er kó't so'scht amól da' Buckel hais voll triaga. Daß des em Flecka vorkomma könn ond aischt nô beim aischta Baura', des hätt koiner se trema lau', ond uf da' Schmuhl send au dia wüatich, mò s em Oberaura schau' vergonnet, daß-em amól für sein ond sei's Heiners haufärtichs Weasa to' sei. Ond kaum hent d Leut vom aischta Schreck usgschraust ond de aischte Gschwäzer ommertraga, nô hoishts a'-ma' schöna Morga, der Oberbauer hääb se uf seim Schuiraboda ghenkt.

Ond so isch au gwä. Ond mò se am dritta Tag zwischa Liacht ond Donkel da' Oberaura hent aufhetra ghet uf da Kirchhof ohne Sang und Klang, blos daß der Pfarrer a' kurz Gebet gsprocha hót am Grab seit henta em Wenkel bei dene alte Holzberbüsch — nô ischt derhoi't d Oberbäure gesessa ond hót se et z helsa gwist vor Jomer und Elend, em Kirchhof dussa-n aber an sei's Vaters Grab ischt der Heiner gstanden wia anebannt an d Kirchhofmauer ond hót em Tautagräber zuagudt, wia der s Grab zuagmacht hót, oi' Schaufel vol om de ander — ond wias zua gwä ischt ond der Tautagräber sei' Gschirr zsemagnomma hót, nô ischt se der Heiner mit-ma' Seufzer über d Auga gfahra, wia wenn er Träne azwischet hätt, ond nô hót er se ufgricht und ischt mit grauße Schritt naus zum Kirchhof ond hoi' ond en d Stuba nei' zua seiner Muater.

„Muater,“ sait er, „ezet isch rom mit-em Leichtsenn!“

D Oberbäure tuat da' Schurz vo' de Auga ond gudet-en a':

„O Heiner,“ sait se', „môrom hôscht de et bälder
bsonna! Ka' sei, nô wära-mer et en dem Elend!“

„Ka' sei, Muater!“ geit er zruck. „Aber wann oiner
des Elend verspürt, nô ben is, ond i sag der nohmôl: vo'
der Stond a' isch rom mit-em alta Heiner ond s geit en
nuia!“

„Ach, Heiner, wann des wôhr wär, nô wött e onfrem
Herrgott nôh uf de Knui danka onter äll dem Zomer!“

„Wann i Uich ebbes sag, nô isch wôhr, Muater! Des
wisset-Er!“

O Oberbäure hôt ner maih gsaït ond der Heiner au
ner maih. Dô send se gseffa mit anand ond der Mo'd
hôt en d Stuba rei' gschena ond was en dene Voide vor-
ganga'-n isch, des hot neamerz gseha weder o'ser Herrgott.

Aber Wort ghalta hôt der Heiner. Der Hof isch
verkauft woara, ond was aus dem Gant noh übrich blieba-n
isch, des isch grad so viel noh gwä, daß s Oberbaura
Heiner als a' grengs Kühhabauerle hôt wieder vorna a'sanga
köenna ond derneba hôt taglohma müäfa, auf daß er sei'
Muater ond sich durchbröcht hôt. En sellem Häusle neba s
Schreiners, mò em Stiefelbaura ghairt hôt, send se em
Hauszei's¹⁾) gwä. Aber da' Heiner den hôt mer gar nemme
kennt. Gschafft hôt-er wia-n-a Fei'd, en d Wirtshäuser
isch er gar nemme ganga, d Mädla hôt-er mit Frieda
glau', freile au gsonga ond pfiffa hôt-er nemme ond mit
sei'm Schnôckamacha ond Gschichtlaverzähla hôts a'-n End
ghet: er isch romgloffa wia wann er tiassennich wär. Ond
natürle au dômit hôts a'-n End ghet, daß-em alles hofirt

¹⁾ Hauszins.

ond schö'tau' hôt. Ez hôt er uf oimol nemme viel golta bei de lediche Buaba ond bei de Weibsleut ischt er au der Nermah gwä. Dôfür ischt er aber seiner Muater gozicher¹⁾) Trocht em Elend gwä ond der Herr Pfarrer hôt ebbes uf-en ghalta ond der Schultes ond was de gscheitere Mannsnama gwä send, au.

Des hoist, bei alle Weibsleut ischt er doch et austau' gwä. D Stangabronnabäure, duigschet Bachel²⁾), hôt allweil noh a-n Aug uf en ghet. Se ischt zeha' Jôhr älter gwä weder der Heiner ond a' bisle a' Bückele hôt se au ghet ond a' Dreckappel ond geizich ischt se gwä wia-n-a' Hamschter. Aber Sach gnuag ischt uf ihrem Hof dô gwä ond se hätt schau' a' paarmol wieder heira könna. Aber eb mer em Oberaura vergantet hôt, hôt se gmoit, s werd mit-em Heiner ebbes, ond iezet hôt ses aischt reacht gmoit, s hôt se au grad koi' anderer U'stand³⁾ für se zoigt. Nemlich iezet hôt se schätz woll dächt: wüaschter ischt der Heiner et woara durch den Gant, blos ärmer, ond des ischt mer au reacht. Wann der Heiner ner zuabrengt, i hau's jô et naitich; ond wann alles vo' mir kommt, nô hôt er et viel z saga uf-em Hof, aber hau' tua-n en doch! Deswega hôt se se au ufs nui wieder alle Müah gä, daß se da Heiner ei'zei'sl!⁴⁾ Se hôt-en allweil ens Tagloh' gnomma, ond wann-er nô bei-n-er gschafft hôt, nô hôt se em flattirt ond allerhand guate Brocka zuagschoba, daß au a' Demmerer weder der Heiner hätt merka könna:

¹⁾ einziger.

²⁾ etwa: die närrische Gans.

³⁾ Heiratsgelegenheit.

⁴⁾ an sich locken.

wenn der Geizkrag, mō ihm' Ma' selich älle Bissa ens Maul nei' zählt hōt, se so uſſ Spendira legt, nō woif̄ mer, mō mer dra' iſcht.

Aber der Heiner hōt et a'bissa. Uſ dia Art wieder zua-ma' Hof komma? Noi', liaber sei' Lentag Kühbäuerle bleiba! Aber au noh en andere Grond hōt-er ghet, mōrom er et a'bissa hōt. Seit er seit neba s Schreiners gwohnt hō, hōt er all Tag des Bäbele vor de Auga ghet ond blend hätt er sei' müaſſa, wann er et ez aſcht reacht gſeh̄t hätt, was des für a' saubers Mädle iſcht; aber et alloi' des, noi', au des hōt er ſeha können, was fe für a' ſchaffichs ond reaſchaffes Mädle iſcht, ond ezet mō-n-er nemme der reichſt Baurabua em Fleckā ond au nemme der alt leichtenlich Heiner gwä iſcht, ezet hōt er fe mit ganz andere Auga-n a'gſeha weder vorher. Ond des vo' ſelbichsmȫl, mō fe-n hōt en de Gärta duſ alaufa lau', des iſcht em au noh et aus-em Senn komma gwä, ond wer da' alſta Heiner kennt hōt, der ka' fe denka, daß-er vor dem Bäbele maihner Respekt ghet hōt weder vor zwanzg andere. Ond kurzom, obwols em Heiner dōzmȫl et grad bſonders oms Heira z to' gwä iſcht, fo hōt em s Bäbele doch allweil beſſer gſalla, ond em Stilla hōt er dächt: wann i amȫl noh zuam Heira käm, des Bäbele müaſſts sei' ond foi' andere!

s Bäbele aber, dia iſcht oin Tag gwä wia da'-n andere ond hōt fe nez a'merkla lau', was ſia ezet vom Heiner halt. Wann er er verkomma-n iſcht, hōt er nemme neba nom guckt, er hōt er d Zeit botta, kurz ond ernſchhaft aber froindlich, ond hōt ſia em grad fo kurz aber et fo froindlich dankt. Daß fe em oft hehlenga nō̄guckt hōt wia vorher

au, des hôt er et seha könna, ond en ihr Herz nei' guck'a hôt
se niamöls koin Menscha lau'.

Aelsmittelscht¹⁾ ischt s Heiners Muater fränklich woara.
s muaz er doch en baisha Plez²⁾ glassa hau vo' dôzmôl,
môs des O'glück gä hôt; was er oigetlich gfehlt hôt, hôt
koi' Dokter reacht sa könna, aber se ischt als so ommer
ghoht ond arg liadrich³⁾ woara. Drom hôt se au viel
dra' denkt, wias ihrem Heiner au gau' werd, wann sia
amôl nemme dô sei, ond amôl hôt se a'gfanga ond hôt
mit-em dâvo' gschwätz.

„Muater, schwäzet et so!“ hôt der Heiner gsait. „Des
ka' e mer gar et fürstella, wia des wär —“

„Aber amôl muaz doch sei,“ sait sei' Muater, „ond
i gspürs, s tuat se nemme lang mit mir. Ond i moi',
amôl sottsch't doch au dra' denka, daß d en W'stand friaga
tätscht. Ledich ka'scht et bleiba, ond wa'-mer au nemme viel
hent, a' Weib kö'tscht doch noh verhalta!“

„Muater, wa soll e heira, solang Ihr lebet? Ond
wann e heu't wött, wer tät me nemma? Dia Zeita send
rom, mô-n-e a' jede hätt hau' könna, ond s gschieht mer
schau' reacht, wann me ezet koiné maih will!“

„Koine maih? I moi', d Stangabronnabäure tät de
ällweil noh nemma!“

„Dui?“ rüäft der Heiner, „jô, s ka' sei! Aber dui
Schlampell, dui geizich Wittib, mô d Laus om da Balg schendt
— Muater, des ischt Uier Gruscht etta! So rakomma ben
e ällweil noh etta, daß e dô en mei' O'glück laufa tät!“

¹⁾ unterdessen.

²⁾ Wunde.

³⁾ elend.

De Alt seufzet; nôch a'-ma' Weile sait se aber wieder:

„Heiner, i moi', was a' rechts Mädle ischt, wann s au de Uermischt wär, dia sott ezet aihner Jô zua der sa, weder dôzindl, ond wa moi'scht — des Bäbele düba?“

„O Muater send still! J wills Ich grad sa: jô, dia tât mer gfalla ond mit der wär oiner guat bjorgt! Aber des ischt de Stolzescht em ganza Flecka, so arm se ischt, ond moi'scht dia tât mi ezet nemma? Ond, daß es no sag: i wär au noh z stolz, als daß e mer vo' der saga liäf: noi', i will et bei' Guatgnug sei!“

O Oberbäure hôt ner maih gsait, aber a'-n-andermôl hôt se doch wieder davo' a'gsanga, ond mit-em Heiner ischt des Deng au äls maihner ommerganga. Ond wia-n-em s Bäbele a' paarmôl a' bisle froindlicher d Zeit botta hôt, nô hôt er doch dächt, am End kö't ses doch noh schick. Aber daß er ebbes zua-n-er gsait hätt, dôzua hôt er da' Rank et kriagt.

Zmôl aber, s ischt em Wenter vor Liachtmeß gwä, hôts ghoischa, s Bäbele häb wieder amôl ebbes kriagt mit der Schreinere ond jezet, uf Liachtmeß, gang se furt, en en Denscht uf Stuagert. Wia des der Heiner ghairt hôt, nô hôts-em loi' Ruah maih glau', s ischt em gwä, als gang voll älter Sonnaschei' aus-em Flecka naus, wann er des Bäbele nemme seh, ond lacha könn er voll sei' Lentag nemme. Aber wann des Bäbele sei' Weib werda tât, hôt er gmoi't, nô kö't er au wieder an-anderer Kerle werda; er kö't au wieder ufer komma, hôt er dächt, s müaßt uf ällem a' ganz andrer Segen sei', ond wann ers mit der Zeit no wieder zua-ma' Döhsabaura brenga tât ond zua-ma' eigene Häusle ond s Bäbele bren — nô kö't er zfrieda sei'. Ond sei' Muater dia hätt au a' bessere Pfleg — ond kurzom,

s ischt em gwä als dürf er des Bäbele et uf Stugert
laffa, sonst laß er sei' ganz Glück für alle Ewigkeit furt.

Er hdt zua seiner Muater so ebbes gsait ond dia
hdt-en dren bstärkt ond zletschta hdt er sei' Herz en boide
Hä'd gnomma ond hdt se fürgsezt, er woll rond raus
mit-em Bäbele schwäza ond wann er mit der Tüar ens Haus
falla müaß.

s Herz hdt-em aber doch a' bisle bobberet¹⁾ ond sei'
Dadem isch a' bisle kurz gwä, wia-n-er am Sonntich vor
Lichtmeß am Nômittag ens Schreiners Haus nüber ganga-n
ischt. s ischt a' kalter Wentertag gwä, s hdt en sellem
Jöhr Ausgangs Januar noh a' Schlittabah' ghet ond
s Schreinets ~~send~~ uf Wellenga gfahra gwä zua-ra'
Täufe. Blos s Bäbele ~~mit-em~~ jengschta Rend ischt
derhoi't gwä.

Dia hdt ufguikt ond s Herz hdt-er au mächtig bobberet,
wia dô uf oi'môl der Heiner zuar Tüar rei' kommt. Gsait
hdt se ner, weder „Guta-n Obed! Was geits?“ ond hdt
a' dem Re'd romgmacht.

„Bäbele,“ sait der Heiner ond s ischt em et leicht
außer ganga, „i möcht a' Wörtle mit der schwäza!“

„No', wa geits denn?“ sait se ond gucket en et a'.

„Bäbele!“ sait er wieder, „muascht et wieder sei'
wia dôzmôl en de Gärta duß — woischt i be' au
nemme wia selbichsmôl!“

s Bäbele sait ner. Nô fangt er wieder a':

„Ich woiß et reacht, wia-n-e s saga soll, daß d
me et falsch versthöhscht — aber i mol' — wann da' glauba

¹⁾ klopfen.

ka'scht, daß i nemme sei wia selbichsmöl — ond wann e der ezet et z greng be' — ond kurzom, Bäbele — des hau-n-e der ja wölla — daß es kurz mach — i hau' de gern ond mei' Muater hätt au ner derwider — ond wann du me witt, i moi', nô tätet mer zsemepassa ond fö'tet anander heira!"

Er hôt ufgschnaust wia-n-ers hausa ghet hôt, ond wia-n-er so dögstanda-n ischt ond sei' Kapp en de Hä'd rombreht hôt, hätt koiner dächt, daß des der Heiner sei, mò de Mädla als hôt so hofira könna.

s Bäbele aber ischt fuierraut worda, se dreht se rom, guct en aber kaum a' ond sait:

„I moi', Heiner, du tö'tscht a'sanga deine Possa onterwega lau'!"

Desch't a' baiß Wort gwä, ond s Bäbele ischt selber verschrocka, mò s raus gwä ischt. Em Heiner aber ischt au alles Bluat en d Stirn gschoßsa, sei' ganzer Stolz hôt se en-em gregt ond uf der Zong ischtem au a' baiß Antwort glä. Aber er hôt's nadruckt ond hôt au zmol d Ned wieder gfonda:

„Bäbele," sait er, „i will ders et für übel nemma; daß dâ so schwätzcht. Aber i sag ders nohmöl: s Possa macha ischt miar verganga, ond was e sag, des ischt mer Ernscht, ond wann da ner vo' mer witt, nô sags, nô gang e ond komm nemme. Dâ ka'scht de au bedenka, wann dâ witt, i dräng de etta. Über lang Zeit isch nemme! s hoischt jö, dâ gangescht uf Liachtmeß en en Denscht nöch Stuagert ond am Mittwoch ischt Liachtmeß ond — guck Bäbele i will ders grad saga: miar isch halt, wann du voll aus-em Fleck duffa seiest, nô —"

„Was nô?“ sait ezet s Bäbele ond gucket em ens
Gficht, „i will der ezet au ebbes sa, wenn dâ s wissa witt:
s ka' sei, daß anderschter woara bischt, d Leut sagets ond
mer moi't, mer sehs au. Ond wann e oin gern hau' kö't
— da ka'schis wissa wega meiner — nô wärsc̄hts du,
ka' sei! Aber des sag der au: i hau' au mein Stolz!
Ond i frôg no des: wann e vor Jôhr ond Tag et quat
gnuag gwä be'; daß me s Oberbaura Heiner a'guckt hätt,
außer wann er hôt Possa mit mer treiba wölla — ben i
älsmittelst̄t besser woara? I be' noh s selbich arm Bäbele
wia dôzmôl!“

„Jô des bischt!“ sait der Heiner ond hôt nohmôl ebbes
nadrukt, „aber i be' nemme s Oberbaura Heiner vo' dô-
zmôl, des hau' e der schau' gsait! Ond i sag der: i hau'
mers dächt, daß d mer des werdescht zuar Antwort gä,
ond i be' doch komma. Ond i sag der noh dazua: mein
Stolz hau'-n-i au noh, wann e ezet au a'-n armer Küha-
bauer be'. I hau' a' na drückt, mei'n Stolz, weil e de
gern hau', wia-n-e nia koinne gern ghet hau', aber er kö't
au wieder komma, ond nô —“

„Was nô?“ frôgt s Bäbele nohmôl.

„Nô gängs et quat!“ fährt er raus.

„So, wia denn?“

Se guckt en fescht a' ond der Heiner sia au, aber
Antwort hôt er koinne maih gä. Ond s Bäbele guckt wieder
uf da' Boda, ond nô muaz doch ebbes en-er vorganga sei',
se sait mit-ma' andera' Lo':

„Guck, Heiner, i will ders jô gern glauba, daß ders
ezet Ernscht ischt mit dem, was da saischt! Ond ez isch
schau' raus: jô i hau' de gern ond hau' de schau' lang gern

ghet! Aber, nôch Stuagert muâß e jez schau', des läßt se nemme ändera ond nô — — ach was, du bleibsch mer doch et treu!" fährt se wieder mit-em alta sprizicha To' raus ond wendt se om.

„Bäbele!“ rüäft er ond ischt kreidaweiss woara „sag des et nohmöl! Sags et nohmöl! I ka's et haira! D Stangabronnabäure kô't e heu't hau' wann e wött — aber i will se et; i will di, ond i frôg de nohmöl — “

„D Stangabronnabäure? Nô nemm Se, du! — —“

Der Heiner wendet se om ond gôht nôch der Lilara. Wia-n-er aber schau' d Schnalla en der Ha'd hôt, hairt er, wia s Bäbele am Feaschter schluchzet, daß-ers Herzstöß geit. Der Heiner dreht se wieder om ond guckt se a' ond s Bäbele zieht da' Schurz vor d Auga ond schluchzet:

„O Heiner, bleib dô! I will!“

3.

Ond am andera Obed ischt s Bäbele ens Heiners Stub düba gwä bei seiner Muater ond se hent Verspruch ghet ond der Heiner hôt zuam aischtamöl wieder glachet seit sei's Vaters Tod. Aber wia-n-er nô a'gfanga hôt von der Hauhzich schwäza ond gmoi't hôt, s Bäbele soll ihren Denscht en Stuagert wieder asa¹⁾ ond dôbleiba — nô hôt s Bäbele dôvo' doch ner wissa wollä; se ischt fescht druf bstanda: noi' des gschäh etta, a' Jôhr mendeschdens gang se noh en en Denscht. Se hôt gsait, so wöll se vorher no' a' bisle ebbes verdeana zuar Ausssteuer ond au noh ebbes

¹⁾ absagen.

Ierna — ond am End hót der Heiner nochgä, so hart s am ei'ganga-n ischt. Er hót gseha, daß s Bäbele ihren Kopf hót, ond hót dächt, den könn er er jö vorderhand noh lau', wann se gheiret seiет, nô werds schau' anderschter wear; ond daß se so drus aus gwäh ischt, noh ebbes z Ierna ond z verdeana, des hót-em schau' au gfalla wollä. Daß s Bäbele noh en andera Grond häb, mòrom se et glei heira woll, hót er se et eibildt. Aischt wia se da'n andere Morga Abschied gnomma hent — er hót er aussfolget bis zuam nächsta Flecka, ond alles hót guckt, wia dia Zwoi mitnand ganga send — aischt dô, wia se anand Bhüat Gott gsait hent, ischt em Heiner so a' bisle ebbes komma, wia wanns doch et so ganz richtig wär.

„Gelt, schreib mer au,“ hót er gsait, „i schreib au diar!“

„Noi,“ geit se em zuar Antwort, „noi, Heiner des Lemmer liaber onterwega!“

„Schwäz et, mòrom denn?“

„Miar machets et wia d Stadtleut!“

„Ha no', jö, aber ällbott ka' mer anander doch schreiba!“

„s ischt onaitich, Heiner! Wann d me gern höschte nô ka'scht mer au treu bleiba ohne Schreiba!“

Der Heiner hót ner maih gsait; duj Ned hót en kränkt, er hót gmerkt daß em s Bäbele ällweil noh et ganz traut — ond doch hót er dabei dra'denka müasha, wia-n a' manchs Mädle er vordem für Narra geht hót, ond des alt Sprüchle ischt em eigfalla; „wer einmal lügt, dem glaubt man nicht, und wenn er auch die Wahrheit spricht!“ Er hót d Zäh' über anander bissa ond hót ner maih gsait,

ond nô send se et so ganz guat von anander ganga, wia s hätt sei' solla. Au' em Bäbele isch et ganz wol bei der Sach gwä, wia se so alloir' ihrs Wegs ganga ischt, au ihr ischt a'-n alts Sprüchle vo' der Schual her ei'gfalla: „allzustraff gespannt zerspringt der Bogen!“ — aber se hôt wieder dächt: noi', des muaz er se gfalla lau', daß e-n a' bisle uf d Prob stell — ond gern hau' en jô doch ond en ändra tät e mei' Lebtag et nemma!

— Dia Frau Professere, bei dear s Bäbele z Stuagert en Denscht komma-n ischt, ischt a' brave Frau gwä, ond d Mägd hents guat bei-n er ghet. Des hoist, z schaffa hôts gnuag gä en derâ grauha Haushalteng, ond akkerat hôt alles sei müaßa, loi' Faullenzeri ond loi' Schlamperei hôt se et duldt. Aber Faullenza ond Schlampa ischt au s Bäbeles ihr Sach et gwä, ond a' reachte Magd wia s Bäbele hôts nianâ besser hau' könna als bei dear Frau Professere. Et bloß, daß se s Eßa ond da Lauh' ond d Trenkgelder ond Christkendle ond alles richtig ond guat ond uf d Zeit kriagt hôt, noi' du! Frau Professere hôt se au um ihre Mägd a'gnomma, wias et all dia Stadtfrauenteant. Se hôt et gmoi't, wann a' Magd no ihrn Denscht reacht tä, nô könn mer se em übricha laufa lau', se hôt se au allweil noch allem erkondicht bei ihre Mägd, wias gang ond stand om Leib ond Leba ond om ihre Leut derhoit ond se ischt der Moineng gwä, daß a' Frau au für Seel und Seligkeit vo' ihre Mägd a' Verantworteng häb. Ond so hent au ihre Mägd a' Zuatraua zua-n er hau' könna ond hent se oft a' Herz gsäßt ond der Frau Professere des ond sell gsait oder flagt, ond an Röt oder au Hiss hôts noh nia gfehlt.

Au s Bäbele hót bald gmerkt, wa des für a' Frau ischt, ond a' reachtshaffes Quatrua hót se au zua-n-er ghet. Aber se hätt et s Bäbele sei' müaſa, wann se viel om en Kreuzer gschwäzt hätt oder, von a' selber vor ihrer Frau viel vo' ihre Omständ ond Verhältniß verzählt hätt. Doch ischt so nôch ond nôch schau' des ond sell außerkomma, ond am End hót dia Frau Professere wenigstens en der Hauptfach erfahra, daß s Bäbele en Schaz oder so z saga en Bräutigam häb, ond wer dear sei ond so weiter. Aber da Kopf hót d Frau Professere gschüttlet, wie se nô amöd wieder gfrôgt hót, wias em Heiner gang, ond s Bäbele gsait hót, se wiss ner nuiſ! Ob se denn anander et schreibet, hót d Frau Professere gfrôgt — „Noi!“ — Ja mòrom denn et? — „Descht bei o's et der Brauch!“ Aber s komm doch vor, hót d Frau Professere gsait, sia wiſ ner davo', daß des gar et Brauch uf-em Land sei. — „Ha, ez miar teants etta, mer hents et naitich,“ geit s Bäbele zurück.

Der Frau Professere hót des et reacht gfalla wölla. Se ischt a' gscheida Frau gwä ond hót se so em Stilla dächt, dô müaſ doch am End ebbes et ganz en der Ordneng sei'. Se hót aber ner maih gsait, bis so nôchema' halba Jôhr zmöl doch a' Briaf ans Bäbele aus ihrer Heimet komma-n ischt. Nô hót d Frau Professere gänz froindlich gfrôgt, obſ ezet doch Brauch worda sei, daß der Heiner ond sia anander schreibet. Noi', sait s Bäbele, der Briaf sei von ihrem Schreinervetter! — Ja, ond was denn Nuis gäb? frôgt d Frau. „s Heiners Muater ischt gstorba“, sait s Bäbele ond wiſt se d Auga. D Frau Professere hót er zuagsprocha ond hót se tröſcht, nô hót se aber

doch wieder gfrögt, mōrom er des der Schreinervetter schreib ond et der Heiner selber? s Bäbele hót koi' Antwort gä ond d Frau Professere hót weiter gsait: aber ezet werd se doch an da' Heiner schreiba ond em ihr Beileid ausdrücka. s Bäbele schüttelt da' Kopf ond trücket¹⁾ nō als ärger a' de Auga-n ommer. Aber des sei a' sonderbara Gschicht, seit d Frau Professere, ob se denn ihren Heiner nemme gern häb! „Freile hau'-n-en!“ rüast s Bäbele ond heuslet ond schluchzet. D Frau Professere hót dächt, s Bäbele könn vielleicht et reacht mit-em Schreiba omgau', obwol se doch so'scht et domm gwä ischt, ond sait: wann se et schreiba woll, nō könn se a' paar Täg Urlaub hau', daß se selber en ihr Heimet gang, ond wanns ezet, mō s Heiners Muater gstorba sei, naitich sei, daß se bälder heiret, nō müaß mer eba seha, wia mers ei'richt, daß s Bäbele uf Jakobe noh gehe könn. Aber au dovo' hót s Bäbele ner wissa wölla, und zletschta hót se d Frau Professere en Ruah glau, weil doch ner mit er a'zfanga gwä ischt.

s Bäbele aber ischt en der nächschta Zeit ganz verftört ommerganga, ond amdl ischt se doch em Nachts uf ihrer Kamer gseffa ond hót mit-ma Bleistift uf a' Papier gschrieba. Des Papier hót se nō acht Täg en der Tasch ommer traga ond ällamdl, wann se grad ner z to' ghet hót, dra' nei' guckt ond ällbott wieder ihren Bleistift gnomma ond ebbes dra' ausgstricha ond frisch gschrieba. Aber zletschta hót se s ens Fuier gschmissa, ond nō ischt se wieder s alt Bäbele gwä.

¹⁾ trocknet.

So ischt der Sommer rom ganga ond der Herbst
beindôh au — nô hôt d Frau Professere wieder amôl s
Bäbele en der Küche troffa, daß se gheulet hôt, ond hôt
wieder en Brief vom Schreinervetter ghet. Was denn ezet
wieder gâb, frôgt d Frau Professere. „Der Heiner ischt
krank,” schluchzet s Bäbele, „ond der Schreinervetter schreibt,
s könn sei, daß er sterba müaß: Ach Gott, ach Gott!”
Aber ezett soll se uf der Platt zsemapacka, sait d Frau
Professere, ond soll uf a' paar Täg hoi' gau' ond selber
seha, wiaß em Heiner gang, ond wanns durchaus sei'
müaß, so könn se au uf Martene aus-em Denscht gau',
wanns s jezt au grad nô wenicher gschickt wär als an
Jakobe. s Bäbele hôt et Jô gsait ond et Noi', se hôt
gheulet ond tau' ond schiar verzweifla wölla, zletscht aber
wia-n-er d Frau Professere reacht ernschtlich zuagsprocha hôt,
hôt se so halba gsait, se wöll se noh bsenna. D Frau
Professere hôts voll reacht guat macha wölla ond hôt gsait:
wann se au desmôl et schreib ond et gang, nô müaß
ers jô der Heiner übelnemma ond nô dürf se se gar et
wondera, wann der Heiner glaub, se häb en nemme gern!

D Frau Professere hôts guat gmoi't, aber uf dia Art
ischt se grad lez a' komma. „Wann er des glauba will”,
rüast s Bäbele, „nô soll ers glauba, Ursach hôt er et
dazua! Ond ezet gang i aischt et — ond i schreib em
au et!”

Ezet ischt aber der Frau Professere d Geduld ausganga,
se hôt dem Mädle da' Kopf tüchtich auspuzt, hôt se a' hau-
fârtichs, hartherzichs Deng ghoiža ond hôt er Hemmel ond
Höll fürgstellt — alles oma'suscht. Jez hôt s Bäbele wieder
ihren Kopf ufgsezt ghet, se hôt gmoi't, se dürf se ner

vergä', ond wann ers au s Herz schiar adrückt hót vor Zomer, uf ihrem Kopf ischt se blieba.

D Frau Professere hót se am End stan' lau' ond hóter no noh gsait, se soll an ihr Frau denka, wann dia Sach koin guata-n Ausgang nemm! Wem et z rôta sei, dem sei au et z helfa ond so-n-a' querköpfichs Mädle háb se noh nia em Haus ghet!

Ond ezet ischt s Bäbele wieder oin Tag om da'-n andera mit verheulte¹⁾) Auga rom gloffa, ond s hót er koi' Stond koi' Riuah glau' vor Not ond Zomer, se hót als schlechter ausgseha ond d Frau Professere hót s hell Mitleid mit'er ghet. Aber ndch acht bis vierzeha Täg wieder a' Briaf vom Schreiner komma'-n ischt, s gang besser beim Heiner, nô hót se se älsgmach wieder trößt ond hót gsait, s bleib dabei, se halt ihrn Denscht bis Liachtmesz aus ond der Heiner könner des et für übel nemma, se häbet s jô vo' Afang a' so ond et anderschter ausg macht. D Frau Professere aber hót da' Kopf gschüttelt ond hót gsait, dia Sach gfall er et ond s gfall er et!

Ond se hót reacht bhalta. Am Advent ischts gwä, do ischt s Bäbele en d Stub einer komma ond hót schiar et schwäza könna vor Heula ond hót der Frau Professere en Briaf zoigt, ond der ischt von era' Kamerade gwä ond s ischt drenn gstanda, der Heiner heirdt d Stangabronnabäre! s sei gwîs wôhr, mer wiß schau' em ganza Fleck a ond vor-em Christtag wöllet se noh Hauhzich hau'.

s Bäbele ischt ganz von anander gwä.

¹⁾ verweinten.

„I hau' s jō gwißt“, ruiset se¹⁾), „i hau's jō gwißt, er bleibt mer et treu! I hau' ems jō glei gsait, er bleib mer doch et treu! Ezet hôt er mi au a'gsüahrt wia zwanzg andere, i hau' mers denka könna, daß er mi au noh ens D'glück breng! A' Hofbauer will er wieder wearra ond de alt Hoffart wieder a'fanga — i ben em halt doch z greng, weil e an arms Mädle be', aber d Stangabronnabäure, dia hôt Sach, dô kann er wieder grauß tau' — ond ezet, mû sei' Muater gstorba-n ischt, ezet gôht s alt Leaba wieder a' bei-n-em — —“

So isch außerganga onter Jomera ond Heula. D Frau Professere hôt se a' Weile schwäza lau', aber nô hôt se gsait: so ez seis gnuag, ez soll se se amôl fassa ond soll en ihr oiges Gwissa gau! Zuam Aischta sei's noh lang et gwiß, daß s wôhr sei, was dia Kameräde schreib, des könn no a' domms Gschwäz sei', wia se oft ommerganget! Ond zuam Andera, wanns wôhr wär, wer denn nô schuldich dra' wär? s Bäbele selber, mòrom hâb se se so lang gar ner om da' Heiner kemmret, et bei seiner Muater Tod, et mû-n er selber am Sterba gwä sei. Ezet hâb se s! Ueberens gang dui Sach et so schnell, ond wann se amôl versprocha gwä seiet, nô könn s Bäbele ällweil noh Ei'spruch erheba —

„I Ei'spruch erheba?“ rüaft s Bäbele, „Noi', gwiß etta! Wann er d Stangabronnabäure will, dui geizich Drekkappel, nô soll er se hau'! I hau'-n-ems vorher gsait, er bleib mer et treu, i halt en etta!“

Aber nô hôt se ihr Born wieder glegt ond nô ischt se woich woara wia noh nia ond hôt der Frau Professere ihr ganz Herz ausgeschütt' ond alles verzählt vo' A'fang a',

¹⁾ weinte sie.

wia se da' Heiner em Stilla gern ghet hää schau' lang her,
wia se nia glaubt hätt, daß se n friag, so lang er em
Reichtom gwä sei, wia se ndcher, mō-n-er arm gwä sei',
z stolz hää sei' wölla, daß se-m ezet quat gnuag wär, wia
se aber zletschta nochgä hää, aber em halt doch et ganz
traut hää. Ond nō hää se-n uf d Probst stella wölla ond
deswega sei se so gwä, wia se gwä sei, ond ezet sei s
D'glük dō ond ezet sei alles rom! Aber Ei'spro'ch tä se
etta, oms Leba etta, so gäb se se doch et ra, daß se se
dem Heiner an Hals schmeifa tät ond dō kō't doch au
koi' Segal druf sei uf so-ra'-n Eh. Ond ez bitt se no d
Frau Professere, daß se se bhalt, so lang se se brauche
könn! Se gang ~~nemme~~ en Ihr Heimet, seit könn se se
~~nemme~~ seha lau'!

D Frau Professere höt gsait, se soll ezet no ruhich
sei! Se soll ei'seha, was se gfehlt hää, daß se z hart ond
z stolz gwä sei ond em übricha soll se's awarta! s könn
jō alles noh quat wearra. Ond sia selber wöll an da' Herr
Pfarrer en ihrem Flecka schreiba ond frôga, wias mit der
Sach stand.

s Bäbele aber höt gsait:

„Noi', Frau Professere, i gspürs, s ischt rom, ganz
rom. s höt mer au de lezt Nacht so schwer tremt — s ischt
aus, s ischt alles rom!“

4.

D Frau Professere höt an da' Herr Pfarrer ens
Bäbeles ihrer Hoimet geschrieba, ond dō höt se s no' freile
rausgestellt, daß du Kameräde et gloga höt. Jö, s sei

wôhr, hôts en dear Antwort ghoischa, der Heiner ond d' Stangabronnabäure häbet d' Proklamatio' schau' a'zoigt, ond wenns Bäbele koi' Ei'spro'ch erheb, nô häbet se vor de Feiertag noh Hauhzich. Wia des so komma sei, sei bais saga; er, der Herr Pfarrer, häb mit-em Heiner gredt ond-em s' fürgstellt, mórom er denn s' Bäbele woll siza lau'; er häb gsait, des sei sei' Schuld etta, s' Bäbele woll ner maih von-m ond heira woll er ezet amöll — bei der Stanga-bronnabäure häb er en A'stand ond er wiß et, ob er so bald wieder oin triag. Maihner häb er et gsait, aber a' verstörts Wesa häb er ghet ond er, der Herr Pfarrer, wiss etta, dia Sach gfall em et ond er glaub et, daß a'so zua s' Heiners Glück sei.

Maihner Auskonft hót der Herr Pfarrer et gä könna; des Deng ischt aber em weitera a'so gwä:

Da' Heiner hôts kräfft, daß s' Bäbele em et hót schreiba wölla, er hót wol gmerkt, daß se-n uf a' Prob hót stella wölla, ond wann er se au em Stilla hót sa müisa, daß er er des vigelich et so gar arg für übel nemma könne, so hót er halt doch an gmoi't, er häb ezet schau' Beweis gnuag gä, daß er nemme der alt leichthennich Kerle sei. Ond sein Stolz hót er halt doch au noh ghet ond hót gmoi't, so kurz brauch er se vo' dem Bäbele doch grad et halta lau'. Aber gern ghet hót er se halt doch ond so hót er s' verwonda ond hót dächt, s' Bäbele häb en jô au gern, so werd se des Deng schau' gä. So ischt des halb Jâhr rom ganga, bis sei' Muater gstorba-n ischt. Des ischt em arg nôch ganga; an seiner Muater ischt er arg ghanget, ond s' ischt em gwä, wia wann sei' Schuzengel von em sei, mo sei' Muater em Sarg glä ischt. Doch hót er nô se au

wieder trößt, daß er doch s Bäbele häb ond et anderschter dächt, als daß em ezet s Bäbele schreiba tä, vielleicht au, daß se ezet ihren Denscht doch bälder usgäb ond hoi'komm. Aber daß er er selber gschrieba hät, dozua ischt er doch z stolz gwä. Noi', hôt er dächt, wann du amdl et hau' witt daß e der schreib, nô schreib e der au et! Aber em Bäbele ihrem Schreinervetter hôt ers uftra, dear soll er schreiba, er selber sei ezet et dazuа ufglegt, hôt er gsait, ond der Schreiner höts jô au tau'. Aber oi' Tag ischt verganga-n om da'-n andera, ond oi' Woch om de ander ond koi' Briaf ist komma ond koi' Bäbele. Der Heiner hôt passet ond passet, ond weil koi' Briaf komma-n ischt, hôt er om so aihrn ghoffet, s Bäbele komm zndl selber dâhear — aber Jakobe ischt vorbeiganga ond der Sommer ischt rom ganga ond ner isch gwä. Des hôt da' Heiner arg kränkt, ärger weder alles andere, ond hôt em gar et na wölla. Doch hôt er se älla'weil wieder des vorgsait ond s sell vorgsait ond hôt s Bäbele vor se selber entschuldicha wölla: se werd halt en strenga Denscht hau', ond s werd et bais gmoi't sei' ond s Schreiba werd halt et so ihr Sach sei' ond weg werd se halt ezet au et könna — ond als so dergleicha. Aber nô hôt der Teufel wieder sei' Gschpiel ghet ond hôt seine Leib-dragoner auf da' Heiner losglau', des Schwätzmaul ond selle Rätsch, dean Better ond duí Bas ond den Kamerada ond sella Froi'd! Dô hôt oine, mû em Bäbele ner guats gonnt hôt, so beim heilicha¹⁾) da' Heiner gfrôgt, was denn au sei' Bäbele en der Stadt mach? Dia werd wohl selt en andera Schaz hau'; selt hôt oiner zua-n-em gsait: „Du,

¹⁾ so von ungefähr.

Heiner, ez müäft miar aber mei' Schaz hoi', daß an d Hauhzich gau' könnt;" nô ischt em wieder a' Bas ens Haus glossa ond hót gsait, ob er s au schau' ghairt häb, mer sag jö, s Bäbele häb en andera U'stand en der Stadt gsonda, ihrs Bruaders Buia, mò beim Miletär z Stuagert sei, häb so ebbes hoi' gschrieba; nô ischt wieder der sell komma ond hót gsait: „Du, dei' Bäbele hau-n e au laufa seha, mò-n e z Stuagert gwä be' ond mein Buaba bsucht hau'. Aber dia kommt hauhfärtich daher, dia kennt mer gar nemme, ond a' miar ischt se no so vorbeigschuffelt!"¹⁾
— Ond was sonscht so dia Gschwäzer gwä send! Koi's hót ebbes reachts gwist, aber a' jedes hót drom rom gschwäzt ond dra' na' tupft — ond der Heiner, der hót widersprocha, hót gsait, so domms Zuiig woll er et haira, des müäf er besser wissa ond se sollet ihre Mäuler halta! Aber, wias halt so gđht: en Buza hòts em doch glau', er hót spentesirt ond rombohrt ond hót zletscht halt doch dächt, s müäf am End doch noh en andere Grond hau', daß s Bäbele ner von se haira lass. Ond weil des Deng ällaweil en em romganga-n ischt ond en oft ganz wittisch gmacht hót, nô hót-er se au a' paarmö'l wieder dra'kriaga lassa ond ischt en de Wirthshäuser ommerghocbt ond hót wieder maihner tronka, weder daß er hätt solla. Nôche ischt er nô blos noh wittischer gwä — doch hót er se nô au wieder gsäft ond hót dächt: ka' sei', s Bäbele kommt uf d Kirbe! Aber d Kirbe ischt rom ganga ond koi' Bäbele ischt komma ond koi' Briaf, ond nôch der Kirbe ischt der Heiner selber frank woara. Er ischt hart glä ond a' Zeit lang gar et bei se selber gwä.

¹⁾ vorbeigerannt.

Vorher aber, aih-n er se so reacht glegt hōt, hōt er zuam Schreiner gsait:

„Schreiner,“ sait er, „Er müaßt em Bäbele ner schreiba, daß e frank sei, i schreib er s au etta, se ängscht se sonscht blos. Wanns aber schlemmer mit mer gau' sott, i gspürs; s geit a' reachtschaffene Kra'ket, nō schreibet em Bäbele. Wanns anderscht gau' sott mit mer, nō möcht e doch etta, daß s Bäbele gar ner davo' wüft!“

Ond nō ischt er bald druf arg bais dra' gwä ond der Dokter hōt em s Leba-n agsprocha. Ond nō hōt der Schreiner gschrieba. Zmōl hōt se s aber beim Heiner wieder gwendlt ond des hōt der Schreiner von a' selber au em Bäbele gschrieba, ohne daß der Heiner ebbes davo' gwüht hōt.

Wer aber über dia Kranket vom Heiner allaweil en sei' Haus gloffa-n ischt, des ist d Stangabronnabäre gwä. Zwör d Schuaschterfriedere, mō als so mit em Krankapflega se agä hōt, duj hōt em Heiner agwartet ond se hōt ihr Sächle reacht hsorgt, aber doch ischt d Stangabronnabäre äll Auga'blick dō gstanden. s sei jō a' Zomer, hōt se gsait, wia der Heiner ezet so verlassa sei ond er komm doch au vo'-ma' reachte Baurahof hear, ond dō müaß oin schau s chrischtlich Mitleid treiba, daß mer se om-en a'nemm. D Schuaschterfriedere hōt se gfrögt, mō denn sia uf oimōl s chrischtlich Mitleid gfönda häb — ond hōt er au so'scht gradraus gsait, daß mer sia dō gar et verlangt häb ond daß mer se schau' denka könn, mōrom se komm — aber des Weibsbild hōt se et atreiba lau'. s sei jō gar ner em Haus, hōt se gsait, vo' was mer denn da' Heiner verhalta ond em a'schaffa woll, was der Dokter verordnet häb — ond

fürzom', ällaweil hót se se ens Heiners Haus z schaffa gmacht.

Der Heiner hót natürle ner dâvo' gmerkt, bis er wieder zua-n-em selber komma-n ischt. Nô, wi-a-n-er d Stangabronnabäure zuam aischtamöL an sei'm Bett gseha hót, hót er se. no a'gudt ond ner gsait. Nôche hót er amöL d Schuschterfriedere gfrôgt, was denn d Stangabronnabäure woll? „Wa wurd se wölla?“ hót dui gsait, „Chrischlichs Mitleid ausüaba, sait se.“

„Ond mô ischt denn s Bäbele?“

„Dui ischt et dô.“

„I hau' se aber doch gseha!“

„Ha, des wurd em Fiaber gwä sei!“

„Aber gschrieba hót se doch?“

„I woîß ner dâvo'.“

„Ganget zuani Schreiner ond frôget.“

D Schuschterfriedere ischt ganga ond wieder komma ond hót gsait, noi', s sei loi' Briaſ dô! Ond nô am andera Tag ischt der Schreiner selber rüber komma ond hót gsait, er wiss et, was des sei mit em Bäbele, se lass gar ner vo' se haira, s gfall em selber et. Ond der Heiner hót gar ner maih gsait ond gfrôgt, ond mô s nô besser mit em ganga-n ischt ond er hót aus-em Bett dürfa, nô ischt er als so tiassennich ommergesessa, hót fascht loi' Red ond Antwort gä, ond oft no so vor se anebrommlet.

D Stangabronnabäure aber, dia ischt all Tag amöL derher komma, s oimöL hót se a Süpple brôcht, nô a' Stückle Floisch, nô a' Budele Wei', nô ebbes anders, ond wann er au der Heiner kaum groß Dank gsait hót, se ischt ällaweil wieder komma.

Ond em Fleck dō hent d Leut glachet ond ällerhand gschwäzt über dia Zwee. Weil aber der Heiner se alles vo' der Stangabronnabäure hót gfalla lau', au seit er wieder bei-n-em selber gwä ischt, nô hóts bald em Fleck ghoiha: s müaß em Heiner doch anderschter komma' sei' ond daß er doch besser anekomm uf-em Stangabronnahof als mit deam arma Bäbele.

Ond wia der Heiner wieder gsond gwä ond a'fanga wieder sei'm Gschäft nôchganga-n ischt, nô hót als wieder s oi' oder s ander bei-n-em druf na' tupft, des sei aber doch et schö' vom Bäbele, daß se se gar ner om en a'gnomma häb über sei' ganze Kra'ket, ond oine vo' der Stangabronnabäure ihre Mägd' hót en amdl gstellt uf em Acker duß ond hót em gsait, se häb en Briaf friagt von ihrem Schaz, mò bei de Reiter z Stuagert sei, ond der häb gschrieba, s Bäbele woll en der Stadt heira, en Wachtmoischtter vo' dem selle Regament, mò ihr Schaz sei.

„Halt dei domms Maul!“ hót der Heiner gsait, aber nô ischt er hoi' gfahra ond en der hella Wuat ommergloffsa em Haus ond em Stall ond nô ischt er ens „Lamm“ ond hót tronka ond en Rausch hoi' bröcht ond am andera Tag ischt er en der Stangabronnabäure Haus ganga, ond was se dō mit nander gschwäzt hent, hót neamerz ghairt, aber nôch a' paar Täg send se mit nand zuam Pfarrer — ond nô isch gwä, wia s gwä ischt.

D Frau Professere hót em Herr Pfarrer glei uf sein Briaf he' wieder gschrieba ond hót em z wissa to', wia s mit-em Bäbele stand ond ob se dui Sach et noh ens Neine brenga lass. Ond der Herr Pfarrer hót da' Heiner nohmöl komma lau' ond hót em den Briaf vorglesa ond hót em ens Gwissa gred, er soll se's doch nohmöl überdenka. Aber der

Heiner hót gsait, des batt¹⁾) ezet álles ner maih — wa'mer so hartherzich sei' könn wia's Bäbele, nô könn mer oï'n et gern hau', ond bei em seis au rom mit em Gernhau' seit seiner Kra'ket, des häb er et verwenda könna — ond ezet könn er et au dô nohmól zrud, er tät jô s Gspött vom ganza Flecka wear! Ond ez solls halt gau' wia's gang, em sei álles oï's.

Der Herr Pfarrer hót gsait, mòrom er aber au mit neamerz Gschleitem gschwätz häb, er hätt jô zua-n-em komma könna ond em d Sach saga ond er hätt se könna onder der Ha'd schau' lang bei der Frau Professere erkondicha. Aber der Heiner hót gsait, dô sei er et so keck gwä ond vo' so Sacha schwätz mer au et gern, ond ezet sei s halt so.

Ond so isch gwä, ond so isch furtganga, wia s hót furtgau' müasha. Der Heiner hót Hauhzich ghet mit der Stangabronnabäre ond ischt wieder a' Hofbauer gwä, ond s Bäbele ischt bei der Frau Professere em Denscht blieba ond ischt áll Tag stiller woara, hót ihr Gschäft tau', aber so'scht et ghaua ond et gstocha ond der Frau Professere ischts oft reacht angscht om se gwä, was au noh werda woll.

Ond wieder nôch-ema' Vierteljöhr ischt s Bäbele amol wieder en d Stub zur Frau Professere komma ond hót wieder en Briaf vo' seller Kameräde en der Ha'd ghet ond hót uf den Briaf deut ond ner gsait weder:

„Er haut se!“

— — —
Mer wöllets voll kurz macha! s ist a' trauriche Gschicht!

¹⁾ nüze.

s Bäbele ischt bald nôch dem weit furt en's England nei', uf London. A' Mädle vo' der Frau Professere hôt selt nei' gheiret, ond mit dear ischt se furt übers Wasser. Se hôt gsait, se müaß en a'-n andere Lust. Aber dô drüba hôt-ers doch au et reacht gfalla wölla; se hôt Hoi'waih ghet wia mers no hau' ka', ond hôt ällweil gsait, en deane Neabel dô, dô kô't mer ganz tiassennich wearra. Aber wann ihr Frau gsait hôt, ob se et wieder raus ond hoi' wöll, nô hôt se doch da' Kopf gschüttelt ond gsait: noi', s sei voll oi' Deng!

Der Heiner aber — jô dear hôt se ghaua, sei' geiziche Schlampell ond se hent vom dritten Tag a' gleabt wia Kaz ond Hond. Ond bald hôt er au wieder s Saufa-n a'gfanga, weil-ers dahoi't nemme ausghalta hôt — ond blos a' paar Jôhr isch a'gstanda, nô hôt mer em Stangabauraheiner verganget grad wia dôzmôl em alta-n Oberbaura. Ond om de selb Zeit hôt onser Herrgott a-n Ei'seha ghet ond hôt d Stangabronnabâure an-ra' hizicha Kra'ket sterba lau' ond der Heiner hot a'-ma' schöna Tag zsemapackt ond ischt au übers Wasser, aber et uf London. Er ischt nôch Amerika.

Ond Jôhr send wieder romganga ond Jôhr! D Frau Professere hôt Enkela ghet ond dia Tochter vo' London ist als mit-en außer komma-n uf Stuagert ond s Bäbele ischt ällamôl au mitkomma. Aber über Stuagert ischt se et naus ganga ond en ihren Flecka hôt se gar nemme wölla.

Ond wieder send Jôhr romganga und dia Enkela' vo der Frau Professer send grauß woara, aber s Bäbele isch älleweil bei ihrer Frau en London blieba. Se hâb se ejet akklemitasirt, hôt se gsait, ond so lang se ihr Frau braucha

könn, gang se et von-er, wann se au koi' huirichs Hässle
maiñ sei; ond en dem England dren dô mög se halt ihr
Frau au et alloi' lau' onder dene fremde Leut.

s ist a' zarts Fraule gwä, dia Frau Adlenâ, aber
s guat Herz vo' ihrer Muater hôt se gerbt ghet. Ond
wann so-n-a'-n armer Teufel vo' Deutschland en dem London
en Naut komma-n ischt, ond er hôt vo' der Frau vo dem
Môler, mò d Köniche gmölt hôt, vo' der Frau Adlenâ
ebbes ghairt ond ischt zua-n-er ganga, nô hôt se-m gwîß
gholfa, so guat se hôt könna. Daß se oft au a' Lomp
für Narra ghet hôt, des hôt se et irr gmacht.

Oft ischt se au en des deutsch Spital ganga, mò en
dem London ischt, ond hôt noch dene arme Tropfa guckt,
mò selt glä send. Ond so hôt se au amol oin selt troffa,
en grauña starka Kerle, aber arg azehrt; ond an-era'
arga Kra'ket ischt er glä, ond der Dokter hôt gsait, weit
vom Sterba werds bei dem nemme sei'. D Frau Adlenâ
hôt au mit-em gschwäzet ond hôt-en grôgt, mò-ner hear sei
ond ob se-m et en Brief an seine Leut schreiba soll? Er häb
neamez maiñ uf dear Welt, hôt-er gsait, hear sei-n er vo'
deam ond deam Flecka em Württembergischa. Wia d Frau
Adlenâ den Nama' hairt, gucket se uf — se hôt jô gwîßt,
daß vo' sellem Flecka au ihr Bäbele ischt. Wia-n-er
denn hoîß, frôget se. „Heinrich Ilg!“ Ond wia-n-er denn
dôher komm? Wia-n-er herkomma werd? hôt-er gsait, wia
viele Andere au!

Er sei uf Amerika, weils-em dâhoi't so schleacht ganga
sei, wias no oi'm gau' könn, aber en Amerika sei ems au
et besser ganga. A' Weil häb er Glück ghet ond häbs zua
ebbes brôcht, aber s sei koi' Sega druf gwä ond s sei

bald wieder abe ganga ond am End sei er wieder so arm gwä wia a' Kircha'maus. Nô häb er au wieder s Hoi'waih kriagt ond er häb dächt: ezet gang er halt wieder hoi' ond wann er no dahoi't sterba könn, nô sei em s ander o' Handel'). Ond so sei er uf a' Schiff als Küchelneacht ond mit deam Schiff sei er uf London komma. Von dô häb er weiter wölla nôch Deutschland nüber, nô sei er aber verfranket ond dô lieg er ezet. Sterba müaß er, des gspür er, ond s sei em a' reachter Troscht, daß er no noh ebber aus em Schwôbaland gseha häb. Ond er dank halt reacht schö', daß so-n a' fürnehme Frau se mit em agä häb.

D Frau Adlenâ sait, wann se reacht wiß, nô sei ihr Magd, mû schau' lang bei-n er dean, aus em gleicha Flecka wia er. Se hoiz Barbara Bernegger.

Bei dem Nama fährt der frank Ma' uf ond macht graufhe Auga na' ond nô legt er se wieder nom ond macht d Auga zua, ond grad kommt der Dokter ond sait, mer soll-en en Ruah lau', s gang schlemmer, so viel er seh.

D Frau Adlenâ göht hoi' ond denkt loi' Args, weil se vo' äll dene Sacha zwischa-m Heiner ond em Bäbele entweder nex gwist oder da' Nama' vom Heiner wieder vergessa ghet hôt. Wia se aber hoi'kommt, verzählt se ihrem Bäbele vo' dem franka-n Amerikaner. Dia gudet uf —

„Wia hoist er?“ frôget se.

„Heinrich Ilg!“

„Herr Jeses, des ischt der Heiner!“ sait se.

„Kenntsdht du ihn?“ frôgt ihr Frau.

„Schätz wol,“ sait se. „Därf i nôch em guða?“

¹⁾ gleichgültig.

D Frau Adlenâ sait, morga könn se mit-er ens Spital
fahra. s Bäbele aber sait:

„Aber wenn er ällsmittelschft stirbt?“

Ond nô send-er de helle Träna d Backa-n aber glosfa.

Ond nô hôt ihr Frau gudet ond hôt weiter gfrôget,
ond nô hôt s Bäbele a' halba Stond lang ihrer Frau
verzählt, ond wia se fertich gwä ischt, nô hôt d Frau
Adlenâ glei wieder a'spanna lau' ond ischt mit-em Bäbele
ens Spital gfahra.

Ond dd ischt se gstanda ans Heiners Bett, ond dear
hôt kaum noh d Auga-n ufgmacht. Aber wia-n-er s ufgmacht
hôt, hôt er doch s Bäbele a'guet ond a'guet ond zmôl göht
a' Liacht uf sei'm Gsicht uf.


Ond nô sait s Bäbele ner weder:

„Heiner, ka'scht mer verzeiha?“


Ond er sait ner weder:

„Ond du miar au, Bäbele?“

Ond nô hôt oi's em Andera d Ha'd gä, ond nô hôt
se der Heiner wieder nom glegt, d Auga send em wieder
zuagfalla ond er hôt se nemme ufgmacht.



s End vom Piaule.



Kommet hear, ihr Mädla-n ond Buaba, ond passet
uf, was-e ich¹⁾ geh verzähl! Für Kender ond so halb-
gwachsene Krotta', mō freile emmer de nāsa'weisesthe send,
ischt dia Gschicht et, und luschtich ischt se au et, aber
euch schadts gar ner, wann-er se a'hairet ond s ich henter
d Auhra²⁾ schreibet, wia s Schmidbaura sei'm gozicha³⁾
Se'd, em Dorle ganga-n ischt. Nämlich grad vo' dem
Dorle will-e ich verzähla.

Ja des Dorle! Zwör se hōt se älls liaber Doro-
thea hoīha lau', wia mer se au täust häb; „s Dorle“,
des hōt so greng to', ond greng ischt se gar et gwä. Noi',
a' netts Mädla, daß s Herz oi'm em Leib glachet hōt,
wa'-mer se no a'gudet hōt mit ihre lange braune Böpf,
ihre schwarze Auga, mō glänzt hent vor Lebensluscht, ond
dem Schelmagruable em Kenn. Ond wenn se glachet hōt —
mei', ischt des a' Lach'a gwä! Oô hōt o'ser Herrgott selber
a' Freud dra' ghet. Ond gsonga hōt se da' ganza Tag
enwährend em Schaffa', älles, was er komma ischt, s ganz
Ghangbüchle durch ond nō au weliliche Liader, ond ganz
hsonders oft oi's — i hau' s amdl selber von er senga
haira — ond des hōt ghoīha:

¹⁾ euch.

²⁾ Ohren.

³⁾ einzigen.

Ond mei' Herz ischt so lusticht,
Drom seng e so froh,
Daß d' Leut älls no froget:
Morom sengst denn a'so?

Morom wure senga?
Weils Herzle so froh —
Ond wär s' Uier grad so,
Er sänget grad so.

Mi dructt ner, mi plogt ner
Ond mir tuat ner waih,
I schaff halt ond seng halt —
Was wöllet er maih?

Ond seng e zur Arbeit,
No goht se aischt reacht,
Ond so wia-n-i schaff,
Schafft koi' Magd ond koi' Kneacht.

Ond mei' Herz ischt so lusticht
Ond mei' Herz ischt so froh,
Traleri, Tralerala,
Ond i' be' halt a'so!

s' ischt bigott a' Gottesgab, wann Dine so senga ond
jubelira ka'. Ond s' Dorle hdt s' Reacht derzua ghet. An
dem Mädle ischt alles gsond gwä, der Leib ond d' Seel,
ond jedermann hdt se gerä ghet, ond en der Nöchberschaft
von ihrem Haus hdt mers gar et andersch't gwißt, weder
daß mer vom Morga bis Obed s' Dorle senge hait. Ond
wenn se amöd furt gwä ischt ond mer se et ghairt hdt,
nô hent älls d' Nöchbaura gfrögt: „No' was isch denn
heu't? Md ischt denn s' Sengdorle? s' wurd er doch ner sei!“

Am gernschta von alle aber hót se s Schulze Jörg ghairt. Et daß er grad arg mit der Musik bhaft¹⁾ gwä wär, — er hót bärlich²⁾ a' Trommel von-ra' Trompet onterschoida könna, und hót schau' en der Schual alle Liader bloß en drei Tö' gsonga. Aber des Senga von dem Dorle hót em ganz bsonders gfalla, ond weil er koi's vo' dene Liadla hót bhalta könna, nô ischts em fürkomma, wia wann se alle Täg wieder ebbes Nuis seng ond er hót alle Täg de alte Liadla mit der gleicha A'dacht ghairt. Zwischa Senga ond Senga-n ischt aber au a'-n Unterschied, ond wann so s Herz sengt wia beim Dorle, nô packts au d Herz.

s Jörgs Haus ischt grad nüber vo's Schmiedbaura sei'm gstanda, ond — desch't merkwürdig gwä — s Dorle hót je maih se gsonga hót, je maih gschafft. Beim Jörg isch omkehrt gwä: je maih s Dorle gsonga hót, om desto weniger hót er gschafft. Ond manchmöl hót em sei' Schwester, d Ann, müsha en Puff gä, daß er wieder an der Arbet en der Schuier weitemacht.

No', des Deng wär guat gwä. Mer woiz nô schau', was wurd, wenn oiner als vom Schaffa ushairt ond us-ema' Mädle ihr Senga loset.³⁾ Ond s hót au alles gstemmt, ond d Alte hättet schäzwol au nez derwider ghet, ond d Jonge aisch't reacht nez. Denn, daß es no sag, s Dorle hót manchmöl au mit-em Senga usghairt, wann se da' Jörga' gseha hót, aber nô hót se glei wieder a'gsanga. Narr, wenn so a' rei's o'schuldichs Mädlesherzle a'fangt,

¹⁾ mit der Musik behastet, musikalisch.

²⁾ kaum.

³⁾ lauscht.

a' bisle z klofsa ond z bockla, nô sengts aischt reacht aus
so-ma' Herza raus — wenn d Erd sich regt ond der Gscht
en de Bäum ond Büsch a'sangt z treiba, nô sanget au d
Vögel a' z senga.

Om selle Zeit rom — s Dorle mág a' Jöhra zwanzg
alt gwä sei — hót mer en derâ Geged a' Eisebah' baut,
ond s send älls Herra komma ond hent a'fanga messa
ond rechna. Ond em Flecka selber hót so a' jonger En-
schenir¹⁾ s Quartier nemma müasha. Aber dô ischt guater
Röt teuer gwä. Des gozich Wirtshaus mit dem gozicha
Stüble hót em gar et gfalla, er frôgt drom, ob denn
nergeds sonscht em Flecka a' Stüble z kriaga sei. Beim
Schmidbaura gäbs oi's, sait mer. Er gôht nom zua-n-em
ond bseichts, s hót em aber au gar et gfalla wölle, ond
er will schau' wieder naus gau', dô haift er s Dorle
senga. Er gôht ans Feaschtr na', des gôht grad uf da'
Hof nonter, ond gucket naus, wer denn dô so schö' seng,
ond sieht s Dorle so von der Seite stau', wia se mit
naufstonene Aermel ond Röck s Kübelgschirr puzt.

„Wer ist denn das, der so schön singt?“ frôgt er d
Schmidbäure — der Schmidbauer selber ischt et dâhoimda
gwä. Dia mei't, s sei Spott vo' dem Stadlherra ond sait:

„Ja, nemmet Se s et für o'guat, mei' Dorle sengt
da' ganza Tag, ond wenn se des et haira könnet, nô
müahet se halt aimez²⁾ anderscht noch-ema' Loschi gucka.“

1) Ingenieur.

2) irgendwo.

„O, es gefällt mir ganz gut!“ sait der Herr freundlich und brommlet für sich: „Donnerwetter, ist das ein Mädel!“

Nô sait er zur Schmidbäure, s sei reacht, er woll des Stüble nemma, und fangt nô glei am Nômittag a' ei'zroma.¹⁾ s Dorle hôt em dabei gholfa und der Herr Alfred — so, hôt er gsait, soll se en hoîza — hôt so gmoi' und plattdeutsch²⁾ mit'er gschwäzt und glei „du“ zua-n'er gsait, daß s Dorle hôt et gnuag versaga könna, wia freudlich der Herr sei.

Wie der Schmidbauer am Obed hoi' kommt, sait em sei' Weib, wen se em Haus hätet.

Der brommlet ebbes en da' Bart, schwätz nô duffa' mit sei'm Weib — s ischt aber schau' maih gschempst gwä — und kommt nô wieder en d Stub rei'.

„Dorle,“ sait er, „dâ bischt mei' gozichs Kend, und ens Schmidbaura Haus isch noh emmer ehrbar zuaganga. Verstanda, Dorle!“

„Wa meinet Er, Vater!“ sait s Dorle, gôht naus und singt lustich em Haus rom.

Ens Schmidbaura Haus isch noh luschlicher gwä, weder vorher. Der Herr Alfred hôt ällerhand³⁾ gwißt und schwäza könna, und em Dorle ischt s Maul au et

¹⁾ einzuräumen.

²⁾ s. v. a. schwäbisch.

³⁾ allerlei.

zuabachä gwä, ond se hent anander rom ond nom grätz¹⁾ ond em Dorle ihre Auga hent glänzt, wenn der Herr Alfred Obeds hoi' komma-n ischt, ond der hót em Dorle ällamöл mit so eigene Auga nöchgucket. Wenn dia der Vater gseha hätt, er hätt den Herra glei aus-em Haus to', ond s wär besser gwä. Aber der ischt so zuatualich zuam Baura ond der Bäure gwä, daß dia au ner args dentk hent, ond s Dorle hót älla'weil ihre Liadle gsonga, des ischt a' guats Boiche gwä. Amöл send s Dorle ond der Herr Alfred au aufs Heiröta komma. Dô hót der Herr Alfred et gnuag versaga könna, was dia Mädla-n en der Stadt für knüze²⁾ aushausiche³⁾ Denger seiet, ond zua ällem na' so hauhfärtiche Frazza, ond wenn se et halba so schö' ond reich seiet wie s Dorle.

„I därf doch au Dorle sage,“ sait er, ond schwäbelt reacht gmoi’, „s ischt viel netter als Dorothea.“

„Dô freile dürfet Se,“ sait s Dorle, ond der Nam ischt er uf oimöл schö' fürkomma.

„Ja, die Mädla en der Stadt“, macht der Herr Alfred furt, „stolz ond oba'ronter send se, et na'langa därf mer ans. Guck, net amöл so macha.“

Ond er legt sein Arm oms Dorle. Derâ wurd's ganz hoiz, aber se woiz, was se ghairt, drückt em sein Arm weg ond sait:

„Ond bei de Mädla uf-em Dorf au et!“

Ond se gôht naus; aber der Herr Alfred lachet ond sait:

¹⁾ nedden.

²⁾ unnütze.

³⁾ verschwenderische.

„So au net? I will mers merka.“

Des hôt em Dorle arg gsalla: s ischt doch a' rechter Herr, ond was hôt er gsait? Sia sei viel schöner, weder de schö'jche en der Stadt. Ond Geld hôt se jô au gnuag — aber der Jörg! Guck, Dorle, dô stöhrt er drüba en seiner Schuier ond schaut de mit seine guate treuherziche Auga a' — maß daß er Heirestag machet, em Jörg sein Arm brauchst nô et wegzschiaba. Jô der Jörg! Der Herr Alfred ischt halt doch a'-n-a'derer Ma', ond wa' mer am End Frau Oberinschenire werde kö't — mer läßt s Heirestagmacha noh a' Weile gau', kommt Zeit, kommt Röt. —

So send d Woch'a ens Schmidbaura sei'm Haus gar schnell rom ganga, ond der hellsc̄ht Frühäleng ischt komma ond d Schwälbla send romgloga en lustiche Ränk ond hent ihre Neschtla baut ond oi' Pärle oi's grad über em Dorle ihrer Kammer. Ja d Schwalba! Em Frühjöhr kommt se ond bauet a' Haus, wia wann se fescht dösäket, em Herbst aber send se de aische, mō wieder ganget. Guck-en no zua, Dorle, wia se bauet, ond nemm der a' Beispiel an-en. Dô guck derneba der gmoi' Spaz! s ischt loi' so nobler Herr wia der Schwalb, aber er siht fescht en sei'm Nescht, em Sommer ond Winter mit sei'm Weib, ond guat warm hält er s mit sammt seine Zunge! Aber d Schwälbla send halt schöner ond zwitscheret ganz andersch't weder so a' Spaz! O Dorle, mir ischt angscht om de!
Aber dia singt luschtich zuam Feaschter naus:

Ond mei' Herz ischt so lustig
Ond mei' Herz ischt so froh,
Traleri Tralera
Ond i he' halt a'so!

„Du, Dorle“ sait amöd d Ann, s Jörga Schwestern
zua-n-er, „ihr hent aber en gmoina Herra en eurem
Haus!“

„Sell will e moina,“ lachet s Dorle. s hót se
gfroit, daß au de andere Leut des von „ihrem“ Herra
faget.

„Woisch,“ macht dia weiter, „d Stadtmädla müähet
em et arg gfalla.“

„Freile, freile!“ sait s Dorle so ane.

„Dia seiet so stolz ond oba' ra, hót er gsait.“

Jetz fährt s Dorle rom.

„Wer hót des gsait? Zua wem hót ers gsait?“

„Was höscht uf oi'möd, Dorä!“ frogt d Ann, „wer
wurds gsait hau? Der Herr Alfred! Ond zua wem?
Narr zua mir!“

„So zua Dir. Ond nô hót er sein Arm om de
glegt — “

„Jesse, Dorle, möher woischt du des?“

„So, so! Ischt reacht,“ sait s Dorle, ond weiter koi'
Wort. Ond nô dreht se se rom ond gôht hoi'. Wia der
Herr Alfred am Oben hoi' kommt, macht se a' sea'schters
Gicht an-en na'. Der merkts glei ond wia se allo'i' send,
sait er:

„Dorle, was ists? Des Gicht steht dir schlecht.
Komm her, Dorle, verzähl mer, was ischt dir
passirt!“

Ond er nemmt ihr Ha'd. s Dorle schudt¹⁾ se weg
ond sait:

„Frôget se s Jörga' Ann!“ ond gôht naus en d
Küche.

Der Herr Alfred krazt se em Hoor ond brommt:
„Hat die einfältige Gans geplaudert! Aber eifersüchtig ist
sie doch!“

Draufa en der Küche hantirt d Dorâ rom ond Häsa
ond Schüssla wetret zema. Wia der Herr Alfred merkt,
daß se alloi' drenna ischt, gôht er leis naus ond gudet er
vo' der Tür aus zua.

„Wie reizend ihr der Zorn steht,“ sait er so ane,
nd aber laut ond mit so-ma' bsondera Klang en seiner
Stemm:

„Dorle, muafst net bös sei.“

Dia dreht se rom ond rüaft:

„Jô i he'! Sia Romstreicher —“

„No net so arg, Dorle! Was hôt dir die Anna weiß
gmacht. Mei'scht i woll ebbes vo' dera. Sprengt mer
au ema' Spaza noch, wenn mer a' Nachtigall hôt?“

„Wia schö' ers wieder saga ka!“ denkt s Dorle ond
iſch schau' nemme so wütlich. Ond der Herr Alfred macht furt:

„Muescht net alles glauba, was dia Mädla schwäzet!
Se bildet se glei alles mögliche ei', ond wann mer amol
zuafällich neba-n Einer sitzt, nd mei't se glei, wonder was s sei.“

s Dorle gudet auf ond en seine Auga nei' ond dia
milaſet ers a'to²⁾ ghet hau'. Aber se sait doch:

¹⁾ stößt.

²⁾ angethan.

„Iſch au wahr?“

„Freilich, freilich. In eurem ganza Dorf gibts bloß ei' Mädle, des mer gfällt —“

„Ha, fell wär!“ lachet s Dorle ond gucket en so luschtich ond schelmisch a'.

„Ond die bist du!“ sait der Herr Alfred, ond eb se sichs versaha hōt, hōt se en Kuf von em ghet.

„Wartet se, Sia ganz Knüzer!“ sait se, nemmt en Rührloſſel ond jagt en zur Kuche naus. Mer hōt ohnedem da' Schritt vom Baura uf der Stiag ghairt. Ond nō goht se mit-em Gschirr wieder säuberlicher om ond fengt wieder luschtich.

Soll ichs ezet noh weier verzähla, wia der Vogelfänger dia Nachtigall so nōch ond nōch ens Nez glöck hōt? Noh a' Weile hōt er se zappla lassa, aber schau' a'-ma' Fada a'bonda, ond den hōt er länger ond kürzer maſha könna, wia-n-er hōt wollā, ond zleztſchia hōt er en ganz kurz a'zoga ond s Vögele iſcht em Käſich gſessa. Wenn mer aber Vögel ens Käſich tuet, senget se nemme. Ond wia a' paar Woche rom gwā ſend, hōt s Dorle au nemme gſonga. Ond der Herr Alfred hōt furt müaſha, d Vermessenga ſend aus gwā ond er iſch wieder en d Stadt zurück. Ganz ſchnell hāb er aroise müaſha, hōt er ſaga lassa, sei' Gepäck laſſ er hola. Er hōts hola lassa, ond wia alles vollends furt gwā iſcht, nō ſitzt s Dorle en derā Kamer ond hebt d Hā'd vors Gſicht ond jomrei ond heulet, daß en Stoī hätt verbarma könna. Ond wiaß goht em Jomer,

do fallet oi'm oft so Verschla' oi', mō am o'passendschte
send, ond emmer furt hōts er em Kopf romgsommt:

„Mi druct nez, mi plogt nez,
Ond mir tuat nez waih —“

ond dazua heulet se ond jomret se.

Dronta sait d Schmīdbäure zua ihrem Ma':

„Was doch des Dorle an dem Herr Alfred ghanga-n
ischt. Seit er furt isch, sengt se nemma ond losn, wia se,
jezt droba heult.“

„I wur se geh ronterhola!“ sait der Bauer. „Ond
gib acht, wann geh mit-em Jörg Heirestag gmacht ist,
nō ist der Stadtherr bald vergessa.“

Ond nō schreit er nauf:

„Dorle, laß des domm Gheul sei!“

Ond dia sprengt auf, trocknet se d Träna a ond kommt
ra. Still tuet se ihr Arbeit. —

Em Jörg hōt ebbes gfehlt, wia-n-er s Dorle hōt gar
nemme senga haira. Was hōt se? denkt er. Der Stadt-
herr muas̄ er arg ens Herz bacha sei'. Aber s wurd
schau' wieder anderschier wera. Jezet will e et glei komma,
se muas̄ vorher wieder s alt Sengdorle sei', aber nō, am
aischte Tag, mō-n-e se wieder hair, gang e nomm zua-n-er.

Ond er wartet oin Tag om da andera, aber koi'n
To' hōt er nemme ghairt.

„Muascht doch geh nōch dem Mädle gucka!“ denkt er
amȫl a'-ma' Sonntich ond gōht nüber, wia-n-er woiß, daß
er se alloi' trifft.

Richtig sitz se en Gedanka en der grauſa Stuba.
Ond d Obesonn guckt so schö' en d Stuba rei' ond älles

ischt so sauber ond blizblank, wie des Mädle selber, mödô sitzt.

„Guta-n Obed, Dorle,” sait er.

Dia verâchricht ond fährt auf ond wurd fuierraut, wie se sait:

„Guta-n Obed, Jörg!”

„Muâß doch amôl nôch der guck, Dorle. Morôm sengscht gar nemme?”

§ Herz vo’ der Dorâ klopft ond se ôtmet tiaf auf ond seufzt.

„Muascht et seufza,” sait der Jörg, „guck, was gwâ ischt, ischt gwâ, ond sei’ Weib wârescht doch nia woara —”

„So mei’scht?” sait § Dorle so sonderbar.

Der Jörg merkis et ond macht furt:

„I hau’ de emmer gern ghet, Dorle, ond du mi älls au. Ond a’ Weib brauch e ond drom —”

„Halt ei’ Jörg,” sait § Dorle schnell, „frôg me jezet ei!”

„Morôm et?”

§ Dorle sait ner, ond der Jörg macht furt:

„I will jô et pressira. Aber des sag e noh amôl: schlag der den Herra aus-em Kopf!”

§ Dorle schüttlet mit-em Kopf. Der Jörg sait:

„Aisch gestich hôt mer d Ann gsait, se häb en der Stadt dren ghairt —

„Was?” frôgt § Dorle ond zittret.

„Ner args, Dorle. Ner weder daß er a’ Braut gnomma häb, ond aisch a’ reicha ond schöna. Guck, s ischt wia-n-e sag ond emmer zur Ann gsait hau’: Er werdetse häb, hau’-n-e gsait, der nemmt geh bald a’ Weib vo’ der Stadt.“

„Er nemmt a' Weib zo' der Stadt,” sait s Dorle.
„Isch's au wôhr, Jörg!”

„Wia guckesch me so gspässich¹⁾ a’?” sait der Jörg,
„s wurd wol wôhr sei’, d Ann hôt jô älls au uf en
gspannt.”²⁾

„Er nemmt a' Weib vo' der Stadt! Ond was hôt
er mir versprocha?” sait s Dorle noh amôl so für sich
ane. Ond nô schreit se naus:

„Ond i ond mei' Rend!” ond bricht zsema.

„Jesse, was isch des!” schreit der Jörg, ond grad
gôht au d Tür auf ond der Schmidbauer ond d Schmid-
bäure kommt rei’.

„Was hent denn ihr zwoi?” sait der Bauer, ond d
Bäure sprengt zuam Dorle na’ ond lupft³⁾ se auf, ond
dia schlät d Auga so halba-n auf ond macht s nô wieder zua.

„No’ was isch, Jörg?” frôgt der Bauer nô amôl.

Der Jörg aber sait ner weder:

„Frôget Euer Mädle selber!” ond gôht zuam Haus
naus.

Ens Schmidbaura Haus isch gwä, wie wenn der
Laud ei’kehrt wär. s Dorle schleicht no so rom ond ver-
drückt d Träna, ihr Vater gucket se et a’, schwätzt koi’
Wort mit-er, ond d Muater heult älls au so ane. Amôl

1) sonderbar.

2) gehofft.

3) hebt.

ziaht der Schmidbauer sein nuie Rock a' ond fährt en d Stadt. Wia-n-er aber hoi' kommt, schmeißt er d Goisel ens oi' Eck ond da' Huat ens ander ond schempft:

„Lompa sends, elende neruziche Lompa. Was hōt er gsait? „So eine Bauerndirne passe nicht zu seiner Frau.“ So, so! Mei' Mädle isch so guat, wia dia en der Stadt. Ond Geld hōt er rauszoga. Bhalt dei' Senda-geld, Tropf elender! Geld han-e gnuag, aber Schand noh maih.“

Ond nō sprengt er auf ond packt s Dorle am Arm ond schüttlet se ond schreit:

„Zuam Haus naus ghairſcht,¹⁾ schlechts Deng. Hätt' guate Luscht ond tät de heut noh nausjaga. Marsch, en dei' Kammer nuf! I will de gar nemme seha! Ond du, Muater, du hōschst en ei'zei'selt. Mei' ganz Haus isch mer verkleidt,²⁾ ond onter d Menscha māg e au nemme — se gonnet mers zuam Toil, dia schlechte Gsella!“

Ond nō sitzt er uf da' Ba'k na' ond gucket uf da' Boda na lang lang ond schwätz ner. Endlich sait er:

„O Dorle, Fessa hätt e auf de baut, ond jezet tuascht mer des a'! Mit Chra han e wölle en d Gruab fahra, jezt muas e mit Schanda leaba!“

Au der Jörg isch ganz verstört rom gloffa. Wenn er em Dorle begegnet isch, hōt se d Auga uf da' Boda gricht, wia wann se ebbes verlora hätt, ond der Jörg isch mit-ema' leise „Grüaß Gott!“ an er vorbeiganga. Ond oft hōt er er nōchguckt ond so für sich ane gsait:

¹⁾ gehörst du.

²⁾ entkleidet.

„Schad om se! Ond sia hōt aischt de kleiner Schuld,
aber er!“

Ond er ballt sei' Fauscht ond sait:

„Wart no, wenn du noh amol en Fleck konntsch!“

Ond nō gōht er wieder still seiner Weg. Er ischt
emmer a' ruhicher Burscht gwā ond s hōt-en et leichile
ebbes aus-em Concept brōcht. Aber wann er au no von
fern dra' denkt hōt, was für a' Elend der Mensch über
ehn ond s Dorle ond ihre Eltern brōcht hōt, nō hätt ern
könnce uf der Blatt verreisza.

Aber was hent den en der Stadt drenna dia vier
Baura kemmret! s send jō bloß Baura, denket dia gott-
verlassene Tropfa en der Stadt! Moinet Er, dia häbet et
au a'-n Ehr, et au a' Herz em Leib! Moinet Er, so a'
Vater, wia em Dorle der ihr, könn et au em ennerste
Herza iroffa werda ob der Schand vo' sei'm Mädle, ond
der Jörg spürs et au, om was Er en brōcht hent! Ond
s Mädle selber — ach was, Ihr lachet ond der Teufel sait
Amen dazua. Ond des arm Mädle, mō-n-Er verführt hent!
Ja verführt! Geltet des wöllet Er et haira. Wia-n-Ers
gmacht hent, ischt oi's, to' hent Ers. Ihr send schuldich.
Ond sell dürfet er glauba, s Elend von so-ma' Mädle, des
ganz Hauswesa, mō-n-Er he' gmacht hent, ond — lachet
no, Er werdet amol au nemme lacha — s Herzwaih vom-a'
Burscha wia-n-em Jörg — Ihr hents uf em Gwissa ond
dō liegts ond drückt Ich. Ond wenn Er d Ha'd vom
schö'schta Stadtfräule drucket ond Er Eurem Weib en ihr
sei's Gsichtle sehet — des grob Bauramädle stöhrt ällamol
zwischa-n Euch ond Eurem Schaz oder Weib, ond ganz
zfrieda-n ond glücklich werdet er uf dera Welt nemme.

Oder ka' sei¹⁾) Er brengets na' ond vergesset de ganz
Gschicht — s wächst jö, wia-n-Er saget, über älles Gras —
ond Er leabet glücklich, was mer so hoiht, ond brengets
zua ebbes, ond d Welt lobt Jch ond ehrt Jch, weil se et
woiß, was für Tropfa-n Er gwä send, ond dias wisset,
send vielleicht em selba Spital frank gwä, zucket d Achsla
ond schwätzet ebbes vom jugedlicha Bluat ond ema' leicht
verzeihlicha Fehlritt, mös doch gar ner anderschters gwä
ischt, weder a' goitlaus Spiela mit Menschaglück ond
Bauramädlesehr ond de böse Lüscht ond Begierde vo'
Eurem Herza. Ond sonne solls guat gau' en dera Welt!
Ci jo schlag doch! Aber noi', halt! En der andera Welt?
Meinet Er o'ser Herrgott mach amöd en Unterschied zwischama'
Herra aus der Stadt ond so-ma' Bauramädchen? Mö
de graizer Schuld ist, dô legt er d graizer Ströf he', ond
vielleicht hót er schau' lang dene Baura ihre Senda ver-
geba, wann er über Euch mit-em Gricht kommt.

s ischt om d Weihnachtsfeiertäg rom gwä. A' kalter
Dezemberwe'd ischt über da' Kirchhof na' gstricha, ond dô
hót der Totagräber a' Gräble gmacht. Ond nô hent
d Kender vors Schmidbaura Haus gsonga, ond drenna
ischt s Dorle a'-ma' kleine Särgle gstanden ond s Herz
hót er waih to'. Dô isch glega des Würmle, taut ond
kalt, ond hót nausmüacha ens donkel Grab nei'. s ischt
gwä mit dem Re'd wia mit em Sonnaschei' em Winter:

1) vielleicht.

faum guckt d' Sonn aus de Wolska raus, nô schlüpft se au' schau' wieder nei'. s Dorle ischt ghanget an dem arma ke'd mit Leib ond Seel, ond noch langer Zeit s aischtmôl ischt wieder so ebbes wia a' Sonnenstrahl über ihr Gsicht he'gsloga, wann se des zappelich ond wuselich Deng a'guckt hôt. Ond jezet noch a' paar Wočha isch taut, ond se tragets naus. Am liabschta wär se au mit ond hätt se nonterscharra ond sich ond ihr Schand zudecka law'.

Wia se des Särgle zuar Tür naus trarget, will se au mit. Aber ihr Vater sait:

„Mädle, bleib dô! Bei dem Wetter!“ s ischt s aischt¹⁾) quat Wort gwä, mô-n-er-er seit viel Wočha gä hôt.

„Dei' Tod könnts sei!“ sezt ihr Muater derzua.

„Ond was wärs nô?“ sait s Dorle und will mit. Aber se lässt se et furt, ond se stöhrt am Fenschter ond gucket der Leicht noch, ond vom Hemmel ronter hôts gschnia, was hôt verkönna. Träna hôt se koine ghet ond ischt a' paarmôl bloß zsemagschauderet, wia wann ses friera tät.

D' Leut send wieder hoi' von dera Leicht ond a' paar Täg nocher hôt koi' Mensch maih em Flecka an des Gräble denkt.

s Dorle aber sitzt emmer noh dô ond guckt en s Weiter nei'. Ond wia grad der Vater ond d' Muater dussa gwä send, sprengt se auf ond gôht wia se a'to²⁾ ischt naus ond nüber auf da' Kirchhof. Dô ischt schau'

¹⁾ erste.

²⁾ angezogen.

älles vom Schnai¹⁾ zuadeckt gwä ond mer hót bärich nôh gseha, mò des frisch Gräble ischt. Ond emmer maih Schnai ischt vom Hemmel aber²⁾ gfalla en grauße dichte Flocka ond hót älles vollends zuadeckt. Ond s Dorle hót älls wieder da' Schnai weg gwischet ond zletschta gar nemme gwißt, was se tuet. Ond der We'd hót den Schnai zsemagfegt ond nauftrieba en des Eck, mò des Gräble gwä ischt, ond s Dorle hót emmer schneller gschafft, daß er wieder weg komm' ond gwuhlet³⁾ em Schnai ond uf oimol fangt se a' z fenga:

„Mi drückt ner, mi plogt ner
Ond mir tuet ner waih!“

ond bricht zsema über dem Gräble. Ond der Schnai deckt weich ond sacht sei Fiederabett über se ond der Sturm, mò emmer ärger wora-n-ischt, fengt s End von dem Liadle.

Derhoimdâ hót mer se gsuacht ond gsuacht ond endlich uf-em Kirchhof gsonda. Dô liegt se wia taut. Se traget se rei' en d Stuba ond brenget se au wieder ens Leaba. Aber dia schwarze Auga hent ganz anderschter glänzt, weder vorher — oh des ischt a' Glanz, der oi'm waih tuat; der kommt et vo'-ma' luschticha Herzta ond ema' hella Verstand. Mò der Glanz amol ischt, dô ischts em Menscha dren Nacht, fea'schtere Nacht, ond vom hella luschticha Tag, mò vorher dô gwä ischt, ischt grad noh des letscht Liachtle en de Auga hanga blieba.

1) Schnee.

2) herunter.

3) gewühlt.

Nôch-era' langa Kranket ischt s Dorle wieder rom-glosa; am liabscha aber ischt se droba glessa'n en dem Stüble ond hôt beat. Was? hôt se selber et gwîst ond hôt mer maischens et verstanda, weil se alles so a' bisle gsonga hôt, bloß amôl hôt se ihr Muater saga haira: „Und vergib uns unsere Schulden, wie wir vergeben unsern Schuldigern!“

Bo' dem was em Flecka vorganga-n ischt, hôt se ner gwîst ond ner wölla, au ner, wia nôch a' paar Jôhr d Eisebah' zuam aischtamôl am Dorf vorbei ischt ond alles Zuh! gîchria hôt. Desch't a' Fesch't für da' Flecka gwä!

Am nuia Bah'hof send d bürgerliche Collegia' gstanden ond hent dia Herra vom Bauamt begrüßt ond en en Trank botta. Ond der halb Fleck ischt derbei gstanden. Der Jörg, mô ällsmittelsch¹⁾ Obma' vom Bürgerausschuß mora-n-ischt, hôt älls dene Herra da' Pokal gefüllt ond botta. So streckt er-n au amôl oi'm he', ond wia der d Ha'd herstreckt ond en nemma will, guckt en der Jörg näher a' — s ischt der Herr Alfred. Dem soll er en Willkommtronk biata? Noi', tausedmôl noi'! Ond de ganz Wuat, mô-n'er gega-n ghet hôt, kommt em uf oi'-môl rauf, ond statt daß er em da' Pokal en d Ha'd gibt, nemmt er-n ond schlät-en em ens Gsicht ond schreit:

„Dô hent Sia, was Ehne ghairt.“ Der Herr Alfred fällt hintersche²⁾ na, über d Sto'i' nonter ond onter da' Zug. Ond der tuat grad en Rück. Nelles schreit zsema. De Dine packet da' Jörg, mô ruhich dôstöht, ond de an-

¹⁾ inzwischen.

²⁾ rückwärts.

dere ziahet den Inſchenir grad noh reaht raus, eb s
em ans Leaba ganga-n iſcht. Aber sein Arm hōts ſchau'
gfaſt ghet ond hōt en agriffa. Se hent-en en da' Fleck
nei'traga' wölla, aber er wehrt en, ond fo tent fe en en
Zug nei' ond mit dem fährt er en d Stadt. Dō hent-em
dia Dokter da' Arm vollends agſchnitta ond gsait, s müaſ
guat gau', wann er mit-em Leaba davo' komm. Ond er
iſcht dervo' komma, aber sein Denkzettel hōt er fürs ganz
Leaba ghet. Des hōt freile em Dorle neꝝ gholſa; dia
iſcht heu't noh fo', wia nōch ihrer Kranket, ond der Förg
hōt a' paar Wocha ſiza müaſe ond hōt nō ſei' Säſhle
verkauft ond iſcht en en andera Fleck zoga. D Hōr vom
Schmidbaura ſend vor der Zeit weiß woara, ond d Bäure
laufſt no fo wia-n-a' Schatta em Haus rom — elend ſend
ſe alle vier.

So, Buaba-n ond Mädla, des iſcht dia Gſchicht. Ond
ezet lachet er mer nia maih über des gſpäſſich Mädle,
mō älls fo an der Eifebah' na' lauft ond ällameil vor fe
ane ſommſet ond tuat, wia wann fe ebbes ſuacha tät; er
wifſet jezet, wer fe iſcht. Hent erß ghairt?

Des Räpple.



1.

Vom Bergemer Hof aus hót mer am schö'scha em ganza Fleck nüber gseha auf da' Wald, mo die mächtiche Dich¹⁾) über dia Tanna ond Eschpa ihre broite Zweig nei'gstreckt hent, wia der Bergbauer mit seiner grauha Gfalt ond sei'm Geldsack über dia kleine Baura nei'gudt ond nei'gschwätz hót, wenn er mit-en em Wirthshaus gseffa-n ischt.

Sa der Bergbauer ond sei' Weib — so a' Geld ond so a' Hof ond so a' Weib ond sotte Kender, do muß s Glück Juh! schreia s ganz Jöhr! Bigott s hót gschria, a' paar Jöhr lang gschräria, aber ezet?

Düba überm Wald wetterloichnets,²⁾) ond wia Sto'i' liegts auf de Menscha, ond doch ischt d' hoiz Julisonn schau' lang nonter gwä ond am helle Obedhemmel send d' Sternla rauftkomma. Durchs offa Hoftor fährt em scharpfa Trab a' Heuwaga rei', des Bergele ruf zuar Schuier nom, ond oba uf dem Waga sitzt a' K'e'd, en Strauß en der Ha'd, ond lachet ond klatscht en d' Hä'd, wias so tapfer gđht, ond streckt den Strauß zua oi'm vo' dene Feaschter nauf ond schreit:

¹⁾ Eichen.

²⁾ wetterleuchtet es.

„Guck, Muaterle, was i für Bloma hau'! Dia kriagscht
älle du, ond," sezt s̄chnell derzua, „der Wilhelm au
dine!"¹⁾

An dem Feaschter, zua dem des Kēnd, s̄ Bergbaura
Mariele, nauffschreit, stōht a' jong's Weib, noh en de
zwanzga. U' klei's Kē'd hōt se uf-em Arm ond guckt
nonter en da' Hof, mō der Mārte, der Oberkneacht, s̄ Re-
gement führt ond fürs Alada²⁾ sorgt. Aber se hōt et
glachet, wia s̄ Mariele rausfräst, ond ihre Auga, mō
hätet eigentlich glänza solla vor Glück, hent gar traurich
auf dia Leut em Hof nontergucket. Ord wias düba am
Wald wettergloichnet hōt, so hōts au a' parndl über des
Gſicht von der Bäure fenschter anegleuchtet, wenn der
Mārte zua-n-er rausgschria hōt ond gfrōgt, wia mer des
ond sell macha soll.

„Machs wia dā witt!" rüast se na ond sezt nō für
sich derzua:

„Was woiß i? Er ischt der Bauer. Aber mō ischt
er heu't au wieder?"

Ond nō guckt se mit-ema' scharpfa Blick auf d Strauß
na, dia mer a' halbe Stond weit gseha hōt. Was suacht
se? Ihren Ma'. Aber vo' dem ischt weitrom ner zseha,
ond se bleibt am Feaschter steha wia anebannt.

Dā zupft se ebbes am Rock, ond wia se sich omdreht,
nō stōh: ihr Mariele dā ond streckt er da' Strauß na'.
Se will en nemma, aber s̄ Mariele zieht en zruck, nemmt
da' Strauß ausanander ond sangt a', zwei draus z macha,

¹⁾ einige.

²⁾ Abladen.

da' oina für d Muater, da' andera für da' Wilhelm, den
d Muater emmer noh uf-em Arm ghet hót.

„Ond was friagt nô der Vater?“ frôgt se.

s Mariele gucket se a' Weile a' ond sait nô:

„Vater et dô! Furt, älla'weil furt!“

Dô kommt a' Trän aus-em Aug vo' dem Weib raus,
se drückt ihr klei's Re'd an se, gôhi nô mit hoide en d
Kamer nei', mô d Bettstatte vo' dene zwoi Kender gstanden
send, ond tuats ens Bett. Nô kommt se wieder raus, zen-
det s Liacht a', richtet da' Tisch fürs Obedbrot, trait d
Schüssela-n auf ond fangt a' Grombira z schäla. So älls-
gmach kommt au d Kneacht ond d Mägd rei', zletschta
der Märte, ond fizet ane. Der ganz Tisch wird voll,
bloß der Blaz oba, mô der Bauer na'ghairt, ischt leer.
Gschwätz hót mer et viel übers Effa, bloß der Märte hót
a' paarmôl so gspässich zur Bäure naufgucket ond a' paar
Wörtle gsait, aber dia hóts kaum ghairt. Wia s Effa
fertich ischt, ond d Kneacht ond Mägd naus send, ond
„Guat Nacht!“ gsait hent, bleibt d Annemrei — so hót
d Bäure ghoîsha — noh a' Weile an ihrem Blaz sitza,
d Hâ'd auf-em Schoß zsemaglegt, ond gucket en d Stub
nei'. Nô stöhnt se auf, macht s Feaschter auf ond losnet
naus. Der Reaga schlät er ens Gsicht ond der Wend
fährt rei' ond blöst s Liacht aus. Em Feaschtera bleibt
se onter em offene Feaschter stav' ond losnet ond losnet,
aber se hót ner ghairt, weder s Tobna vo' dem O'wetter
ond s Blatscha vom Reaga. Endlich hairt se s Hostörle
gau', se macht schnell aber leis s Feaschter zua, zendt s
Liacht wieder a' ond gôht mit-em an d Trepp naus. Dô
stöhnt schau' ihr Mâ ond sait:

„Grüß Gott, Annemrei! Ischt des a' D'wetter!
Ond der schlecht Weg! s ischt no guet, daß e hau' bis
zuam Kreuzweg auffiza könna. Höscht noh ebbes Warms?
Aber wa isch denn mit dir? Du bist ja ganz naß —“

„Ach, der We'd hót s Feaschter usgrissa，“ sait se.

„So?“ macht der Chriſhtof weiter, „Gelt i komm
spöt. Derfür han e aber au en nobla Handel gmacht.
Der ischt schau' a' bisle en Nassauer wert!“

D Annemrei sait ner. Se holt s Eſſa rei' ond der
Chriſhtof ſetz ſich an da' Tisch ond iſt ganz vergnüagt.
D Annemrei gruschtle¹⁾ einschweila en der Stube rom.

Wia der Chriſhtof mit-em Eſſa fertich iſt, sait er:

„s ſend freundliche Herra drenna en der Stadt. Se
hent me mitfahra lau' ond a' paar Flascha-n extra
zahlt.“

D Annemrei sait wieder ner ond raumet ſtill da' Tisch a.

„Ischts Heu von der Bachwies noh vor em We.ter
rei' komma?“ frögt er jezet.

„Des von der Bachwies et,“ geiht em d Annemrei
zruck, „der Märte hót gsait, vorher müaß des vo' der Berg-
wies rei.“

„Der Märte, ällweil der Märte!“ brommt der Chriſhtof,
„Der macht's emmer nöch ſei'm Kopf! Er soll to',
was i-n-em sag. Raum ben-e zuam Haus duſſa, nö iſchts
wia wegblöſa', was i gsait hau'.“

„Nö bleib derhoimda!“ will d Annemrei saga, aber
ſe verſchlucks ond ſait ſo ane:

„Was höſcht ghandelt, Chriſhtof?“

¹⁾ framt.

„So, frôgscht endlich au dernôch?“ sait der Chrischtof halba verdriâßlich. Nô aber verzählt er, wia er da' Nathan ond da' Salomo troffa hâb, ond wia se heindôh en Handel gmacht hâbet om a' Brachtsräpple, wia der Oberförschter en der Stadt koi's reit.

„Aber du Chrischtof,“ sait d' Annemrei, „o'sre vier Gäul send jô übrich gnuag fürs Ackerwerk.“

„Was verslöhst du dervo'? s Füchsle ischt schwach auf de Borderfüß, s Bräu'le ischt a'heba'¹⁾ alt ond muaz en a' paar Jährla doch weg — i be' koi' Pferdschender — ond an o'ser Wägele ghairt schau' lang a' leichters Gäule. Wart no, Annemrei, wann de mit dem Räpple en d' Stadt führ! Jetzt han i da' schö'schta Gaul em Fleck aond s Schulbaura sei' Schemmel'ka' et na' an mei' Räpple.“

„Ond mit was witt des Räpple zahla?“ frôgt d' Annemrei.

„Mit was zahla? Mit Geld, mit was sonscht?“ sait der Chrischtof so ane ond verziehet s Maul zuam Lach'a, wia wenn er ebbes luschtichs gsait hätt. Aber s hôt et reacht to' ond d' Annemrei sait:

„Berstell de et, Chrischtof, i woiz ganz guat, daß s Geld bei ons rar ischt.“

„Em Herbst geits gnuag,“ sait der Chrischtof.

„Dô muascht d' Löh' auszahla ond d' Zieler auf Märtene ond —“

„Ond was sonscht noh?“ rüaft der Bergbauer. „Du verderbst mer jedesmôl d' Fröid, so oft e en guata Handel gmacht hau', mit dei'm ewicha Anoi'mrommacha ond Seufza!“

²⁾ allmählich.

„Chrischtof,“ sait d' Annemrei, ond ihr Stemm zittret,
„i woiß guat, wia viel auf o'srem Hof stöht; ond daß
mer schau' lang nemme de reichste em Flecka send.“

„Wer sait des?“ fährt der Chrischtof auf.

„Sei ruhich,“ macht d' Annemrei furt, „i woiß s so guat
wia du selber. Hausa muß mer ond spara ond zsemahalta,
sonscht fizet mer nemme z lang uf dei's Vaters Hof.“

„I halt zema, so viel-e ka,“ sait der Chrischtof,
„ond oi' gscheiter Handel bringt viel rei'. s ischt wôhr,
s ischt hentersche ganga mit o'srem Säckle. Aber wer
ischt Schuld? Kann i derfür, daß mer O'glück em Stall
ghet hent, ond daß oi'm die Kneacht ond Mägd alles ver-
schloiset ond verschleppt!“

„Grad des isch, Chrischtof! Moischt et, wenn du
emmer derhoimda wärescht ond noch em Sach gucka tätescht,
statt uf alle Märkt rom laufa, nô gängs anderschter?“

„Grad des isch, Annemrei,“ sait der Chrischtof. „grad
des Romlaufa uf de Märkt. I muß gscheit handla, nô
kommt alles wieder rei'. Ond sell sa-n e der: da' Berg-
baura haut koiner übers Auhr! Dô mülaft schau' a'
bsondrer komma. I verstand da' Handel.“

„Ond des Füchsle mit dene schwache Füaß?“ sait
d' Annemrei, „Hent se de mit dem et a'gschmiert?“

„Dimol ond et zuam zwotamol!“ sait der Chrischtof,
„i kenn me ezet aus mit dene Herra. Guck, Weib,“ sezt
er nô treuherzich derzu, „s Handla liegt mer em Blut;
i be' schau' als Bua mit-em Vater uf-em Handla gwä
ond a' engemer¹⁾ Freu'd vo' de Gäul ben-e halt. Ond

¹⁾ intimer.

mei' Vater, hōt der et durchs Handla' a' sħö's Sächle
zsema kriagt?"

„Jö, Chrishṭof, aber er ischt et alleweil furt gloffa;
de meischt Zeit ischt er dahoimda am Zwig²⁾ gwä. Laß
des Handla sei', Chrishṭof, o'sre Aecker send a' sichrer
Boda, dō geits koinē Kranketa ond schwache Füaß wia
bei de Gaul —“

„Aber Hagel ond Nässe ond Dürre ond schlechte
Jöhr!“ sait der Chrishṭof feaschter.

„Des kommt vo' onshrem Herrgott, dem wurſcht du
et ens Ha'dwerk pſuſcha wollā, Chrishṭof! Probirs amol
ond bleib derhoimda, wia en de aifchte Jöhr, mō dā me
gnomma ghet höſcht. s ischt koi' Seg a' dem Handla,
mōs et amol emmer ehrlich zuagdōt.“

„Weib,“ rüaft der Bauer, „höſcht du ſchau' amol
en o'ehrlich a Pfennich en meiner Ha'd gſeha? Woiß
Gott, des han-e au' vo' frūhschter Kendheit a' glernt, daß
ehrlich am längſta' währt, ond bei dem bleib-e. Daß
dā-n aber ſiehſcht, daß e au s Handla laſſa ka', i ver-
ſprech der, i Kauf des Napple et, der Handel ischt fo wia
ſo noh et agmacht. Ond über da' Heuet ſiehſcht me
nemme uf der Handelſchaft. Isch fo reaht, Annemrei?“

„Ischt mer reaht,“ sait d Annemrei, „ond gib acht,
wia alles ganz anderschter gōt, wenn du nōch-em Sächle
guſchescht. Du verſtōhſch halt doch noh viel besser, weder
der Märte.“

Da' Chrishṭof freut des, was sei' Weib gsait hōt;
gnau bſeha ischt er au froh, daß em sei' Weib den Gaul-

²⁾ am Zeug, bei der Sache.

handel ausgredt hōt. S iſht em selber et reaht wol derbei gwā, denn mit sei'm Vermöga iſht arg abe ganga. Ond d Annemrei freut se übers Chriſchtoſs Versprecha, wiewol se noh et reaht glaubt hōt, daß ers au halt. Se hōt halt ganz guat gwiſt, daß ner ſchwerer iſht, weder en Baura, wann er fe amdol uf d Handelschaft glegt hōt, wieder dervo' azbrenga, ond wia ſchwer fe dia Hand wieder an da' Pſluag gwöhnt, mō gwohnt iſht, fe von de Herrra drucka' z lau' ond anstatt em Zlegel d Schoppa en der Stadt z lupſa.

2.

Der hellicht Tag hōt en d Kamer nei'gudt, wia am andera Morga der Chriſchtoſ aufgstanda-n iſht. S Früah-aufſteha verlernt mer au', wa' mer am Dbed ſpōt ond müad vo' äll dem Gehandel ond Schoppegetrenk hoi' kommt. D Annemrei iſht ſchau' lang auf gwā ond hōt da' Kaffee gmacht ond en de Kneacht ond Mägd nausgſchickt. Endlich kommt au der Chriſchtoſ ond verwondret fe, daß alles ſchau' em Feld ſei.

„Z ſchätz¹⁾, i muaf bälde raus,“ ſait er, „wann i Herr em Haus ſei' will.“

„Wurd guat ſei‘,“ ſait d Annemrei freundlich ond fangt a' ihre Kender ei'zſchliaſa²⁾. Der Chriſchtoſ trenkt ſchnell fein Kaffee ond gōht nō en da' Hof nonter, mō der Mārte ällerhand romghantiret hōt.

„Guata Morga, Bauer!“ rüaſt er, „au ſchau' auf?“

„Gōht di des ebbes a',“ ſait der Chriſchtoſ, „wann

¹⁾ ich glaube.

²⁾ anzuziehen.

i aufstand? I ka' ens Bett liega ond aufsteha, wann i will. Send d Leut schau' ens Feld?"

"Em Klaiacker¹⁾) seit zwei Stond," sait der Märte.

"Wer hōts dō na' gschiidt?"

"Ihr et, Bauer."

"Du?"

"Jo, i!"

"So? Unnandermöll wartet er, bis i ich sag, mō mer na' gōht. Verstanda?"

"Aber wann Ihr aischt — " will der Märte sage, aber der Christof ischt schau' en Stall nüber ganga gwä. Dort bschaut er seine Gäula, streichelts ond schwätz mit-en.

"Aber so schö' wia des Räpple send er alle et, et amöll du, Brauner!" sait er ond klopft dem auf da' Hals. Nô guckt er em Stall ommer.

"S hätt aischt et amöll Platz für noh oin," sait er.

"Zwör wann mer dia Wa'd dort raus tät ond vom Küahstall a' Stück derzua, nô wär's a' Prachtsstall."

Er überschlägt em Stillalgschwend d Köschta ond fangt a' auszmessa. Dömit kommt er en d Schuier nei', mō sei' Wägele stöhrt.

"Bischt au schau' alt ond nemme viel nuz," sait er, "ond z altväterisch für da' Bergbaura ond sei' Räpple — "

Nô lachet er ond sait:

"Ja so, des Räpple frißt noh em Juda sein Haber. Sei gscheit, Christof, d Annemrei hōt Reacht!"

Er macht, daß er aus der Schuier nauskommt, daß em dia Sacha aus em Kopf kommt, ond gōht aufs Feld

¹⁾ Kleeader.

naus. Wia-n-er vor dia Heck, mō an dem Klaiader na gloffa-n ischt, anekommt, sieht er, wia d Ann mit em Jakob Dommheita macht, ond der Hans sei' Lubakspfeif a'zend, so langsam ond bedächtich, wia wenn er a' Maurer wär. Gschafft aber hent se fascht noh ner ghet.

„Hedô, ihr faule Schlengel!“ schreit er ond stöhnt uf oi'môl mitta-n onter-en. Aber dia Langet nôch de Gabla ond Recha ond wia der Bliz schiebt der Hans sei' Pfeif en Sack. — schad om se, er hôt se grad eba mit so viel Fleiß ond Müah a'zend ghet!

„Zahl i euch da' Loh' fürs Liabla ond s Naucha?“ schreit der Chrißtof, nemmt da' nächste beschta Recha ond fangt a' z schaffa, daß em der Schwoiß ronter lauft. Ond en a' paar Stond ischt onter seine Auga maih gschafft gwä, weder sonscht ema' halba Tag. Der Chrißtof ischts freile au nemma reaht gwohnt gwä, ond wia dia Hiz emmer ärger wird, losnet er manchmôl zuam Dorf nüber, obs denn emmer noh et olfe¹⁾ läut. s ischt halt doch viel netter, wa'mer Morgens en der Früah auf da' Markt gôht, ond nôcher, wann d Sonn brennt, em schwarza Bära oder em rauta Döhsa en Schoppa trenka ka', mō mer zug ällem na' noh en gscheita Diskursch Koschtnizer²⁾ hôt.

Wia-n-er so an des denkt ond en Augablick uf sei' Gabel gleint³⁾ dôstôht, hört er Räder rolla ond em selba Augablick a' Stemm saga:

„Gotts Wunder, er schafft! Fleißig Bergbauer?“

¹⁾ elf Uhr sei und läute.

²⁾ unisonst.

³⁾ gelehnt.

„A' bisle.“ sait er ond gucket auf. Dô sieht er da' Nathan ond da' Salomo uf dem Wägele fiza.

„Nu, w.s isch mit dem Räpple?“ rükaft der Nathan.
„Habt Ihr Euch besonnen heute Nacht?“

Der Chriſchtof tuat, wie wenn er Ighairetguqt hoift
tät¹⁾ ond sait:

„Schau' wieder zurück? En guata Handel gmacht?“

„Schlechte Seiten!“ sait der Salomo, „s trägt die Kosten nicht!“

Was nemlich so a' Jud d Köscha traga hoift. Dia fuſzeha Prozent, mō se an dem Morga schau' profetirt ghet hent, hoifet se koinen Köscha, se hent wohl gwisht, daß se am Chriſchtof noh viel maih verdeanet, wann ses gſchickt a'greifet. Der aber hōt de Herra gegnüber gerā zoigt, daß er au keck sei' könn, lacht ond sait:

„Werß glaubt! O Ihr! Ihr send de Allergschötsche. Mit Euch nemmts der Teufel ond sei' Großmuater et auf.“

„Soll er mich holen,“ sait der Nathan „wenns nicht nimmt der Bergbauer auf mit dem Oscheidsten und Reichsten.“

Der Bergbaur schmonzlet ond der Salomo frögt:

„Und s Räpple, Bauer?“

Der Chriſchtof woif et, was sa. Daß er sei'm Weib versprocha hōt, des Handla sei' z lau', des hōt er könna doch et saga. Des wär jō a' Schand, ond dia Herra tätet neꝝ weder lacha. So-ma' Weib ebbes versprech'a! Wega sei'm Weib ebbes et to'! Lüaga hōt er aber au et möga, drom sait er endlich langsam ond verlega':

¹⁾ nicht hören würde.

„Mei' Stall ischt z klei' für den Gaul und meine
a'dere will e et wegto.“

„Wie heißt zu klein?“ rüast der Nathan, „s giebt
ja Steine und Maurer!“

„Bergbauer,“ macht der Salomo furt, „für Euch
find nicht zu viel sechs Pferde, wenn man solche Wiesen
hat. Wie heißt sechs? Zehn Pferde. Und s Räpple
ist so viel wie drei. As ich leb, Ihr seid ein Gaul-
schinder, wenn Ihr macht alle Arbeit bloß mit Euren vier
Pferden. Nu, was isch? Wollt Ihr das Räpple?“

Em Christof isch uf oi'möl fürkomma, er sei a'
wüticher Gaulschinder und s hdt-em en alle Glieder
gjüdt, zua dene Herra na' z gau' und den Handel z macha.
Und doch hdt a' Stemm en em gsait: tuas et! Aber
was saga zua dene Herra! Er hilft se wieder durch
Recksei' und sait:

„I a' Gaulschinder? Und was send nö Ihr? Ko'i
Mensch schendet d Gäul ärger weder Ihr; dō gudet Euer
Märr a'. Des lieblich Tierle hdt müaßa gescht¹⁾ Obed
o's alle drui zieha, hdt schäzwol bei dene schlechte Zeita
gescht Nacht nez maih kriagt und ezet konamet Er schau'
zwoi Stond weit hear und fahret den grauza Berg dō
em scharpfa Trab o'gmüdt²⁾ ra, was dene Gäul ganz
extra wohl tuat!“

Der Nathan und der Salomo hent zaischta baife
Gfichter gmacht zua dera Ned, aparte weil se wôhr gwä

¹⁾ gestern.

²⁾ ohne gesperrt zu haben.

ischt, aber se lasset se uer merka ond der Nathan lachet ond sait:

„Redst en Stuß, Bergbauer! Wie s Räpple ischts freilich nicht, aber s zieht uns drei vollends den Berg nunter, langsam Bergbauer, as ich leb, ganz langsam. Nu? Steigt ein, daß mer machen den Handel!“

Der Christof stöhnt dô ond guckt zua de Juda' nauf ond nô nüber zuam Dorf ond denkt an da' Handel ond an d Annemrei, ond woiz et was to'. Dô sangt uf-em Kirchatura d Olseglock a' ond s hôt tô, wia „Kommet hoi! Kommet hoi!“ ond der Christof hôt dia Glock verstanda ond sait schnell:

„Abjes, Ihr Herrn, i muß hoi!“

Ond nô, wia wenn der Teufel selber uf dem Wägele säß ond en versuacha wött, dreht er se rom ond lauft hoi'. Des freile hôt er uf em Hoi'weg et hendera könna, daß em emmer em Kopf rom ganga-n ischt, vier Gäul' seiet am End doch z wenich für sei' Baurawerk ond der Salomo hâb vielleicht doch Reacht.

Wia-n-er so schnell ane lauft, sait der Salomo:

„Hast du gesehen? Weg ist er. Nu fang ihn!“

„Ich fang ihn!“ antwortet der Nathan, schüttelt d Zügel ond fährt weiter.

Wia der Christof hoi' kommt, sprengt-em s Mariele entgega. Er nemmt des Ke'd auf da' Arm ond gibt em en Schmaz, ond nô trait ers buckelranza¹⁾ em Trab durch da' Hof, ond s Mariele lachet, wia-n-er mit er au noh d Trepp nauf sprengt. Ond en der Kuche stöhnt d Annemrei ond

¹⁾ auf dem Rücken.

göht mit Dier ond Schmalz om ond ihre Auga hent hell aufgleuchtet, wia der Chrischtof mit-em Marièle reif' kommt.

„Hüoh! furt furt!“ schreit s Marièle, aber der Chrischtof tuat se ra ond gucket sei' Weib a', wia se döstdht ond am Heard hantirt, ond se ischt em so nett fürkomma, wia seit Jöhr ond Tag et. Er göht zua-n-er na', tupft er auf d Achsla, ond sait halba hehlenga:

„Du, Annemrei, i hau's furtfahra lau!“

„Wen?“ frögt d Annemrei.

„Dia Juda!“

„Reacht so, Chrischtof!“ sait d Annemrei ond frögt loi' Wort weiter, „jezt kriagscht aber au a' extra guais Küachle!“

Ond se nemmt oi's frisch aus der Käfel raus ond geits em Chrischtof, ond dem hôt sei' Lentag loi' Küachle so guat gschmeckt wia des, ond wenn-s au d Rosawirthen en der Stadt bacha hôt, ond die ischt doch a' Köche obaraus gwä. Ond der Schopp Weißbier, den em jezet sei' Weib rausholt, der hôt en besser däucht, weder s Värawirts beschter Achtzehner.

3.

Der Märte, mō beim Chrischtof Oberknecht gwä ißt, ischt a' oigener Kerle gwä. Er hôtts mit seiner Herrschaft ehrlich ond guat gmoi't ond a' mancher kö't sich a'-n Exempel vom a' Beispiel an-em nemma. Dabei hôt er se aber et wenich ei'bild auf des, was er könn, ond hôt se gern en Dekomona' ghoiſa, weil er amölf uf ema' herrschaftlicha Guat so ebbes wia Verwalter vom Ver-

walter gwä ischt. Wenn der Chrischtof furt gwä ischt, nô ischt er für älles gstanden; aber er ischt halt et der Herr gwä, ond dia Kneacht ond Mägd hent em et so gefolgt wia em Herrn selber, ond so ischt gar viel z schanda ganga. Em Märte isch eigentlich et o'liab gwä, daß er hôt älles alloi' regieradürfa, ond wenn er et so a' aufrichtiche Seel gwä wär, nô hätt er vielleicht vom Chrischtof denkt: Bischt wol furt! Aber d Annemrei ischt em ans Herz gwachs'a gwä, für dia hätt er älles to', ond ihr Glück ischt em weit über seine Wensch' ganga. Des hôt freile noh en ganz bsondera Grond ghet. Er ischt bloß a' paar Jöhr älter gwä als der Chrischtof ond aus em gleicha Fleck'a, wia d Annemrei. Wia dia aischt sechzeh' Jöhr alt gwä ischt, hôt er se schau' möga ond ner haichers gwißt als Schulzabaura Annemrei. Aber freile, er ischt a' armer Taglöhnerssoh' gwä, ond d Annemrei a' reichs'Mädle, ond vom Heira hôt dröm koi' Ned sei' könna. D Annemrei selber hôt gar ner gmerkt vo' dem, was der Märte em Herze traga hôt, oder wenichstens to', wia wann se ner merka tät. Guat ischt se freile emmer zua-n-em gwä — aber gega wen ischt d Annemrei et guat gwä? — ond wenn beim a' Tanz dia prozicha reicha Baurabuaba den arma Märte vo' oba ra' a'gseha hent, weil er hôt härich no an d reich Annemrei na'schmeck'adürfa, nô hôt mer gwiß gwißt, daß d Annemrei glei da' Tausendguldefriz oder da' Schmalzadam hôt stan' lau' ond mit em Märte romgwalzt ischt. Ond des hôt er-er nia vergessa, au wia s anderschter woara-n ischt. Ond anderschter ischts woara, seit s Bergbaura sei' Chrischtof rüber komma-n ischt en der Annemrei ihren Fleck'a, so oft mer a' Hauhzich

oder a' Kirche oder ebbes en dem Fach ghet hōt. Der Chriſchtoſ mit ſeine luſtiche Auga, ſei'm grada oſſena Wefā ond dem ferticha Maulwerk hōt der Annemrei glei ſ aifchtmol gfalla: Daſ er au Geld gnuag ghet hōt, des iſcht er oi's gwā; ſe hōt et zu dene ghairt, mō moinet, a' Ma' ohne en Geldſac̄ ſei bloß a' halber Ma'. Ganz bſonders am Chriſchtoſ aber hōt er gfalla, daſ er gega da' Mārte ſo gmoi' gwā iſcht ond oft mit em diſchkerirt hōt über ällerhand, au über ſotte Sache, dia der Mārte beſſer verſtanda hōt, weder der Chriſchtoſ. Des tuat foſchtf ſo a' reicher Baurabua et gern — zwör de meiſchte Herra en der Stadt au et — der Chriſchtoſ aber hōt möga gern überall ebbes proſetira, au vo'-ma' Arma. Der Mārte hōt freile bald gwift, mō-n-er dra' iſcht; aber fo feſcht ſend auf-em Dorf die Gſezer vo' uralte Zeita her, daſ em Mārte gar koi' Gedank komma-n iſcht, ſ könnnt au amol a' Ausnahm gä ond der arm Mārte könnnt de reich Annemrei heira. A' guater Kerle iſcht er ohnedem gwā, ond fo hōt er ohne Neid. zuagſeha, wia ſ zwiſhem Chriſchtoſ ond der Annemrei ſo nōch ond nōch riſtich wird. Bloß iebott ¹⁾), wenn-em d Annemrei eba wieder gar z ſchō' ond z liab fürkomma-n iſcht, hōt er gmurrt wider ſei' Schicksal. Er hōts aber et bei-n-em aufkomma lau' ond hōt ſe gern als Oberkneacht vom Chriſchtoſ denga lau', wia ſe gheirt hent. Auf iherer Hauhzich iſcht er der luſtichſicht gwā; wias en ſei'm Herza dren ausgſāha hōt, des hōt freile neamerz gwift. Brocha-n iſch et gwā; brochene Herza geiſs bloß en der Stadt, ond do iſch alls verloga. A'-n Oberkneacht

¹⁾ manchmal.

ond a' broches Herz, sell hät se schleacht paßt; möcht au wissa was dô d Leut gsait hättet. Also brocha-n et, aber a' bisle a' Mack¹⁾ höts doch ghet; sell höt der Märte wol gspürt.

Ond so ziaht er also mit-en auf da Bergemer Hof, ond en der Aischte ischt alles guat ganga. Bald aber höt der Christof mit dem Handla a'gsanga ond ischt viel furt gwä em halba Ländle rom, ond der Märte höt gseha, wia d Annemrei a' traurichs Gsicht na' macht, ond dô höt er wieder dia Mack en sei'm Herza gspürt, wenn er denkt höt: „Tätescht dus jezet au so macha, wenn du des Brachtsweib hättet?“ „Noi!, lausendmôl noi!“ sait er ond gibt sich Müah, bloß an der Annemrei ihr Sach z denka ond hält ers zsema ond paßt de Kneacht ond de Mägd uf ond geit sich alle Müah, daß et alles z Schanda gang. Aber freile, wenn halt der Bauer furt ischt, isch et wia wenn-er dô ischt, ond henterische isch ganga Jöhr für Jöhr. Der Märte höts alls probirt, ob er da' Christof et wieder ans Haus gwöhna könn; aber was a' Weib et ka', was wurd des a' Kneacht köonna! Jezt wia-n-er sieht, daß der Christof seit dem Obed, mö-n-er so spôt hoi' komma-n ischt, ganz anderschter am Zug ischt, ond der Annemrei ihre Auga wieder a' bisle luschticher en d Welt nei' gucket, ejet denkt er, er müah au voll s sei' to', daß em Baura wieder derhoimda gfall, ond daß er wieder em Haus regier. Denn mò mer herrscha ond regiera ka', dô ischt mer älla'weil gera.

¹⁾ Durch Fall oder Stoß hervorgebrachte Vertiefung an einem glatten Gegenstand.

Ond so isch au em Chriſchtos ganga. Der Märte hōt älle Augablick en Kneacht oder a' Magd zuam Chriſchtos gſchickt, daß se frōga ſollet, wia mer des ond ſell mach, ond er selber — s isch en freile a' biſle härt a'komma — isch gern a' halb Duzet mōl zuam Baura ganga-n ond hōt en gfrōgt. Des hōt em Chriſchtos gar et ſchleacht gfalla; er hōt gar nemme gwicht, wia des isch, wenn er Herr en ſei'm Haus isch, ond älles noch der oigena Pfeiſ tanzt. s isch halt doch ſchöner gwä, uf-emi Bergemer Hof da' Heira macha, weder en der Stadt der unteränich Deanae ſei'.

So hōt er ſe ganz zfrieda am Obed ens Bett glegt. Wia-n-er aber aufwacht, ſchempft er: „Kann oī'n dia Schendmärr et. amōl em Schlöſ en Ruah lau'!“

S hōt em nemlich tremt, er häb des Räpple kaufſt ond ſei em Galopp mit-em durchs Dorf gritta.

Ond heller Tag isch au ſchau' gwä, wia-n-er ſe d Auga reibt, ond ſchau' vom Bett aus hairt er dronja em Hof d Kneacht ond d Mägd mit anander ſchwäza. Er ſprengt auf, gōht ans Feaſchter ond ſchreit na:

„He, was isch? Lieget et noh drei Wiesa voll Heu duſſa?“

Aber der Märte rüaſt nauf, ond lachet derbei fo ane: „Mer martet auf Euern Befehl, Bauer. Mō na' ſollet mer? S. isch freile ſchau' an de Siebene, aber ohne Euern Befehl —.“

„Marſch auf d Bachwies!“ ſchreit der Chriſchtos, ond ſchmeiſt s Feaſchter zu, daß wettret. Er hōt et reacht verſtanda, was der Märte gmoi't hōt ond brommt:

„Wartet, i will ich Füaß macha!“

Er zieht se schnell vollends a', schlappt sein Kaffee no
gschwend nonter, ond kaum send se auf der Wiesa gwä,
nô stöhrt der Bauer schau' henter-en ond ischt Fuchs ond
Has, ond alles gôht vorwärts, daß a' wahre Froid gwä
ischt.

Am Obed vo' dem Tag sait der Christof zuer
Annemrei:

„Weib, mô ischt mei' Wecker?“

D Annemrei lachet, nemmt d Uhr vom Kasta ra
ond sait:

„Auf wann soll e se richta?“

„Auf Zweoi!“ sait der Christof ond lachet noh, wia
n'er schau' schlôft.

Kaum hôts dussa dämmret, nô rasslet der Wecker ond
der Christof fährt auf. Leis stöhrt er auf, daß sei'
Weib ond seine Kinder et aufwachet. Nô gôht er an d
Kamera nauf ond poltret an de Türa ond schempft —
mer hôts aber seiner Stein a'ghairt, daß s eins de
graischt Freud macht, daß er der aischt em Haus sei.

„He dô, Mârie,“ schreit er an der vina Tür, „wia
lang witt schlôfa? Hans, fauler Schlengel, stand uf ond
stopf dei' Pfeif, brauchsch lang gnuag derzua!“

Ond nô an der andera Tür:

„Natürlich dia Weibsbilder schlôset noh wia d Murmel-
tier! Auf, Ann, der Jakob wartet schau' lang auf de!“

Wias drenna en dene Kamera lebich worda-n ischt,
ond se âllsgmach vonter komma send, ischt der Christof
schau' mit der Säges en der Ha'd dôgschanda. Ond er
gôht mit naus auf d Wiesa ond mäht, daß an Art ghet
hôt ond koiner, et amôl der Mârte, em nochkomma-n ischt.

Ond wia nô em Sechse sei' Weib kommt — se ischt desmôl selber naus — ond s Morga-n-essa brengt ond er mit er onder en Baum na'sigt ond nonter guet auf des, was se schau' gschafft ghet hent, ond nüber auf sein Hof, mô d Dächer en der Morgasonn glizeret hent, ond mô der Rauch en kleine Wölkla so lüschtich nufgsteiga-n ischt — d Dächer von seim Hof ond der Rauch vo' seim Heerd — do guet er d Annemrei ganz glückselich a', läßt d Auga romlaufa, obs neamerz seh, nemmt nô ihr Ha'd, drückt se ond hait:

„Annemrei, s ischt halt doch schö', a' Bauer z sei', wa' mer so sein vigena Hof hot ond seine vigeue Aeder ond Wiesa ond so a' Weib, wia du.“

Ond d Annemrei guet en au a', ond d Sonn muaz er ganz o'gschickt ens Gsicht gschena hau'; denn ihre Auga glänzet ganz naß, ond vo' alle Tautropfa, en dene sich d Morgasonn gspieglet hot, send des de Koschibarschte gwä.

Schnell wischt se se mit der Ha'd über s Gsicht — s brauchts neamerz z seha — ond langt d Löffel ond Gabla raus ond schöpft em Chrischtof raus, ond schwätz mit-em über alles möglich so lüschtich ond vergnügt, wia schau' lang nemme.

Ond der Märte, mô bei de andere onder-em nächsta Baum gesessa-n ischt, hot alls rüber guet ond rüberglosnet ond nô für sich ane gsait:

„s wird reacht, s wird wieder reacht, i glaubs selber.“

4.

Der Heuet ischt guat vorbeiganga ond d' Ernt ischt komma, ond mer hót alles schö' rei' brôcht, ond koin fleißigera Baura hót mer em ganza Flecka et gseha, weder da' Chriſchtos. Er hót enwährend äll dem Gſchäft et Zeit ghet, an d' Handelschaft z' denka, ond wenn er dra' denkt hót, nô hót er au an des denkt, was er sei'n Weib versprocha häb.

Ezet aber em September isch ruhicher woara, ond der Chriſchtos hót wieder Zeit ghet, seine Gedanka nôch z' gau'. Ond wia nô der groß Herbschtmarkt z' Weilerstadt drüba komma-n ischt, nô isch gwâ, wia wenn a' anderer Goischt über-en käm. S ischt seit Jöhra koi' Herbschtmarkt z' Weilerstadt verganga, mō der Chriſchtos et derbei gwâ ischt, ond so hót ers et übers Herz brôcht, derhoimda z' bleiba. Was schadts au, wa' mer nüber gôht, s muaz jô et ghandelt sei! Er saits zur Annemrei, gudet se aber derbei et a' ond schwätz schneller weder sonscht. Ob se au mitgang, frôgt er. D' Annemrei bsennt se a' Weile: soll se oder soll se et? Vielleicht könnt se en vo' domma Stroich ahalta, ond s wär guat, wann se gäng. Aber noi! denkt se, s nuzt jô doch ner; was ka' a' Weib macha, wann der Ma' bardu handla will? Se mahnt en et amȫl an sei' Versprecha, mo-n-er er gä hót, weil se gwißt hót, daß ner d' Ma'sbilder baiſer macht, weder wenns Weib emmer wieder an a' Versprecha mahnt. Daß mer des halta muaz, woiz der Ma' selber, ond will et ällaweil an ebbes gmahnt sei', was se vo' selber verſtôht.

Die Annemrei läßt en deßwega ganz ruhich ohne a' Wort ziaha ond sait em freundlich Bhüet-Gott. Aber mit schwerem Herza guckt se em noch, ond wia-n-er furt gwä ischt, legt se d Hä'd zsema ond beat. Ond was höt se beat? „Lieber Vater em Hemmel, bhüet mei' Ma' uf-em Märkt, daß er koinne domma Stroich mach!“

Lachet mer sei' jō et über des Beata von dem Weib! Mö a' Menschaherz allo' ischt ond en Sorga om en Menscha, den mer magg, dō leget sich d Hä'd zsema ond mer rüaft o'sren Herrgott em Hemmel doba a'. Lachet mer au et über dia ei'fältiche Wort, mö se gsait höt. Wa' mer amöd mit o'srem Herrgott nemme schwäze därf, wiaß oim oms Herz isch., wa' mer am End gar nemme mit em schwäza ka', nō siehts bais aus bei-ma' Menschekend. Ond wann a' Weib Angst hau' muß, daß der Handelsteufel en ihren Ma' fährt ond en so regiert, daß er Haus ond Hof ond Weib ond Kinder drüber vergißt, nō därf se wol zu o'srem Herrgott beata, daß er em guata Gedanka en sei' Herz gäb. Noh amöd sag-es: Lachet mer et über des Weib!

Ond se höt zua ällem na' ganz hsondere Grend ghet, daß se für da' Christof Angscht ghet höt. Seit a' paar Wocha höt der Nöchbauer da' schö'ste Gaul em Necka ghet, des höt der Christof selber gsait, ond der höt doch d Gäul kennt. Ond d Annemrei höt gwischt, daß des da' Christof sticht, daß er nemme de schö'schte Gäul häb, ond wia-n-er amöd gsait höt, er wiß bloß oin Gaul, der noh schöner sei, ond des sei sell Räpple, nō höt se au gwischt, wia viel s gschлага höt. Zua ällem na' isch a' vogene Sach mit dene Menscha, mö uf ebbes versessa send, ond i glaub fascht, dō ischt der königlich wia der Bauer, bloß daß em

Könich sei' Schloß et vo' Amtswega en da' Gant kommt, wia em Baura sei' Hof, wanns amöl schias goht. Wann Diner so alts agschabts Geld, mō koi' Mensch maih nemmt, zsema scharrt, wann Diner alte porzlanene Schüssela ond Häfela zsemasammlet, oft wann se schau verbrocha send, oder wann Diner uf d Hond ond d Gäul aus ischt — s ischt ällamöl der gleich Handel¹⁾: se brenget des Buig nemme aus-em Kopf. Ond wenn se hondertmöl bei-n-en saget: „Laß des Deng, dā brauchsch et ond höschte derzua koi' Geld!“ ällemöl wieder kommt s en für Auga ond se könnets eba gar et vergessa. Ond wenn nō dia guata Freu'd zuaredet: s sei aischt noh a' gscheiter Handel, mō se machen, nō send d guate Vorsätz weg, wia der Reis, wann d Sonn scheit.

Ond so isch em Chrißtof au ganga. Er ischt mit de beschte Vorsätz vo' sei'm Hof weggfahra, ond dia Geldgurt, mō an em rom gschlapparet hót²⁾, hätt-en en seine guata Vorsätz bloß feschter machen solla. Aber wia-n er so auf dia volle Schuira na'guet, nō rechnet er schnell aus, was dia wert seiet, ond s ischt em schau' gwä, wie wenn er de dicke Geldgurt om da' Leib hält.

Em rascha' Trab fährt er em Städtle zua ond bald sieht er d Türm vo' Weilerstadt. Em schwarza Bära' hót er als sei' Ei'kehr ghet ond fährt au heu't vor dem Wirtshaus a'. En der Wirtsstub isch noh leer gwä; bloß a' paar Fuhrleut send dögsessa ond hent Schnaps tronka ond graucht ond kartlet. Desch't koi' Gesellschaft für

¹⁾ Umstand.

²⁾ mit wenig Inhalt looser anlag.

da' Bergbaura; er trenkt drom schnell en Schoppa Rota
ond göht n̄d ~~allgmaah~~ em Märtt zua. Unterwegs hōt
er koin Bekannta troffa ond lauft so ganz en seine Ge-
danka s Städtle abe.

„Höfcht eigentlich ner dort z schaffa,“ denkt er, „kaufa
tuascht jō doch ner! Aber a' bisle a'seha' ka'schst jō dia
Gäul, s send gwiss schöne Tierla drunter!“

Ond eb er no gwischt hōt, wia, stöhst er mitta onter dene
Leut, mō dō ghandlet hent. Vo' alle Seita hent se em
d Zeit botta ¹⁾) ond d Hānd na'gstredt — lauter guate
Bekannte vo' dene Zeita her, mō-n-er noh uf d Märtt
ganga-n ischt.

„Grüaß Gott, Bergbauer, au' wieder a'mol dō?“
rüast der Großbauer vo' Wälbadorf.

„Mō bischt denn du gsteckt, Chriſtſtof?“ sait der Ober-
bauer vo' Alta', „dir muas ebbes passirt sei, dasch ſchau'
drei Roßmärtt gwā ſend, ond mer di et gſeha hōt.“

„Gotts Wunder, auch wieder einmal da?“ hairt der
Chriſtſtof ezet a' bekannte Stemmm ſaga ond verschrikt
halba.

„Was a' Freud,“ sait a'-n andre Stemmm, ond. au' dia
hōt der Chriſtſtof kennt, „wenn gekommen iſt der grauße
grauße Pferdkenner vom Bergemer Hof mit ſeiner vollen
Geldkaze.“

Ond der Nathan ond der Salomo hent em ihre Hand
he'gstredt.

Patsch et ei', ²⁾) Chriſtſtof, s iſcht dei' Verderba!
Denk an dei' Weib ond deine Kender!

¹⁾ die Zeit geboten, gegrüßt.

²⁾ gib die Hand nicht.

Aber em Chrischtof isch ejet aischt reacht wol gwä.
Nelle hent en grügt, was er vo' dem Gaul halt ond vo'
sellem. Ond er hót gsait, wia-n-ers verstanda hót, ond
uf sei'n Röt he' hent se kaust ond verkauft ond druf
glegt oder raghandlet, ond a' paar Stonda send rom gwä,
mer hót et gwißt, wia.

Schau' send de meischte Händel¹⁾ gmacht gwä, ond
der Chrischtof hót dra' denkt, en Schoppe z trenka, dô hairt
er, wia se om en Gaul handlet ond rom ond nom schreiet.
Er gđht nächer na', ond was sieht er? Des Räpple, des
wütatich schö' Räpple, ond s ischt so rond ond fett, daß
koi' Tropf Wasser auf em gstanden wär. Freile hóts schau'
nemme em Nathan ond em Salomo ghairt; a' Bauer vo'
Wälbdorf hót mit-em ghandlet.

Der Chrischtoff langt nôch der Geldgurt, aber se
klappert ond ischt maihnder weder halba leer; aber er denkt
an seine volle Schuira, ond daß mer om dia zeha so Räppla'
kaufa' kô't. Aber neba de Schuira stöhrt sei' Haus, ond drom
denkt er au an sei' Weib ond seine Kinder, ond er sait
bei-n-em: „Noi', i hau's versprocha! Ond dôbei bleibt's!“

Ond so schnell er ka', dreht er se rom ond gôht furt.
En sei'm Eifer wär er schiergar uf en Juda' naufgrennt,
der a' Füchsle am Baum qsführt hót.

„He, wohin so eilig?“ rüaft der Jud, ond schau'
stöhrt der Salomo dô ond sait em Chrischtof ens Ohr:

„Bergbauer, des müßt Ihr kaufen!“ Ond der Nathan
kommt grad vo'-ma' andera Handel her ond sait:

„s sieht nichts gleich, Bergbauer, aber schauts nur

¹⁾ Räufe.

an, die Füß und die Knochen! Wenn Ihrs raus füttiert,
so ein Tager vierzehn —“

„s ischt ein Gelegenheitskauf,” sait der Salomo, „und
billig, wie billig! Rein verschenkt, sag ich Euch!”

Ond so gôhts furt ond andre kommet au derzua ond
so a' Jud schlät glei drei Karle¹⁾ drauf, ond eb²⁾ noh der
Christof recht gwiszt hôt, mö-n-er dra' ischt, ischt der
Handel halba-n agmacht gwä. Em schwarza Bära' woll
mers nô voll fertich macha.

Ond nôch-ema' Weile sitz der Christof en dera
Wirtshub ond zählt sei' Geld ond sieht, daß s et langt
Er zählts mit-ema' bâisa Gwissa. Was hôt er der Anne-
mrei versprocha ghet? Nez, sait er bei-nem, weder daß er
des Räpple et kauf. Ond des hôt er au et kaufst; s ischt
en schwer gnuag a'komma. Ond er ischt am End nôh
ganz stolz, daß er des Räpple et kaufst hâb. Aber er hôt
se emmer noh bsonna, ob er des Füchsle kaufa woll.

So nôch ond nôch send dia andere Baura au komma,
eb noh d' Juden' dô gwä send, ond mer hôt natürlich vo'
äll dene Händel gschwätz.

„Was isch, Bergbauer,” rüaft Diner vo' onta am
Tisch ruf, „höschte des Füchsle kaufst?”

„Noh et, aber i kaufs; s wurd a' nobels Tierle,
wanns amol rausgfüttert ischt!”

„Dô brennscht de,” schreit der wieder; „aus dem wird
sei' Lebt'ag nez!”

„Sell muâß i wissa!” sait der Christof stolz, „i
kenn me aus!”

¹⁾ Karolin.

²⁾ eh.

„Halt Alter,” rüast jetzt wieder Diner, der Großbauer vo' Alta', und macht da' Juda' nödch, „desmöl ischt der grauß grauß Pferdskenner vom Bergemer Hof a Neukönnner!“

Des verzürnt da' Christof. Wenn der Bauer Nelles bstödt, nö bstödt er des nia, daß er en domma' Handel gmacht häb. Drom sangt der Christof a':

„Ond i sag“ — eb er aber weiter macht, schreit Diner vom Tisch rauf:

„Bergbauer, des Füchsle ischt so lieberlich, des zieht der koin Schocha¹⁾) Heu ans Haus!“

„Sell hau'-n-e henna!“²⁾ rüast der Christof noh ruhich.

„Ond koi' Bendele³⁾ Frucht über en Graba nüber!“ räzt en a' anderer.

„Dia hau'-n-e schau' droscha!“ rüast der Christof, schau' bais.

„Ond koi' Brötzwurscht vom Tisch na!“ sait der Großbauer.

„Dia friß-e selber!“ schreit jetzt der Christof wütich,
„Ond ezet kauf es grad!“

Ond wia dia Juda' kommet, nö macht er da' Handel mit-en a. Er hót wol gwißt, daß der Gaul ällerloi Fehler hót, aber deswega hót ern au billicher friagt. Daß des d eigentlich Ursach ischt, mordm ern kaufst, hót neamerz z wissa braucht, und s ischt em grad reacht gwä, daß dia Baura gmoint hent, er täs bloß, weil sia em

¹⁾ Häufen.

²⁾ eingehemst.

³⁾ Bündel.

agredt häbet. Baar auszahla hót er freile et könna; sell ischt jö aber au beim Juda' et naich, dia hent emmer baar Geld gnuag. Se nemmet et andl des Geld, mō der Chrißtof hót en gä wölla, er könns vielleicht sonscht braucha, saget se, ond der reich Bergbauer sei en lang guat¹⁾. Ond der Chrißtof denkt, se häbet so Dreacht et, ond s seiet doch gsälliche Herrn, der Nathan ond der Salomo, mō für den andere Juda' da' Kauf gmacht hent, ond bhält sei' Geld en der Gurt ond onterschreibt bloß so a' Zettel. Ond des ischt et glei, sondern nöche²⁾), wia se schau' viel tronka' ghet hent. Ond viel tronka' hót der Chrißtof an dem Obet, weil er bei derā ganza Sach koi' guats Gwissa' ghet hót. Ond halba em Schloß mit ema' schwera Kopf ischt er hoi'gfahra. Er hót d Züagel hanga lau'; sei' Brauner hót da' Weg ohnedem gsonda, ond des Füchsle ischt mitglosa. Langsam, wia s bais Gwissa selber, ischt des Wägele spät en der Nacht en da' Hof rei' gsällicha ond wia der Märte des Füchsle gseha hót ond da' Chrißtof hót faschtgar et verwecka könna, nō hót er bais da' Kopf gschüttlet.

5.

s ischt a' trüaber neblicher Herbstmorga gwä, wia der Chrißtof aufgwacht ischt. Ond grad so trüab ond nebelich hots ens Chrißtofs sei'm Kopf ausgseha, ond d Annemrei hót älls so a' bisle d Träna weggewischt. Still ischt se em Haus ommer glossa ond hót ihr Sächle gschafft,

¹⁾ gebe die beste Garantie.

²⁾ nachher.

ond der Chriſchtoſ ift langſam en da' Stall nonter; dō ſtöhrt des Füchsle, ganz oſchuldich wia-n a' anders Gäule au, aber der Chriſchtoſ hōt koi' reachte Freud an-em hau' könna. Mōrom et, hōt er selber et reacht gwifft, hoift des, et wissa wölla — o Chriſchtoſ, wenn d wiſtetest, wia viel Kreuz ond Elend dā mit dem Gäule en dei' Haus brengſt, dā tätetſch s glei nemma ond wieder em Juda' brenga! Brengs em wieder, brengs em wieder! — s ift em emmer gwä, wie wenn er des a' Stemm saga haira tät, aber nō ſtreichelt er den Gaul wieder über dia Rippa ond Boiner nonter, mō-n-er nausgſtredt hōt, ond ſait:

„Gib acht Füchsle, wann dā s Bergbaura Haber grefſſa hōſt!“

Nō führt ers raus en da' Hof, mō grad der Märte ſtöhrt. Der rüaſt:

„Jesſes, Bauer, was hent Ihr für a' Märr! Deschjt jō a' Kappaständer!“

Ond er nemmt ſei' Kappa ra ond hentt ſe an ſo en Knocha. Ond bigott ſe bleibt hanga. Ond alle Kneacht ond Mägd, mō grad droscha hent, lachet zſema.

„Haltet eure domma Goscha!“ ¹⁾ rüaſt der Chriſchtoſ,
„Was verſtandet ihr vo' de Gäul?“

„Ond i sag, er ift nez!“ ſait der Märte noh amdl ond gucket nauf zur Annemrei, mō am Fenſchter gſtanda-n ift. Dia nicket. Des verzürnt dā Chriſchtoſ ond er ſait ganz falſch ²⁾ nauf zuam Fenſchter:

„Du niſtſchtf freile zu ällem, was dei' Märte ſait!“

¹⁾ Mäuler.

²⁾ erzürnt.

„Aber reacht hōt er!“ sait ganz ruhich d Annemrei,
„guck no na’, wia des Tierle mit seine Füas frattlet!“¹⁾)

„Was verstdhscht du dervo?“ rüast der Chriſhtof.

„A biſle ebbes schau“, sait d Annemrei, „mei’ Vater
hōt ſechs Gäul em Stall ghet.“

„Ach was!“ brommlet der Chriſhtof; wia-n-er aber
nōd des Gäule noh a’ Weile rongführ ghet hōt, hōt er
ſelber da’ Kopf gſchüttlet ond gmerkt, daß er dia Märr
emmer noh z teuer zahlt hōt. Ond nōd drei Täg ſtōt
er amdl ganz früah am Morga-n auf, nemmt s Füchſle
an d Leine ond gōht mit-em furt. Ond wias Mittag iſcht,
wer kommt dō en da’ Hof rei? Der Chriſhtof ond hōt a’
Schemmelei bei-n-em. Er bends ans Hoftor na’ ond hōt ganz
vergnüagt ausgſeha, wia-n-er en d Stub rauf kommt.

„Annemrei,“ sait er, „aber des iſcht a’ reachts!“

O Annemrei guckt nonter. Des Gäule hōt er wieder
et gſalla’ wollā, fe ſait aber nez weder:

„Ond wia viel höſcht em Juda’ drauf gä müaſha?“

„Nez!“ ſait der Chriſhtof, guckt aber ſei’ Weib et a’.

„Nez, Chriſhtof? Iſch au wōhr?“ ſait d Annemrei.

„Nez!“ ſait der Chriſhtof noh amdl.

O Chriſhtof, was lüagscht? Woisch, was der Ma-
than gsait hōt? Dei’m Weib brauchſcht s et z ſaga, hōt
er gsait, ond du biſcht ſchlecht gnuag ond tuascht, was
de der Jud a’weist. Gloga’ höſcht, zuam aifcha mōl en
dei’m Leaba, dei’ oiges Weib höſcht a’gloga! Chriſhtof,
du dauerſcht me, aber noh maih dei’ arms Weib ond deine
oſchuldiche Rendr!

1) mit geſpreizten Füßen gehen.

„Gfällt der des Schemmele au et?“ frögt er ezet
d Annemrei. Ond eb dia a'-n Antwort geit, rüast der
Märte rauf:

„Bauer, der Schemmel ischt grad so wenich nuz, wie
des Füchsle!“

Ond d Annemrei sait:

„Ich glaub fascht, der Märte hót Reacht.“

„Der Märte ond emmer der Märte!“ sait der Chriſchtoſ
ond tuat en baſa Blick ndch ſei'm Weib ond nō ndch-em
Märte, „was der ſait, gilt bei dir maihnder, weder was
dei' Ma' ſait!“

„Schwätz et, Chriſchtoſ, schwätz et!“ ſait Annemrei,
„Aber guck des Tierle a', ob mer et Reacht hent. S ischt
wieder ner!“

„Dir muß mer geh en goſſena¹⁾ Gaul en Stall
ſtella!“ ſait der Chriſchtoſ ond gđht naus.

Ndch a' paar Täg tuats em Stall dronta en Klapf²⁾),
ond wie mer nonter kommt, liegt des Schemmele dō ond
ſchleglet³⁾ mit alle Füaß ond mer mei't, s werd he'. Mer
ſprengt zua de Nächber, dia kommet ond tent ihre Sprüch,
ond ričtich hót der Gaul s fallet Waih⁴⁾.

„Dō hōſch, Chriſchtoſ,“ ſait d Annemrei, „jetzt mach
no, daß der Jud en wieder nemmt!“

Ond der Chriſchtoſ gđht au mit dem Schemmele
wieder furt ond brengt wieder en andera ond hót natür-
lich wieder drauf gä müaſa, gern feiſhondert Gulde, ond

¹⁾ gegossenen.

²⁾ ſchallender Ton.

³⁾ zappelt.

⁴⁾ die fallende Sucht.

— so kommt oft ei' O'glück nôch-em andre — des Gäule wär ganz reacht gwä, aber s ischt koin sechs Woch'a a'gstanda, nô kriagts a' Sucht ond wird he'.

Was soll e noh weiter verzähla? Nell des Geld, mō dia Gäul kosthet ghet hent, ischt he' gwä, ond s ischt dervo' noh koi' Kreuzer em Juda zahlt gwä, aber om so maih ischt auf dene Papierla gschtanda, mō älls der Chrischtof sein Nama dronter gschrieba ghet hôt. Ond wia Martene komma-n ischt, nô hôt der Chrischtof so viel andere Zieler ond Löh' z zahla ghet, daß em für da' Juda nemme viel übrig blieba-n ischt. „Der Jud ka' warta,“ hoifts emmer bei dene Baura, „der kommt zletschta, z aischte älle andere!“ statt daß se da' Juda' emmer zaischta zahla tätet! Aber der wartet jô so gerâ! Der Chrischtof gôht zua-n-em ond brengt em des Geldle, mō-n-er ghet hôt, ond der Jud sait, s tä gar ner, daß er et maih hâb, s könn jedem so gau', daß ems am Geld fehl, em selber oft au, ond er woll gern warta bis Lichimeß. Ond der Chrischtof schreibt halt wieder sein Nama' na' ond gôht hoi'. Aber wol isch s em en seiner Haut nemme gwä, ond wias älls gôht, wenn d Leut ebbes drückt, nô probiret se s, ob se s et vergessa könnet. Ond mō ka' mers besser vergessa, als em Wirtshaus? Derzua na' isch Wenter, mō d Obet so lang send, ond mer et so viel z schaffa hôt, ond so sieht mer da' Chrischtof älle Obet em Adler. Ond des hätt mer se aischt noh gfalla lau' könna, aber er fangt a', au z viel z trenka, ond wenn er nemma reacht gwîst hôt, was er schwätz, nô hôt er ällerhand verhandlet ond ei'ghandlet, ond am andera Morga, wenn se komma send, nô hâts en gruit, ond mer hôt da' Handel rückgängig gmafft

om a' paar Schoppa Neukauf, mō hōt der Chrischtof zahla
mūsha, ond ischt schau' am Morga em Adler gessa. Ond
mō der Saufteufel ond der Handelsteufel sei' D'weasa
treibt, dō guckt schau' au der Karta'teufel oi'm über da'
Buckel nei', ond der Chrischtof hōt au a'gfanga z Kartla.
Ond wann reicha Baura mit anander kartlet, nō gōhts
glei hauch; so a' Gulde zwanzg send dō glei verspielt.
Ond a' reicher Bauer hōt der Chrischtof sei' wölla, ond
hōt au emmer Geld gnuag ghet — der Nathan ond der
Salomo send jō seine Freu'd gwä — ond daß ers noh
vermög, hōt er au zoigt durch seine Räuf! Dō hōt der
Wagner a' Egg brōcht, ond dort der Sattler a' nūis Gschirr,
ond des hōt mūsha der Zemmerma' em Haus anderschter
mach'a, ond sell der Maurer — lauter Zeugs, mō so
o'naitich gwä ischt, wia-n-a' Kropf. Ond älles hōt Geld
koschtet, ond d Handwerksleut em Flecka hent zahlt sei' wölla,
ond der Chrischtof hōt zahlt, er hōt jō Geld gnuag ghet.
Ond so hōt er kauft ond kauft, ond oft ischt des Sach
o'braucht romglä ond wieder he' woara.

Der Märte hōt henter em Chrischtof to', was er hōt
köenna, daß s Geld et so verschleuderet werd, ond hōt älls
des o'naitich Sach wieder verkauft, aber natürlich mit
Schada. Desch't a'ganga, weil der Chrischtof ällamol
selber nemme gwist hōt, was er bstellt hōt. Wia-n-ers
aber amol merkt, nō wird er falsch ond schempft. Ond
wia der Märte sait: d Bäure häbs en ghoischa — ond so
isch au gwä — nō schreit der Chrischtof:

„Ihr stecket älla'weil bei-n anander ond älla'weil gega
mi! Ufs nächscht Biel fa'scht gau'!“

„Nō wird Euer Säfle vollends ganz he'!“ sait der Märte.

„Des göht jô di ner a'!“ sait der Chrißtof derwider.

„Wega Euch wärs mer wol he“, sait ezet der Märte au hais, „aber wega-n Eurem Weib, dia daulet ¹⁾ me!“

„Mei' Weib göht di noh wenicher a“, rüast der Chrißtof, „verstanda!“

„Ischt reacht! Nô kann-e jô gau! Machet no so furt, Bauer,“ sait er nô au wüatich, „laufet älla'weil zuam Juda', laufet älla'weil ei', laufet alles, was geit — narr wa' mer amöl jonge Teufel rom trait, Ihr send der aisch, mös lauft.“

„Hälscht dei' Maul!“ schreit der Chrißtof wüatich ond langt nôch seiner Peitsch. Nô aber schmeißt der Märte sei' Gabel aufs Pflaster na', daß klirrt, guckt da' Chrißtof scharpf a' ond sait:

„Stöhts so, Bauer? Mein Loh' raus! I gang heut noh!“

Ond d' Annemrei? Se hót am Chrißtofbettlet ond gmahnt, s hót aber ner gholfa, ond der Chrißtof ischt älla'möll bloß wüatich woara. Ond zleischa hót se gar ner maih gsait ond en bloß noh mit ihre grauße trauriche Auga a'guckt. Ond des hót der Chrißtof gar et vertraga könna. Hätt s en gschempt, nô hätt er se wieder gschempt, s wär em reacht gwä, wenn er ebbes hätt wider se ghet, aber wia-n-er au uf jedes Wörtle ond jedes Tätle von der Annemrei uspaßt, er hót koi' O'tädele an er gfonda ²⁾). Aber wol ischts em halt gar et gwä en sei'm Haus, mō derzua na' alles verlottret ischt, ond er ischt maihnder em Adler gwä, weder derhoimda.

¹⁾ dauert mich.

²⁾ nichts zu tadeln gefunden.

O, so a' Wirtshaus ischt a' baise Hoimet. Wo' derâ gôht bloß a' schmals Begle ens oige Haus, ond des Begle ischt oft vom Schnai zuagweht oder gar vo' baise Leut verrammlet, daß mers gar et fendet. Des hôt d Annemrei wol gwist, aber macha hôt se ner könna. Ond ezet hôt se au da' Märte nemme ghet. Glei nôch dem, was ex mit-em Baura gschwâzt ghet hôt, gôht er nauf en sei' Kammer, packt sei' Sächla zsema ond kommt zur Annemrei ra.

„Bhüat Gott, Bäure,“ sait er ond schludet älls so, „bhüat Gott, i gang.“

„Dâ wurscht doch et?“ rüast d Annemrei, „Nô gôht jô vollends älles z Grond.“

„Annemrei, i muaf!“ sait er ond verzählt, wia-n-er sich mit em Baura vero'oinicht¹⁾ häb.

„Ach was,“ sait d Annemrei, „morga-n ischt er wieder anderschter, bleib!“

„Noi, i ka' et,“ sait der Märte, „ond s ischt au besser i gang, vo' wega —“

„No, vo' wega was?“ frôgt d Annemrei, wia der Märte stecka bleibt.

„Wo' wega dene Gschwäzer!“ sait der Märte.

„Was für Gschwäzer?“ frôgt d Annemrei ond gucket-en a'.

„Domme!“ sait der Märte. „Frôg et weiter, i sag noh amdl: s ischt besser, wann-e gang.“

Maish bringt se et aus-em raus. Ob er sein Loh' häb, frôgt se. Noi, sait er, seit-ema' halba Jôhr nemme.

„Ond i kann der-n aischt au et zahla,“ jomert d

1) entzweit.

Annemrei, „gud, Märte, i hau' oft koi'n Kreuzer Geld,
ond der Chriſchtof —“

„Versaufis em Adler!“ fährt em Märte raus, ond
d Annemrei zückt zjema. s ifcht Wöhret gwä, bittere
Wöhret, se höts selber ſchau' oft bei-n-er gsait ghet, aber
s fo vo' fremde Leut haira, ſell tuat waih. Der Märte
merkt s ond macht ſchnell furt:

„Wega mei'm Loh' dürſet er Ich koina Sorga macha.
I hau' mer gottlob älls dia Jöhr rei' ebbes verſpart.
Ond, Annemrei, wann Er a' Geld brauchet —“

Er höt uſghairt, wia-n-er ſieht, daß d Annemrei uſ
da' Ba'k heſigt ond d Hä'd vors Gſicht hebt. Des höt
noh amöl waih to', em Stolz vo' der reicha Blüre waih to',
daß a' Kneacht ihr a' Geld a'bieta muaz. Se ſitzt a' Weile
ſo dd, nô aber tuet ſe d Hä'd vom Gſicht weg ond ſait:

„Märte, dâ biſcht a' guater Mâ ond meiſch guat
mit mer. Weils du biſcht, will e nex weiter ſaga, weder:
wann-e s brauch, hol es zaiſchta bei dir.“

„Aelles was Er went !“¹⁾ ſait der Märte. „D
Annemrei, wer hätt des dächt²⁾ ſelbichsmöl, mō der Chriſchtof
zuam aifchtamöl zua ons rüber komma-n ifcht, daß s fo
gang!“

„Sei ſtill, Märte,“ ſait d Annemrei, „mahn me et an
des! Aber gelt, wann-e a' Hilf brauch, tuſcht mer ſe,
ond kommscht au älls wieder rüber ond guſch't nôch-em
Sächle.“

„Jö des will e, Annemrei!“ ſait ḥer Märte, geiht er
d Hand ond gđht.

¹⁾ wollt.

²⁾ gedacht.

s ischt schau' donkel gwä. D Annemrei macht a' Liacht ond tuat s Marièle ond dā Wilhelm ens Bett. Ond wia se nō so über dia Kender nei' zendl, mō so ruhich ond friedlich schlommret ond vo' all dem Elend ner' wisset, dō faltet se d Hää'd ond schwera Träne fallet er drauf ra, wia se sait:

„Ihr arme, arme Kenderla!“

6.

Em Adler dronta ischt der Chrischtof wieder amd̄l am hella Tag mit so a' paar negnuziche conterkommene Lompa gesssa ond hōt tronka. Dene verzählt er au, wian-er da' Märté furtgjagt hāb. Us der Platt, sait er, hāb er-n aus sei'm Haus gjagt, weil er o'verschämt gwä sei.

„Hösch't Reacht to', Chrischtof," sait der Milchpeter, „ganz Reacht, den alta Schleicher ond Laurer!“

„Aber en dei'm Haus ischt er doch seither schau' amd̄l gwä," sait der Goisafriz.

„Was hōt der en mei'm Haus z schaffa!" sait der Chrischtof.

Die andera lachet ond disemlet¹⁾.

„Wa disemlet-er?" frōgt der Chrischtof.

Dia nicket bloß ond lachet wieder so ane.

„Maul auf!" schreit der Chrischtof ond schlät auf da' Tisch nei', „oder —“

„No', no et so arg, Chrischtof!" rüaft der Milchpeter, „Du wurlch so guat wissa, wia mir.“

„Was soll i wissa?“

¹⁾ flüstern.

„Ha' no' des vom Märte ond vo' —“

„Bo' wem?“

„Bo' dei'm Weib!“ sait der Goisafritz.

Eb er aber no reacht s Maul zua ghet hōt, hōt er vom Chrischtof oi's drauf ghet.

„Was faischt du vo' mei'm Weib ond em Märte?“ schreit er, „Du Lopp, du elender. Dei' Weib ischt en dem Spital frank. D Annemrei hōt ihr Lebtag noh nia ebbes O'reachts tau', ond von Euch lass-e mer mei' Weib zletschta verschempfira!“

„I hau' jō gar ner gsait!“ rüaufet ezet der Goisafritz ond reibt se sei' Maul.

„D Leut schwäzet hält!“ sait a'n Anderer.

„I will ner gsait hau'!“ rüaft a' Dritter.

„Ner gsait hau', ner gsait hau', so hoizts ällamötl, ihr Feza, ihr feige! Stand Diner uf ond sag ebbes wider mei' Weib —“ ond er langt nōch der Flasch.

„Sei gscheit, Chrischtof,“ sait ezt der Milchpeter, „mach koinne domme Sacha. Du höschst freile ganz Reacht, d Annemrei ischt a' fromme, so fromme teant nia ebbes O'reachts!“

Der Chrischtof läßt d Flasch fahra ond sait:

„Ob mei' Weib fromm ischt oder et, gōht euch au ner a', verstanda? Gar ner gōht se euch a', des ischt mei' Weib!“ Ond er leint se en sei'm Stuhl zurück ond gudet dia Kamerada' rengs rom mit wüatiche Auga a' ond nō rüaft er:

„Adlerwirt, noh a Flasch! Machet mer se raus¹⁾?“
Au Karta'!“

¹⁾ spielen wir um sie?

Ond nôch-ema' Weile fizet se wieder friedlich dô ond kartlet. Aber der Chriſhtof iſcht et reaht bei der Sach gwä, er hôt mit-em Behner auf s Aß gspannt ond oi' Spiel oms a'der verlora. Seine Gedanka send mö anderscht gwä; s hôt em gar et aus-em Kopf naus wölla, was dia Leut gsait hent, ond s iſcht em gwä, wie wenn emmer Diner henter-em ständ ond saga tät: „der Märte ond d Annemrei“, ond dia Karta'dama hent älle ausgseha wia d Annemrei ond der Buab wia der Märte. Also d Leut hent ſchau' ebbes gmerkt, denkt er, ſe ſend au et blend. Ond der Märte hôt d Annemrei früher älla'weil gern ghet, ond iſcht glei mit uf da' Bergemer Hof zoga, ond d Annemrei hôt-em emmer Reacht gä! Wann doch ebbes dra' wär!

Er wird emmer o'ruhicher, ond wia-n-er au de zweit Flasch hôt zahlra müaſa, ſchmeiſt er d Karta' he' ond ſait, heu't häb er ällaweil O'glück, ond ſtöhrt uf ond gôht hoi'. s iſcht aifcht am Dämer gwä ond er hôt gwiſt, vor zwei Stond denkt d Annemrei gar et dra', daß er hoi' komm, ond er ka' ſe o'verſehens treffa. D Kuche iſcht henta naus ganga ond mer hôt könna vom hentra Gärtla aus nei'seha. Dô na' ſchleicht er ond gucket nei', ond weil a' Fenschter offa gwä iſcht, hôt er au ghairt, was drenna gſchwätz wurd. s iſcht d Stemm vo' der Annemrei gwä, ond au de a'der Stemm hôt er kennt ond a' hais Gſicht na' gmacht. Die Stemm hôt freile et em Märte ghairt, aber dâfür em Salomo. Der iſcht komma, so lang der Chriſhtof em Wirtshaus gwä iſcht, ond was er dô will, hôt ſich d Annemrei ei'bild.

O des iſcht für so a' Weib noh s ällerschwerft, wann ſe au muaf noh selber mit dene Leut omgau', mö ihrn

Ma' ens Verderba brenget. Se will drom gar ner vom Salomo ond erst wia-n-er sait. er häb ebbes gar wichtichs mit er z schwäza, s gang sonst ihrem Ma' ganz schleacht, geit s em Ghair. Er ziaht wieder so Papierla raus ond rechnet er vor, was der Chrißtos älls zahla müaz, ond d Annemrei haitz zua wia halba em Trom. Aber des sei jö o'möglich, sait se, s sei koi' Geld dd, au no, daß mer oi's vo' dene Papierla zahl. Der Salomo beugt se so über da' Tisch rüber ond guckt se mit so eigene Auga a' ond streckt sei' Ha'd mit oi'm vo' dene Papierla rüber an de ihr na' ond sait:

„As ich leb, ich zerreiß es, wenn die Bergbäurin, was ischt eine schöne Frau —“

D Annemrei sprengt auf. Jezzes, s ischt schau'. em Dämer, ond sia sitzt mit-em Juda' alloi' en der Stuba.

„I muaz naus ond Guier macha!“ sait se ond gähnt naus, schlät d Tür zua ond läßt da' Juda' sitza. Ihr Gsicht ischt fuierraut, et bloß vom Schei' vo' dem Guier em Heerd, ond se ôtmet schwer ond legt äls d Ha'd ufs Herz. Uf oi'möl stöhnt der Salomo au en der Kuche ond hdt zwei so Papierla en der Ha'd ond guckt älls furt auf des Weib mit ihre schöna Hör ond dene Auga ond suit nô:

„Nu was isch? Hab ich hier zwei. Sollen fliegen ens Feuer, wenn die Bäurin mir gibt en Kuß!“

D Annemrei guckt en a' ond aus ihre trauriche Auga send a' paar grauze Träna ganz langsam außerkommæ, enwährend se mit der Ha'd nôch der Guierklamm langt. Schwäza hdt se zaishcta' ner könna, bloß emmer da' Salomo a'guckt. Ond wia a'guckt! A' Stoi' wär woich woara vo' dem Elend, des aus dene Auga rausguckt ond se en

dene Träna gsieglet hdt. Aber was macht des so ma' Juda'!

Er guckt se au a' Weile a', macht nô en Schritt zua-n-er na' ans Juier ond hebt sei' Ha'd mit dene Papiere auf.

„Nu soll ich?“ frôgt er ond kommt noh nächer.

Jetzt aber, gôht d' Annenrei en Schritt zurück, aus ihre Auga send koin Träna maih raus komma, aber gfonklet hent se, ond zittert hdt se am ganza Leib, ond d' Juierklamm hdt se feschter packt, wia se rüaft:

„Naus aus meiner Kuche, em Augablick naus!“

„Gott, wie hizig!“ sait der Salomo, ond weil er dia Klamm et gseha hdt, kommt er noh nächer. Schau' streckt er da' Arm noch er aus, dô packt en Diner vo' henta am Gnic, lüpft en en d Höh wia en Flederwisch, reift em seine Papiere raus ond schmeißts ens Juier. Ond der Chrißtof — der isch gwä — dreht se rom, macht Kuchetur auf, ond nonter romplet der Salomo d' Stiag.

„Dô na' ghairscht du,“ schreit er em noch, „ond des Geld uf dene Schei' ka'scht ens Kame' schreiba!“

Der Salomo stöhnt mühsam auf, henkt an d' Haustür na' ond wia-n-er d' Schnall¹⁾ en der Ha'd hdt, rüaft er:

„Werden sehen, werden sehen. Der Salomo vergisst nicht!“

Ond nô gôht er naus ond brommlet:

„Dummer Bauer, jetzt wirst meschulle!“ Ond nô lachet er so teufelmäßig ond sait:

„Läß brennen die Papiere, was bloß sind Abschriften!“

¹⁾ Thürklinke.

Der Chriſchtof gđht wieder en d Kuche nei'. Dō ſiſt d Annemrei uf-em Kucheschemel ond heult. So ebbes iſcht au ema' feſchta Baurawieb z viel, ond wann zua ällem Elend au noh fo a' Gſchicht dazua kommt, nô iſch fo' Wonder, wann ſe heult. Ond uf em Schoß hōt ſe da' heulicha Wilhēlm, ond neba-n-er ſtōht s Marièle, ond om dia hōt ſe da' Arm glegt. Dia Kender ſend raus komma, wia ſe des Grömpel¹⁾ uf der Stiaga ghairt hent. Ond wia der Wilhēlm d Muater heula ſieht, nô hōt er au aſfanga z heula ond s Marièle ſait:

„Muaterle et heula!“ ond zieht ihr Sacktüachle raus ond wiſcht er älls d Träna von de Bača ra. Ond mitta onder des Heula nei' hōt derwega d Annemrei aiſcht noh a' biſle lacha müaſha.

Der Chriſchtof ſtōht a' Weile dō ond ſchwätzt ner. Endlich rüaſt er:

„Der S... tſjud, wann er no ſei' liederlichs Gnič bročha hätt! Mi daulet no mei' Stiaga. So a' Kerl iſcht et wert, daß er über a' oardeliche Stiag na ſtiagt. Du Hemmel — — —“

D Annemrei ſprengt auf, packt da Chriſchtof am Arm ond rüaſt:

„Fluach et, Chriſchtof! I dank der, daß d zur reačta Zeit komma biſcht. Zwör mei' Guierkamm dō hättſ au to', aber s iſcht halt doch guat, wa' mer en Ma' hōt, mō oi'm ner gſcheha läſt.“

Der Chriſchtof ſait ner weder: „Wärle, s iſch guat.“ Er ſchämt ſe, daß er hōt no au vo' ſeiner Annemrei ebbes

¹⁾ Geräusch eines Fallenden.

D'reachts denka könna, ond freut se nô wieder, daß er se
em Wirtshaus ond en sei'm Haus so guat verteidicht hâb.

D' Annemrei macht furt:

„s isch doch gwâ, wia wann de o'ser Herrgott her-
geführt hätt, glaubſch et?“

„Jô schö' o'ser Herrgott! Der Eifersuchtsteufel — au
oiner vo' dene, mû se schau' d Hä'd reibet, wann amdl
oiner vo' so viel andre bseffa-n ischt! Der Chriſhtof hôt
se noh amdl gschämt ond d beschte Vorsätz gfaſt.

„Weib,“ sait er, „i will glaubich wieder maih der-
hoimda' bleiba!“

„Jô tua des!“ sait d Annemrei. „Komm Mariele,
patsch em Vater ei! Wilhelm, kaſcht em Vater au en
Schmaß gä?“ Ond des Mariele kommt her, a' bißle schui,
ond geit em d Hä'd. Ond s Wilhelmle streckt seine
Äermla naus ond packt em Chriſhtof sein Bart. Ond
der nemmt da' Wilhelm uf da' oina Arm ond s Mariele uf
da' andera ond traits en d Stub eine. Ond nô bleibt er
derbei, wia d Annemrei dia Rendedens Bett tuat, ond wia
se mit en beat, nô legt er au seit langer Zeit wieder
amol seine Hä'd zsema. Ond er beat leis mit, wia d
Annemrei aus dem alta ſchöna Liad hersait:

„Die Neuglein ſtehn verbroffen,
Im Nu ſind ſie geſchloſſen,
Wo bleibt dann Leib und Seel?
Nimm ſie zu deinen Gnaden,
Sei gut für allen Schaden,
Du Aug und Wächter Israel.“

Ond er legt selber em Mariele, mû-n-er hôt ganz
bſonders möga, d Hä'd auf da' Kopf, wia ſe weiter macht:

„Breit aus die Flügel beide,
O Jesu, meine Freude,
Und nimm dein Küklein ein.
Will Satan mich verschlingen,
So laß die Englein singen:
Dies Kind soll wol bewahret sein.“

O Christof, dô lieget se, deine Engel, mô di bewahra sottet; guks no reacht a' deine Kinderla, denk dra', was mit dene wurd, wann du en Haus ond Hof he' machscht. Ond dô sieh dei' Weib a'! So hent ihre Auga schau' lang nemme gleuchtet, wie ezet. Siehscht et den Engel dur d Kamer geha? Er hebt da' Fenger auf, er warnt de noh amôl, s' Letschimôl, Christof, s' ällerletschimôl. Folg-em, guck, dei' Weib streckt der au d Ha'd na'; nemm se, laß se nemme fahra, sag er, was dâ bischt, a' reacht schlechter Ma', beicht er alles, se verzeiht der alles. Christof, was isch, witt et?

Jô er will. Schau' streckt er er d Ha'd he', dô hôt der Teufel a' Magd en d Stuba gführ't, dia rüaft:

„Bäure, mô send er? Der Märtle isch dô ond will Jô ebbes saga!“

Dô kommet em Christof alle dia baiße Gedanka wieder, er zieht sei' Ha'd zurück, gôht naus en d Stub ond sait zua derâ Magd:

„Sag em Märtle, i sei' derhoimda, ond wann er noh amôl en mei' Haus komm, nô mach ems wie em Juda.“

Ond da' ganza Obed schwätz er ner maih.

7.

Für da' Chrifhtof ifcht ejet a' baiſe Zeit komma.
Zwôr er bleibt wieder a' Weile verhoimda, wega de Juda',
ſait er, au wega-m Märte, denkt er. Des ifcht aber a'
bais Warta, wa' mer uf da Juda' wartet ond noh a
baisers, wa' mer sei'm Weib et traut. Ond vo' dene hoide
ifcht aifcht koiner komma. Der Märte et, weil er denkt
hôt, wenn der Chrifhtof wieder nôch-em Buig ſeh, nô
brauch mer ehn et, ond der Jud au et. Der Salomo
ſchau' vornaweg et: mer gôht et gerâ a' Stiag nauf, mô
mer amôl ſo arg ſchnell ra ganga-n ifcht, ond aparte et,
wa' mer a' Jud iifcht. Aber au der Nathan ifcht et
komma. Was brauchet dia au uf da' Bergemer Hof z
laufa! s Amt ifcht näher ond tuats au. Ond derzua
ifcht oi' Briesle oms a'der an da' Chrifhtof komma, er foll
zahla, vo' Leut, maiſchtens au Juda', vo' dene er sei'
Lebtag ner ghairt ghet hôt. Geld hôt er uf oi'môl zahla
ſolla, vo' dem er ganz gwîß gwîßt hôt, daß der Jud s
aifcht ema' halba Jôhr gwöllt hôt. Er ſchreibis dene Leut,
er gôht au zua-n-en ond faits. Des gang ſia ner a'
ſaget fe, was der Jud gsait häb, ſia häbet dia Schuld
von-em kaufst ond fällich ſei ſe ond zahlt werda müaß, ſia
brauchet ihr Geldle. Aber koi' Geld ifcht et dô gwä ond
der Chrifhtof ifcht zu Pontius ond Pilatus gloffa ond
hôt a' Geld wölla. Aber mô-n-er na' komma-n ifcht, hent
ſe d Achsla' zucket ond gsait, wias mit de Hypotheka' stand
uf ſei'm Hof? Ond uf dia Frôg hôt der Chrifhtof koi'
A'wort gä können, weil uf jedem Aeckerle ſchau zwei
gwä ſend.

Der Chriſchtoſ sieht, daß ejet em Gant zuagöht, aber dra' na' hōt er et möga, er hōt emmer noh der reich Bauer ſei' wölla, drōm gōht er wieder uf d Märkt ond nemmt dō na' a' Küah mit ond dort na' en Gaul, et zuam Verkaufa, ſait er, bloß zuam Verhandla. Aber ällamöл verkauft ers ond vo' alle Küah ond Gäul, mō dō gwā ſend, ſait er, gfall em koi's, er kauf nō uf-em nächſta Märkt an anders Stück. Ond uf-em nächſta Märkt hōt em wieder koi's g'falla ond des Geld mō-n-er ei-gnomma hōt, wandert ällamöл glei en der nächſta Stond zuam Juda', ond iſcht doch gwā wia-n a' Tropf ens Meer. Ond bei deam Leba ſangt er natürlich au s Stomſiza en dene Wirtshäuer wieder a' — wia ka's au anderschter ſei'! — ond dō tuet er grauß, wia en alte Zeita, wia wann er noh der reich Bergbauer wär.

Ond d Annemrei hōt oft koin Kreuzer Geld ond ſchafft ſich a ond wird alle Täg mägerer ond elender. Ond wann der Chriſchtoſ hoi' kommt, iſcht er aifcht noh wüaſcht zua-n-er, ond bloß wenns Marièle älls zua-n-em herkommt, iſch gwā, wia wann a' guater Engel bei-n-em ständ, ond er hōt ſe verkuſt ond verheibelt ond iſcht ganz narret gwā mit dem Ke'd. Ond em Stilla hōt er dächt: „Noi', dā kaſch et verantworta, daß deine Ke'derle follet amöл ner ſei', weder arme Küahbäuerleskender, dā muascht der Hau en Stiel dreha! Ond wärſ no wega-m Marièle.“ Wenn aber d Annemrei nō denkt hōt: ejet kaſcht ebbes ja, ond no a' Wörtle ſait, er foll doch dia ganz Sach andersch't macha foll ſe en Gant gä, nō breng mer vielleicht noh a' Paar Güilde raus, nō wurd er grob ond ſait, des gang ehn a', ond ſia verſtand doch ner dervo'.

„Was muß dir noh gscheha, eb dei' Stolz bricht!“
sait d' Annemrei amdl, wia-n-er wieder wüascht gega-n-er
ischt. „Ond was isch für a' Stolz? Neg weiter weder a'
Bettelstolz!“

„Du treibscht oin mit Gwalt aus-em Haus naus!“
sait er uf dia Red vo' der Annemrei, stöhnt uf, nemmt d'
Kapp ond gähnt en Adler na.

D' Annemrei sait neg ond läßt en gau', aber Angscht
ischt er's gwä, bis er hoi' kommt. Ond heu't ganz bson-
ders, se höt selber et gwisst mórom.

Wia-n-er a' Weile furt gwä ischt, kommt der Märte
rei' ond frøgt: „Ischt der Bauer et dô?“

„Jesse, Märte, gang!“ rüaft se, „Wann mei' Ma'
kommt, geits ebbes.“

„Wa wurd's gä?“ sait der Märte.

„Dâ woischt, was er gsait höt, wann dâ noh amdl
en mei' Haus kommescht.“

„A wa,“ sait der Märte, „i hau' ebbes mit em
z schwäza.“

„Du? Was denn?“

„Sell will e em selber sa.“

„Saisch¹⁾) mir eta?“ frøgt d' Annemrei, „I wills em
nô austräcta.“

„No', i ka's dir au saga, s ischt vielleicht au
guat, wann e di drüber frøg. Vorher aber ebbes an-
dershtrs! Annemrei, hau'-n-i amdl ebbes O'reachts vo'
der wölla?“

D' Annemrei guckt en grauß a' ond sait: „Du von

¹⁾ sagst es.

mir? Was soitesch̄t du vo' mer wölla hau'? Dein Loh'
höf̄cht et wölla, des iſch. Wutt den heim Baura hola?"

"O du o'schuldichs Weib!" denkt der Märte, räusperet
se ond sait:

"Höf̄cht au noh nia ebbes vo' dene Gschwäzer ghairt?"

"Bo' wele? I komm nerga¹⁾ he' ond hair ner."

"No', von dene Gschwäzer, mō dei' Ma' selber en de
Wirtshäuser rom macht."

O Annemrei höt emmer noh ner verstanda. Der
Märte räusperet se noh amdl ond sait nō:

"s göht mei' ond dei' Ehr a', Annemrei, i muaz
ders saga. O Leut saget, ond dei' Ma' schwätz̄t au a'so —"

"Was saget se?" frôgt d Annemrei, „Sags no raus,
Märte, i be' elend gnuag —"

"Dâ häbesch̄ mit mir²⁾!" sait der Märte.

"Was saisch̄t?" frôgt d Annemrei, wia wenn se et
reacht ghairt hät.

"Du häbesch̄ mit mir!" sait der Märte noh amdl.

O Annemrei sait ner, se gucket bloß emmer uf oin
Fleck uf-em Boda na' ond der Märte schwätz̄t a' Weile
au ner. Endlich sait se leis:

"O Gott, au des noh? Vater em Hemmel, desch̄t
z viel! Wann dâ me no vō' dera-n Erd nemma tätesch̄t!"

Ond nō iſch̄ts wieder ganz still en der Stuba woara,
ond mer höt da' Holzwurm en dene Bälka piča haira —
o so a' Wurm nagt am Glück vo' der Annemrei, ond
bald wurd alles zsemabrech̄a.

¹⁾ nirgends.

²⁾ habest ein Verhältnis mit mir.

Der Märte woiß au et, mō wieder a'fanga, ond ischt
au ganz still dōgsessa a' guate Weil.

Uf oiml hairt ma' aus der Kamer raus s Mariele
em Schlöf schreia: „Mueter!“ ond d Annemrei sprengt auf.

„Meine Render!“ rüast se, „s oizich was e noh
hau! I will au des traga! Ueber o'sern Heiland hent
se noh ärger gloga, ond er ischt jō viel o'schuldicher gwā,
weder i. Aber gang, Märte, gang, laß me alloi', i muß
zaischta mit o'serm Herrgott fertich werda, nō kann-e viel-
leicht wieder.“

Der Märte sieht, daß er dō ner tröschta ka', er stöhnt
drom auf ond schau' em Geha seit er:

„Was e hau' sa wölla, Annemrei, i hau' a' Erb-
schaft to' vo' meiner Annabäas drüba en Amerika, woisch
dia, mō den reicha Schmid drüba kriegt hōt, ond hau' de
pressantesche Schulda vom Juda' kaust, dā därscht loi'
Angscht hau', daß se der dei' Haus verkaufet. Des han-e
em Baura sa wölla, vielleicht daß er se doch nōh bseennt.
Zeit gwnna ischt alles gwnna.“

D Annemrei stöhnt uf. Se woiß et, wia-n-em danka
ond strecket em d Ha'd he', ond der Märte nemmt se
ond seit:

„Ißh reacht so, Annemrei? Bhuet Goti!“

„Sieht mer ezet dia Lompa, dia elendiche!“ schreit
dō a' Stemm, ond der Chrischtof mit ema' rauta Kopf
torslet¹⁾) en d Tür rei' ond hōt en Steck en der Ha'd.
Ganz fescht ischt er et auf seine Füaß gstanden, er ischt vom
Adler komma, mō er wieder amol d Karta' he'gschmissa
hōt ond hoi'glaufa ischt.

1) taumelt.

„Hödt mer ich ezet verwischt?“ schreit er noh amöl,
göht uf da' Märte los ond hebt sein Stecka-n uf.

„Sei gscheit, Chrischtof,“ sait der Märte, „i hau' nia
ebbes D'reachts vo' dei'm Weib wölla, ond sia et vo' mir.
I be' wega-n ebbes ganz anderschters dö.“

„Verloga-n ischts, du Schleicher,“ schreit der Chrischtof
emmer wüticher, „naus aus mein Haus! Ond mit dir,“
sait er gega sei'm Weib, „du schei'heilichs Mensch, mit dir
schwäz-e a' anders Wörtle. Wia dö! Guck me a'!“

Ond er packt se am Arm, daß se nausschreit, ond
schüttlet se ond hebt sein Stecka auf, ond ebs der Märte
höt hendera könna, zieht er er mitta-n übers Gsicht en
Stroich ra, ond schau' hebt er noh a'möl sei' Ha'd, dö
reißt em der Märte da' Stecka raus, verbrißt en ond
schmeißt en en en Wenkel. Ond nö packt er da' Chrischtof
am Arm ond drückt en an da' Ba'k nüber.

„Dö füsscht na',“ sait er, „ond hairscht, was i sag!“

„Was witt du saga, du Lomp, a' Kneacht, mō mer
aus-em Denßcht gjagt hödt.“

„Oha, Bauer!“ rüast ezet der Märte, ond sei' Stemmt
höt au zittret. „I be' so viel wia-n-Ihr, ond maihnder.
I hau' et mei' Geld ond Guat versoffa, i hau' et Weib
ond Render ens Elend bröcht, mir ka' ko' Mensch ebbes
D'reachts ndchsgaga!“

Der Chrischtof sprengt wieder auf, aber der Märte
drückt en wieder uf da' Ba'k na'.

„So, ko' Mensch? Aber i, i der Bauer vom Bergemer
Hof. Dö ben i Herr, dö sag i, was e will ond was
d Wöhret ischt. Mei' Weib ond du —“

„Du Herr?“ lachet der Märte ezet naus, „Du der

Herr! Koi' Stückle maih ghairt dei', koi' gozichs. Naum
meh der Ba'k, uf dem da fizicht. Ond wenns wissa witt,
wems ghairt, d Hälste em Juda' ond de ander Hälste
mei! Hösch ghairt, Chriſchtoſ, mei! Dem Kneacht, mō dā
furt gjagt höſcht! Ond wann e will, jag i di morga aus
dei'm Haus naus. He, Bauer, hent Ers verſtanda?"

Der Chriſchtoſ guckt en a', ob er au reacht ghairt
Häb ond schreit nō: „Du Luga'beutel!"

„Witt d Papierer feha?" sait der Märtē ezet au
wütlich, „Morga ka'sch uf em Röthaus alle feha ond über-
morga zahlſicht oder i laß dei' Säckle verkaufa. Saſch
ezet nōh amdōl: Luga'beutel?"

Ezet sprengt aber der Chriſchtoſ auf, ballt seine
Fäuscht ond rollet seine Auga ond schreit:

„Nells verkauft, älls verkauft! Furt mit Schada!
Ond dia dō," er zoigt uf sei' Weib, „dia neruzich Denge
Kriagscht drei'."

Ond er packt se ond schuckt se zua-n-em na'.

„Dō höſcht se, dei' —"

„Chriſchtoſ, Chriſchtoſ," schreit ezet d Annemrei naus,
„halt ei'. Sag Nelles, no des et!"

„Halts Maul!" schreit der Chriſchtoſ, „i will ner
haira, ner will e wissa weder von dir weder vom Märtē!"

Ond er gđht en d Kamer nei' ond rieglet d Tür
henter em zua.

„Ond du gđhscht dort nei' ond riegleſcht au zua!"
sait der Märtē ond zoigt uf d a'der Kamer. „Guat
Nacht!"

Ond er gđht furt ond zuam Haus naus. D Annemrei
aber bleibt uf-em selba Flecka fiza ond gucket ens Biächt

nei' ond hót d' Aerm uf da' Tisch gestützt ond d' Hä'd zsemaglegt. Des Liacht brennt ronter, se merkts et; ezet flackreits noh a' paarmöl auf, nô verlischts. Dô stöhrt se auf. Se fährt sich mit der Hä'd über d' Stirn, mô a' rauter Strich von dem Schlag gwä ischt, wie wann se sich bessena müaßt, mô se eigentlich ischt. Nô gôht se ans Feaschter ond macht auf, daß de kalt Nachtluft reikommt, ond guckt an Hemel nauf. Koi' Wölkle ischt am Hemel, ond dia Sternla glizret ond fonklet, daß a' wahre Pracht ischt. Nelles ischt still, bloß em Stall hâts a' paarmöl bocklet,¹⁾ ond der Bronna em Hof hót so ane plätscheret. Em Dorf ischt niane²⁾ maih a' Liacht gwä, bloß en oim Häusle noh so a' kleiner Schemmer. Dort leit a' Kranks, dem mer all Täg uf da' Taud paht hót.

„Lägescht du an derâ Statt!“ sait se, „Dir wär wöhler!“

Nô schaudert se zema en dera kalta Nachtluft ond macht s Feaschter zua. Em Donkla tappet se en dia ander Kamer nei' ond kniat vor der Bettstatt nieder ond beatet. Ond ihre letzte Wort send: „Laß mein Ma' et büasha, was er gsendicht hót. Ach Gott, was muaz über den noh komma, bis er anderscht wurd! Lieber Gott, machs et gar z arg mit-em; s ischt halt doch mei' Ma' ond send o'sre Kenderla!“

Dô ganget er d' Wort aus, ond bloß noh ihre Lippa hent sich gregt. Ond au dia send so nôch ond nôch ruhicher woara, ihr Kopf senkt er en d' Hä'd ufs Bett na', ond so schlöft se ei'.

¹⁾ ein stoßendes Geräusch machen.

²⁾ nirgends.

8.

Desch't a' traurich's Aufwach'a' gwä am andera Morga en dem Haus. Der Chrischtof ischt en äller Früah vo' de Kender gweckt woara, hdt's a'zoga so guat er könnt hdt, aber et gwißt wa saga', wia se gfrögt hent, mò den d Muater sei. Wia des fertich gwä ischt, gôht er furt.

W' bisle ndcher ischt d Annemrei aufgwacht; alle Glieder hent er waih to', ond ihr Kopf hdt er brennt. Langsam kommt se raus aus der Ramer. Dö saits Mariele:

„Muater, was hdscht du uf der Stirn!“

„Nex!“ sait d Annemrei ond sezt nd schnell derzua: „Frög et, Kend, frög nia dernndch!“ Ond nd nemmt se ihre Kender en da' Arm ond verkühts, daß dia et wisset, was ihr Muater hdt.

Langsam, arg langsam ischt der Tag verganga. D Annemrei hdt fascht gar ner gschwätz, bloß andl en kneacht gfrögt, ob er ner vom Baura wiß. Der sait, er sei am Morga en äller Gottesfrüah furt ganga, mò na', wiß er et. Nelles hdt der Annemrei heu't waih to' en de Auga ond en de Auhra ond sogar em Mariele ihr Gschwätz, mò. er sonst emmer d Traurigkeit weggnomma hdt. Se ischt drom froh, wia dia en Hof nonter gôht ond dd mit Sa'd ond Stoi'la schempflet¹⁾.

Ndch-em Mittagessa ischt a' Botshaft vom Märte komma: was er gestich zuam Baura gsait häb, gelt ner. Se werd nd schau' wißa, was? rißt der Bot aus.

¹⁾ spielt.

s ischt er au des oi's gwä, ob vollends s Häus ond der Hof bälder oder später z Grond gôht. Daß der Mârte bloß em Born droht hôt, hôt se sich freile glei ei'bildt.

Endlich isch Nôchmittag woara, endlich läutet d Beperclock ond d Annemrei stöhrt unter der Haustür ond gucket em Mariele zua, wia di grad am Hofstor, mò offa gwä ischt, am Boda sitzt ond a' Häusle aus Sand uf Sand baut. s ischt er des Gleichnis ei'gfalla vom Haus auf Fessa gredet¹⁾ ond vo' dem auf Sand banta'. Auf Fessa ischt a' Haus baut, wann der Ma' onds Weib en Frieda ond Ei'tracht leabet ond rechtschaffa vor Gott ond der Welt wandlet, aber auf Sand, wann der Ma' sei' Sach vertuet ond mit-em Weib et reacht haust. Mô se rei' zoga'n ischt en ihr Haus, hôt se gwîz gmoi't, s fehl et am feschta Grond, ond ezet? Wann wurds voll zsema falla?

Se stöhrt nôchdenksam dô ond paßt et ufs Mariele auf; uf oi'môl hört se s Trappla vo'-ma' Gaul des Bergele vor-em Hofstor rauf.

„Mariele gang weg!“ schreit se ond wia dia langsam vom Boda aufstöhrt, sprengt se na' ans Tor. En dem Auga'blick kommt der Kopf vo'-ma' Räpple zuam Tor rei'. Der Gaul verschrickt an der Annemrei, mò uf oi'môl vor-em stöhrt, macht en Saz, schlät naus, d Annemrei fährt zurück ond sieht, wia der Gaul wia wütich em Hof rom sprengt. Ond drauf sitzt der Christof, ohne Sattel, bloß mit-era' Decke', ond schreit:

„Hebet da' Gaul! Verflucht's Räpple!“ Aber loi' Kneacht ischt om da' Weg, ond d Annemrei sprengt selber

¹⁾ gegründet.

dem Gaul ndch ond hdt et amdl ndch em Mariele guet. Aber der Gaul macht noh a' paar wüatiche Sätz, ond eb se en hdt fanga könna, schmeiht er da' Chrischtof ra grad an da' Ecksto'i von sei'm Haus he'. Nd bleibt der Gaul ganz ruhich stau'. D Annemrei sprengt zuam Chrischtof na'. Der liegt mit zuane Auga dd ond schnaufet härt. Ezet kommt au Leut ond d Annemrei hairt, wia Dine sait:

„Mariele, was hdscht? Stand uf!“

„Dem Rend wurd doch ner sei!“ rüast d Annemrei, läft da' Chrischtof liega ond sprengt ans Hoftor nom. Dd liegt s Mariele uf em Gficht. Se lupft se auf ond tuet en Schrei, en Schrei, wia-n-en bloß a' Muater to' ka'. En der Stirn vom Mariele ischt a' grauß Loch vo' de Huf von dem Gaul, ond s Bluat schiaft no so raus.

„Ganget zuam Dokter, tapfer tapfer!“ schreit d Annemrei ond nemmt s Mariele en da' Arm. Wia se s aber rauflupft, tuet s Mariele da' letscha Seufzer. Ond ihr tots Rend em Arm stöhnt des arm Weib vor-em Chrischtof.

„Chrischtof, Chrischtof, wach auf!“ rüast se, „Dd guet bei' Mariele!“

Der schlät d Auga-n a' bisle auf, sait mit era' ganz fremda Stemm:

„Des Käpple, jö jö des Käpple!“ ond macht d Auga wieder zua.

Ezet trarget se en rauf en d Kamer ond neba-n-a' na' leget se s Mariele ond jomret ond teant. Dd kommt au der Märte. Er treibt dia Leut naus ond fangt a' mit

¹⁾ schnell.

der Annemrei da' Chrischtof auszieha. Bald kommt der Dokter. Er gucket s Mariele a' ond sait, dô sei ner maih z hoffa, ond ontersuacht nô da Chrischtof ond schüttlet da' Kopf. Der reacht Arm ischt a gwä, ond a' paar Rippe brocha ond sonst ällerhand verschonda ond verquetscht. Ob er et ennerlich au a' Leze ghet hôt, hôt er noh et saga können. Er macht seine Verordnenga ond gôht wieder, ond am Bett vom Chrischtof fizet d Annemrei ond der Mârte de ganz Nacht ond machen Ueberschläg, ond der Chrischtof leit dô ond hôt ner von-em gwist. So leit er au da' nächsta Tag ond da' übernächsta ond hôi et ghairt, wia d Glocka zsema gläutet hent, ond mers Mariele naus tra hôt uf da' Kirchhof. s ischt wia-n-a' Engele em Sarg glä, ond über dia Löcher en der Stirn ischt a' Kranz vo' Emmergrea ond Beigela rüberganga, de aischte en dem Jôhr. Ond wia mer da' Sarg nonter to' hôt, nô fliegt grad über em Grab a' Lerch nauf en da' blôda Merzahemel, haicher ond emmer haicher, bis koi' Menschenaug se maih gseha ond koi' Ohr ihr Liadle maih ghairt hôt.

Dâ siehsch dei' Kendle nemme ¹⁾), Annemrei, en derâ Welt nemme, dâ hairscht ihr Lacha nemme ond se trocknet der koinen Träna maih a. Nemme, Annemrei, — o des tuet arg waih, ond die Troischtsprüch, mô der der Pfarrer sait, dâ hairschts kaum. D Welt ischt so schö' ond so glänzich, ond s wird geh bald Frühleng, ond auf dem Gräble wachset nô Bloma von alle Farba, aber dei' Herzblättle ischt der gnomma, gnomma durch dein oigena Ma'. Des tuet noh am ällerwaihschta'. Jezet ka'sch den Versch aus

¹⁾ nicht mehr.

der Bibel et verstaū', den der Pfarrer grad liest, aber vielleicht lernsch au noh, daß dā saischt: „Der Herr hats gegeben, der Herr hats genommen, der Name des Herrn sei gelobt!“

9.

Nöch vier Täg hdt der Chrischtof wieder d Auga aufgmacht. Er gucket rom en der Kamer ond frôgt, mō-n er sei. En sei'm Bett, sait mer em. Wia-n-er dō na' komm, er sei doch grad zua sei'm Hofstor rei' gritta. Ezet verzählt mer em, was passirt sei, sait em aber noh et, wias mit sei'm Mariele ganga sei. Aus ehm isch nd au so nöch ond nöch en de nächsche Täg außerkomma, daß er uf-em Markt des Räpple gseha häb, ond s häb en eba wieder gar so arg gluschtet, ond zletschta häb ers kauft, weil er häb dermit au d Annemrei verzürna wölla.

„Dö des hau'-n e wölla,“ sait er ond gucket d Annemrei a', „so ben-e gwä. s ischt mer reacht gscheha, daß des Räpple me ra gschiessa hdt, des hdt mer ghairt.“

Ond er will der Annemrei d Ha'd gä, aber kann da' Arm et rega. Se sait em, daß der brocha sei, ond der Chrischtof liegt wieder lang still dō ond schwätz ner. Endlich sait er ond guckt derbei nöch seim Weib ihrer Stirn:

„Annemrei, guck des ischt der Arm —“

„Laß sei', Chrischtof,“ sait d Annemrei, „dā sollescht de et aufregga, hdt der Dokter gsait.“

„Roi', Annemrei,“ sait der Chrischtof, „raus muasch! Muasch et glauba, s sei wieder so a' Gschwätz, mia älls so'scht, s ischt mer Ernscht, hoilicher Ernscht. Glaubſch?“

„Jö, i glaubß!“

Ond ezet fangt er a' ond beicht er alles vo' dōmōls a', mō-n er se zuam aischtamōl a'gloga hōt, ond sail nō:

„Ka'scht mer verzeiha, Annemrei? J be's jō et wert, ond guād, guat macha ka' e au et wieder alles —“

D Annemrei denkt ans Mariele ond d Träna kommet er.

„Wa hōsch, Annemrei?“ sait der Chriſchtoſ.

„J ka' ders au et hehla,“ sait dia, „s Mariele —“

„Wa isch mit dera? Derf e fe ejet et au wieder seha?“

„D Chriſchtoſ, dia siehſcht nemme, dia hōt mer am voricha Freitich vergraba.“

Der Chriſchtoſ fährt auf, richt ſich em Bett auf, gucket d Annemrei mit grauße Auga a' ond sait:

„s Mariele? Des ka' et sei!“

Wia-n-er aber ezet d schwarze Lüachle an der Annemrei ſieht, ond dia s em noh amōl sait, nō fällt er ens Bett zruck ond macht d Auga wieder zua. Wia-n er nō d Auga nōch-ema' Weile wieder aufgmacht hōt, nō ischt ſei' aischte Frōg, an was denn s Mariele ſo ſchnell gſtorba ſei. D Annemrei wills et ſaga, aber er frōgt ond frōgt ond macht furt, bis ſe s em ſait. Ond wia-n er nō au des voll, s ällerärgſcht, ghairt hōt, nō lei't er ſe zruck ond hōt d Ha'd vo' der Annemrei ghebt ond hōt ſe gar nemme fahra lau' ond ſchwätz taglang gar ner. Bloß amōl ſait er:

„O Gott, du hōſcht me arg arg gſtrōft, aber i hau's verdeant. An mei'm oigena Floisch ond Bluat hōſcht me gſtrōft, weil e an dem gſendicht ghet hau'!“

Nō ischt er wieder ſtill gwā ond hōt geduldich alles mit ſich tō' laffa, was der Dokter mit em to' hōt. Daß

a' lang's Krankalager gäb', hót mer schau' gseha ond der Dokter hóts au gsait. Dô jdmret der Chrischtof:

„O Weib, jezet hósch't au noh en kra'ka Ma', mò s so nahtich wär, daß i nöch em Sach guck'a ond schaffa tät, statt ens Bett liega ond Geld loschta. Ond du muascht Tag ond Nacht mi bsorga —

„O i tuas jô gerâ,“ sait d Annemrei.

„I hau's et an der verdeant,“ sait der Chrischtof, „i hau' gar et gwißt, wa für a' Weib e hau', so a' Pfleg ond so a' Sorg ond derzua na' s ganz Haus ond da' ganza Hof —“

„Machs et so arg, Chrischtof,“ sait d Annemrei, ond seit langer Zeit ischt wieder andl us ihrem Gsicht so a' Schei' vo' Glück, freile bloß a' Schei', glega.

„Annemrei,“ sait der Chrischtof, „dâ liescht mer äll Morga ond äll Obed ebbes aus der Bibel vor, aber s schö'scht hósch't mer noh et gleja.“

„Was Chrischtof?“

„I woif' et, mòs stöh't, aber woif' dô des vo'-ma' tugenhsama' Weib. Lies mers, Annemrei.“

Ond d Annemrei nemmt d Bibel vo' der Tür ra ond schlät auf en de Sprüch em oi'sa'dreisichsche Kapitel em zeahtha' Versch ond liest:

„Wem ein tugendsam Weib bescheeret ist, die ist viel edler, denn die köstlichsten Perlen.

Ihres Mannes Herz darf sich auf sie verlassen, und Nahrung wird ihm nicht mangeln.

Sie tut ihm Liebs und kein Leids sein Lebenlang.“

Ond so furt, ond der Chrischtof guckt älls sei' Weib a' ond wia se fertich ischt, nô sait er:

„Guck, Annemrei, des bischt du. Gelt? Aber wia-n i gwä be', des stöht nergeds en der Bibel, des ka' mer gar et versaga ond verschreiba.“

„Sei ezet no ztriada, Chrishof,“ sait Annemrei. „I muas aber au nöh vo' ebbes anderem schwäza. I hau' ders bis heut et saga wollä. Der Jud ischt glei en de aischte Täg, eb mer no s Marièle vergraba hdt — dö gwä —“

Der Chrishof fährt auf, s ischt emmer noh a' Stück vom alia Chrishof en em gesteckt ond sait:

„Ond der Märte gwiss au mit seine Schulda!“

„Jö der Märte au, daß ders no sag, aber der bsorgt schau' seit sellem Tag wieder als Oberknecht alles ond hdt da' Juda' znächscht amdl zuam Haus naus gjagt, ond ezet verhandelt er mit-en ond sait, s laß sich macha. Witt em et au danka?“

„Annemrei,“ sait der Chrishof, „i müaßt lüaga, wann e saga tät, i tats gerä. Guck von dem domme Huig, dā woisch no schau', was e moi', ben-e ghoilt, em Herza hau'-n es eigentlich au nia glaubt, aber des will-e halt doch et reaht na brenga, daß der Märte soll —“

„Dafz der Märte an der ghandlet hdt, wia a' rechter Chrishof? Witt liaber dei' Sächle verliera, weder s em Märte danka, wann mer uf-em Hof bleiba dürfet? So ka'scht et sei', Chrishof, ezet nemme! Därf em schreia?“

Der Chrishof bsennt se wieder a' Weile ond no sait er:

„Jö, schrei em!“

Ond wia der Märte reikommt, nö streckt er em d gso'd Ha'd na' ond sait:

„I dank der au, Märte!“

„Et z dank, Bauer!“ sait der derwider, „i tua jō
älles gerā. Ond ezet,“ sezt er derzua ond hōts Vermahna
et lassa könna, „et bloß vo' wega der Annemrei, noi' au
wega-n Euch. Er send a'n anderer, sell sieh-n-e ond hair-e;
bleibet derbei, Bauer, nō ka' älles noh reaht werda. Mit
de Juda' aber lasset no mi macha. I woiß, mō mer dia
Kerle pac'a muaf.“

„Nemm de en Acht, Märte,“ sait der Chriſtſtof, „s
send ganz leze.“

„Jō des sends,“ sait der Märte, „aber i woiß au,
wia mers klemma muaf. Mit a' paar von Eure Papierla
spudcts. s standet ganz andere Sacha druf, als Ihr na'
gschrieba hent. I hau' nōchgrōgt bei dene Leut, mō älls
derbei gwä send, ond wann se et guatwillich mit se handla
lasset ond dia Sach et ganz en d Ordneng kommt, nō
zoig es a'. I kenn me aus mit sotte Kerle.“

„Tua was dā witt, Märte, s ischt mer reaht, ond
noh a' mōl: i da'k der. Ond, ond“ — er stocket —
„ond gelt, was e über di ond mei' Weib gsait hau‘ —“

„Ischt schau' reaht, Bauer!“

„Gelt dā verzeihſcht mers? Ond guck, i hau' selbichs
mōl doch em Gaisfriz, mō s zaſchta gsait hōt, oi's aufs
Maul gschla. Hätt mir no nōcher, mō e selber so domm
gschwäzt hau', s au oiner so gmacht.“

„Gſchadt hättis neꝝ!“ sait der Märte. „Aber ezet
muaf e wider nōch-em Sach guck. Bhüet Gott, Bauer,
ond also Oberkneacht ben-e wider?“

„Oder i der dei'!“ sait der Chriſtſtof a' bisle
verzwonga.

„Noi', Ihr send ond bleibet der Bauer," sait der Märte, „ond wann der Hof au nemme so grauß ischt — mer muß viel verkaufa — wann nô a' reachter Ma' drauf sitzt. A' reachts Weib, Chrißtof, ischt älleweil druf gwä. Ond au a' reachter Oberkneacht," sezt er derzua ond lachet so a' bisle, „wann Ihr's et saget, nô sag is selber."

„Ond da hōchst Reacht, Märte," sait der Chrißtof.

10.

Wia der Märte gsait hōt, isch gscheha. Mer hōt viel, arg viel verkaufa müsha, ond vo' älle Gāul ischt bloß der alt Brau' em Stall blieba. Der reich Bergbauer ischt der Chrißtof nemme gwä, aber au nemme der hauhfärtich Bauer. Er hōt nemme so viel ghet, aber dâfür da' Frieda en sei'm Haus, ond langsam isch au wieder a' bisle aufwärts ganga. Uf koi'm Märkt aber hōt mer da' Bergbaura nemme gseha — wanns naitich gwä ischt, ischt der Märte ganga — ond koi' Zud hōt au mia maih en da' Bergemer Hof rei' gschemeckt.

En Denkzettel an sei'm Leib hōt der Chrißtof freile sei' Lebttag bhalta: sei' reachter Arm ist steif blieba, ond wenns ander Wetter woara-n ischt, hōt ers gsürt. Daß er uf oi'mol a' Engel gwä sei', au gega sei' Weib, ka'-n-e freile et saga; so zieht mer sei' Natur et aus. Aber andersch't, ganz andersch't isch er halt doch gwä, ond wann ällamol dia alte Mucka wieder en sei'm Kopf hent brommla wölla, nô hōt er no sein steifa Arm ond sei' Weib a'guckt, ond s isch älles wieder guat gwä. Oder hōt er sei' Kappa gnomma ond ischt ganz still zuam Haus naus ond s Dorf

nonter, et en da' Adler nei' mia sonscht älls, aber nüber
auf da' Kirchhof zua dem kleina Gräble na', mo sei' Mariele
drunter glega-n ischt. Ond aus dem Gräble ischt a' Segen
komma für ehn ond sei' ganz Haus: mo Di'n d Leabiche
et zreacht brenget, do ka's o'ser Herrgott au' durch
Taute macha.


Ond d Annemrei hdt ezet schau' besser verstanda',
was se domöls em Pfarrer hdt et nöchsa¹⁾) könna:

„Der Herr hats gegeben, der Herr hats genommen;
der Name des Herrn sei gelobt!“


~~~~~

---

1) nachprüfen.



**Dom Lise.**  
**A' Kendergschicht.**



Ufpaßt, Rendor, i will ich a' Gschichtle verzähla!  
Luschtich ischt grad ettâ, aber schada ka's ich au ner  
wann-ers a'hairet.

Hent-ers gseha dea Morga, mò mer s Krona'wirts  
Rikele aufsetraga hót uf da' Kirchhof? Gelt, des send schöne  
Kränz gwä uf dem Särgle? Ja, wa'mer nò des Rikele  
hätt wieder lebendich macha könna mit dene Bloma ond  
Kränz! Ond gucket, dô ischt mer des Gschichtle ei'gsalla.

S ischt schau' lang her, i be' dôzmôl a' Kerle gwä  
wia du, Heiner, so a' Jöhrâ sechsa alt, ufs Frühjöhr  
hau-n e solla en d Schual komma. Zuam Krischtendle  
hau-n e en schöna Baubal<sup>1)</sup> kriagt vo' meiner Doth — so  
hót em ganza Flecka koi' Buia koin ghet. Ond stolz ben e  
uf den Baubal gwä, ond wia a'môl s Jörga Frieder zua  
mer gsait hót: „Narr, des glaub e schau', daß du so en  
schöna Baubal höscht! Dei' Vater ischt jô au der reichscht  
Bauer em Flecka!“ — nò hau-n e aischt reacht en Stolz  
ghet! Wia s aber älsgmac'h weiter ens Frühjöhr nei'-  
ganga-n ischt, nd he'mer doch zletschta gnuag baubalet<sup>2)</sup>  
ghet ond send uf andere Sacha verfalla. Zmôl he'mer  
alle a'gfanga Rengla flechta, Mädla ond Buaba. Ihr  
wisset et, wa des ischt, Rendor, des Deng muâf aus der

---

<sup>1)</sup> Spielball.

<sup>2)</sup> ballgespielt.

Mode komma sei' seit meiner Jüged. Gucket, dô he'mer a' Steckele gnomma von-ra' Haselgert oder em a' Holder-steck, so en Zoll lang o'gfähr ond halbfengersdick. Des he'mer en der Mitte der Länge ndch durchgschnittia ond nd an so ma' hälfticha Steckele s Mark außerkrazet, daß s a' Rennela gä hót. Ond nd he'mer Nozhör gnomma, hent zwöi Höör en der Mitte rond om des Steckele bonda, ond nd zwisch'a dene Nozhör, der Länge ndch en dem Rennela ufe mit a'-ma'-n andera Höör durchflochta — i will s ich amdl zoiga, wia mer s macht, wann e s en mei'm Alter no' ka' — bschreiba ka' mer s et guat. Kurzom, des. Deng hót ganz nette Rengla gä, wa' mer nd des Steckele rauszoga hót, ond oi' Rengle hót mer nd an s ander gslochta ond ganze Kettema<sup>1)</sup> draus gmacht. Desch't a' Stolz ond a' Staat gwä, ond mō des Deng amdl ufkomma gwä ischt, nd he'mer alle gar neꝝ anders maih wölla weder Renglaflechta. S Lenda'baura Jakob ischt amdl bais dâbei a'ganga: der hót sei's Vaters Fuchs wölla Höör aus-em Schwanz reiſa, ond der Fuchs hót nausgschla ond hót-en uf d Bruscht troffa, daß mer gmoi't hót, er mülaß sterba. Er lebt aber heu't no', bloß schnauſich ischt er sei' Lebtag blieba.

No', also mit dene Rengla! Dô isch natürle a' Haubtsach gwä, daß mer de richtiche Rennela dâzua ghet hót. Ond des hót et a' jeder emmer so gschickt na'bröcht.

No' ischt dôzmöhl a' Mädle gwä, zwöi Jöhr älter weder i, se ischt schau' en d Schual ganga; se hót ema'-n arma Taglöhner ghairi ond hót Lisse ghoiſa. J ka' se

---

<sup>1)</sup> Ketten.

heu't noh seha, se hōt so a' paar helle froindliche Auga  
ghet ond so rolliche Härla an der Stirn, bloß hōt se all-  
weil a' bisle blaß ausgseha, wia wann se et reacht gsond  
wär. Dia ischt andl am-a' Morga en onfrem Hof gwā  
— ihr Vater hōt bei ons taglohet — ond dia hōt zwei  
so Rennela ghet ond mir zoigt: i hau' gmoit, so gschicte  
könn's gar kōine maih gā!

„Lisle,” sag e, „dia Rennela geischt<sup>1)</sup> miar, dā kriagscht  
mein Baubal dāfür!“ „Jo,” sait se, „den dārscht du et  
hergä!“ „Wa werd i et dürfa,” sag i, „er ghairt jō mei,  
i hau'-n a' jō vo' meiner Doth kriagt zuam Krischtfendle!  
Geischt mer dia Rennela, Lisle? Dō hōscht den Baubal!“

Des Lisle guckt den Baubal a' ond bseennt se a'  
Weile. Nō sait se: „Noi', descht jō so-n-a' schöner Bau-  
bal!“ „A wa,” sag i, „so geits no' maih ond miar ischt  
er schau' vertloidet! Wann du-n et witt, nō ghei e-n<sup>2)</sup>  
furt!“ „Noi', des wär schad,” sait se, „dō nemm en  
liaber i! Dō hōscht dia Rennela!“ Ond em hella Ver-  
gnüaga ischt se mit dem Baubal dāvo'gspronga.

I he' glei nāghocdt ond hau' Rengla gslochta, aber  
s hōt mer a' sellem Tag et reacht aus der Ha'd gau'  
wölla. Nō kommt au s Jörga Frieder dāher ond sait:  
„Wa hōscht denn du dō für Denger? Narr, mit dene ner-  
nuziche Tröglia ka'scht ner a'sanga! Komm, i woiß a'  
Bogelnescht, gang mit!“ Ond i hau' dia Tröglia weg-  
gschmissa ond be' mit-em ganga.

Am andera Tag frögt mei' Mhnā: „Hannes,” sait  
se, „mō hōscht denn dein Baubal?“ „Den hau'-n e dem

<sup>1)</sup> gibst.

<sup>2)</sup> werf ich ihn.

Lisle gä," sag e. Vo' dene Rennela hau'-n-e weiter ner gsait. „Was hösch't?" sait mei' Ahnå, „Den Baubal därscht du et hergä! Sag no dem Lisle, se müaz en wieder brenga!" Í hau' ner gsait, aber gheia<sup>1)</sup> hót me s doch wölla, daß e den Baubal für dia negnuziche Trögla hergä häb, ond wia-n e nô am Nômittag s Lisle gseha hau', sag' e: „Du, Lisle, mei' Ahnå hót gsait, i dürf den Baubal et hergä, då müazest en wieder brenga. Ond dia Rennela send jô doch ner gwä weder lompiche Trögla!"

Des Lisle hót gar ner gsait, se ischt no so dâvo'-gschlichä. Noch-era' halba Stond, i siz grad uf der Staffel vor der Haustüar, kommt se wieder dâher, se hót ihr Klei's Brüaderle vo' viar Íðhr a' der Ha'd geführt ond en der andera Ha'd hót se den Baubal ghet.

Ond gudet, Render, des ta'-n e mei' Lentag et vergessa, wia des guat Lisle so traurich derher komma-n ischt mit dem Baubal — se hót koi' Wort gsait, se hót me no a'gudt aus ihre helle froindliche Auga, hót den Baubal neba mi uf d Staffel na' glegt ond ischt mit ihrem Brüaderle wieder furtganga, grad so traurich wia se komma-n ischt.

Ond i — des woif e au no' wia heu't: i be' dô-gesssa wia-n-a'-n armer Sender ond hau' me gschämt en Grondserdsboda nei', ond i hau' sçho' a'heba wölla ond dem Lisle nôchruafa: „Dô, komm, bhalt no den Baubal, ond dô hösch't au noh mein Dopsf<sup>2)</sup> dâzua" — aber nô ischt mer ei'gfalla, daß mei' Ahnå gsait hót, i dürf ner

<sup>1)</sup> reuen.

<sup>2)</sup> Kreisel.

vo' meine Sacha hergä, ond i hau's et außerbröcht, was e hau' sa wölla, ond hau' dächt, i müaz halt to', was mei' Ahnä gsait häb. Aber sell vergis e bis an mei' selichs End et, wia des Lisle so still ond traurich komma-n ond ganga-n ischt.

Freile, dözmidl hau'-n es en-era' halba Stond wieder vergessa ghet. Nißcht noch a' paar Täg ischt mers wieder ei'gsfalla, wia-n-e des Frizle, em Lisle ihr Brüaderle, hau' uf seiner Hausstaffel siiza seha, s Lisle aber et dabei — ond nô hót mer s doch koi' Muah maih glau' ond i hau' dächt: a' paar Rennela muaz des Lisle halt doch wieder hau'! Ond i hau' mei'm Vater sei' Hööb gholt ond hau' aus-em schönschta Holderstedt a' paar Rennela gmacht, so flott e s hau' könna, hau' au no' en Buschel schö' weiß Roßhööd gnomma, mō mer s Schemmelbaurä Kneacht aischt da' Tag vorher gä ghet hót, ond be' ganga ond hau' s em Lisle brenga wölla.

Aber wia-n-e zuam Hof nauß gang, kommt mei' Vater rei'. „Hannesle,” sait er, „denk au, grad vorich ischt s Lisle gstorba!“

I hau' a' no a'guet ond nô wieder mein Roßhööd buschel ond meine Rennela, ond nô send mer no so d Träna d Backa-n aber gloffa ond i hau' gschluchzet, daß mers Herzstöß gä hót. Mei' Vater sait: „No', so arg muascht et heula!“ I aber hau' furtgmacht, ond wia s halt gar et hót ushaira wölla, hót mei' Vater nohmidl gfrögt, mōrom e s denn gar so arg mach — ond nô hau'-n em alles vo' Aßfang a' verzählt. Mei' Vater hót nez gsait weder: „Descht <sup>1)</sup> freile et reicht gwā so, aber macha ka' mer ez

<sup>1)</sup> das ist.


ner maih!" Ond, Kender, des Wort vergifß e au mei' Lebtag nemme: „aber macha ka' mer ez ner maih!" Ja, so isch, wann ois gstorba-n ischt, nô isch z spôt.

Aber am dritten Tag hót mei' Vater zua mer gsait: „Hannesle," hót-er gsait, „heu't vergrabit mer s Lisle! Wit se nohndl seha? Nô komm, laß der dei' Sonntichshäss a'to', nô därscht mit zuar Leicht!" Ond mer hót mer mei' Sonntichshäss a'tau', ond eb mer furt send, hau'-n e heh-lenga den Baubal en mein Sack gschoba. Nô se'mer ens Haus ganga ond dô ischt des Lisle schau' em Sarg glega, so schö wia-n-a' Engale ond lauter Bloma drom rom, ond mei' Vater hót mer au en Strauß gä ond hót gsait: „Dô, Hannesle, legs na'!" Ond i hau' den Strauß uf s Lisles Ha'd na'glegt ond no' hau'-n e en mein Sack glangt ond hau' den Baubal außerzoga ond hau' romguckt, ob mer neamez zuaguck? Mei' Vater hót mer zuaguckt, aber er hót no mit-em-Kopf gnicket — ond i hau' den Baubal gschwend dem Lisle onters Tota'fisse gschoba, ond sonscht hóts loi' Mensch gmerkt weder mei' Vater. „So," hau'-n e dächt, „so, Lisle, wann d' jez a'-n Engale wirtscht, daß dâ em Himmel den Baubal wieder höscht!"

Ond nô hót der Schreiner da' Sarg zuagnagelt, ond nô hóts mit de Glocka z'sema'gläut ond der Schualmoischter ond dia Schualerkender hent gsonga, ond nô hót mer des Lisle uf da' Kirchhof traga wia heu't s Krona'wirts Nikele.

So, Kender, desch't des Gschichtle!

Ho a' Beck!



1.

„W' Beck, isch wôhr a' Beck? Ha sell wär!“ sait s.  
Weberbaura Margret zua ihrem Bruder, mò er dia Bot-  
schäft brôcht hôt, daß jez a' Beck en da' Fleckâ komm.

„Wann kommt er?“ macht se furt, „Fa' er au ebbes?“

„Sell will-e glauba,“ sait der Jakob, „der ischt bereits  
bis em Preußischa drenna gwä.“

„Wega sellem, Jakob, braucht er noh ner z könna;  
du bischt noh et weiter komma, weder en d Stadt ond  
— wie moi'scht? — dâ fa'scht dei' Baurasächle om desto-  
wenicher et schleachter.“

„Glaubs wohl,“ sait der Jakob, „aber a' Beck, sell  
ischt ebbes anderschters. Desch't a' ganz nobler.“

„Hôt er a' Weib?“ frôgt d Margret.

Der Jakob lachet und sait:

„Sell müaßet ihr lediche Mädla natürlich zaischta  
gwîst hau!“

„Nôch so ebbes frôgst du freile et, du bischt z tappich,  
no nôch-ema' Weib vo'-ma'-n a'dera z frôga'; daß dâ der  
selber ei's nähmesch't — —“

„Gelt, Margret, ziag et wieder an dem Bändel,“ sait  
der Jakob bâis, „ond jetzt sag e der aisch't et, daß er koi'  
Weib hôt —“

„O du!“ lachet d Margret.

„Was lachsch't, Margret?“ frôgt der Jakob.

„Narr, ob dir!“

„Dô so macht ers, ihr Donnders-Mädla, ihr — —“ sait der Jakob ond brommlet ebbes vor se na', was d Mädla et hättet haira dürfa. Ond wia d Margret ezet airjcht reacht lachet, nô macht ers Maul noh amôl auf zuam Schwäza, wia wenn er a' grauze Red to' wött, ond hebt a':

„Grad des isch! Grad des Lach'a —“ nô schnappt er uf oî'môl a ond sait:

„Gar ner schwätz e maih! Gar ner! Sell wird s gscheidischt sei.“

„Wann s ner schwätz s gscheidischt isch“, sait d Margret, „Jakob, nô bischt du der Gscheidischt em Flecha!“

„Ond du mit deiner Rassel! <sup>1)</sup> Wurscht au noh seha, was d mit a'richtischt! I komm noh weiter mit-em Maulhalta weder du mit-em Schwäza. Glaubsch, Margret?“

„Mer wurd's nô schau' seha,“ sait d Margret, ond der Jakob gôht naus an sei' Gschäft.

Jetz muâß mer aber et glauba, daß der Jakob so arg tappich gwä wär, ond daß der Margret ihr Maul vo' emma ond auha gschnitta hâb. Ihr Maulwerk isch halt ganga wia bei âlle jonge Mädla en de Zwanzga, ond s isch bloß em Jakob so fürkommma, wia wann sei' Schweschter en dem Stück maihnder tä, weder andere.

A' bsonderer Kerle isch freile der Jakob gwä. Er ischt schau' en d Dreisga ganga ond hôt nôh loi' Weib ghet. Et daß ems am Sächle gfehlt hätt; er hôt gnuag ghet, ond wenn d Weiber oî'm vom Hemmel ronter fielte,

---

<sup>1)</sup> böses Maul.

weil mer Sach gnuag hat, no häts beim Jakob Weiber gregnet. Aber dô send d Mädla oiga. Se wöllet et bloß gnuag Sach, se wöllet au en reac̄ta Ma'. Desch' no' freile der Jakob gwä, s hdt em koi' Mensch nex D'reac̄hts ndch'saga könna, au d Mädla et, mō doch alles wisset, was wdhr ischt ond was verloga-n ischt; aber mit-em Maul ischt der Jakob eba gar et flenk gwä, ond bis er se bsonna hdt, was saga, wann em oine gfällt, hdt se a'-n-anderer schau' luft ghet, ond wann s en gräzt hent ond er de saftichscht Antwort em Kopf ghet hdt — wann se zua de Zäh' rauskomma-n-ischt, nō ischt se mehrschteils o'gschickt ond tappich raus komma. Ond so ischt oi' Zdhr oms a'der romganga ond mei' Jakob hdt koi' Weib ghet, ond wenn ers au a' paarmdl probirt hdt, ob er et oine kriag, nō ischts doch ällamdl lez ausgfalla'; wenns em reac̄t ernst woara-n-ischt ond er gschwizt hdt, wia der Schulmoischter bei seine o'gfurmete Lausbuuba, nō hent ällamdl dia Mädla glāchet, ond nex isch gwä. Ond ndcher, mō-n-er älter woara-n-ischt, nō hōts ghoīza: so en Alte' nemmet se et, ond so isch komma, daß der Jakob emmer noh koi' Weib ghet hdt, ond ma' em Dorf gsait hdt: Ehnder komm a' Beck ens Dorf, weder a' Weib für da' Jakob.

Ond jezet ischt a' Beck komma ond drom ischt des em Jakob so wichtig gwä. Er hdt schäzwol denkt, werds oi' wdhr, nō könns ka' sei' au zuam a'dera langa.

Ond d Margret häts au et o'gerā gseha', wanns wdhr woara wär. De Alte vo' dene Voide hent nemlich d Margret et heira lassa wölla, eb der Jakob a' Weib häb, ond d Margret — s ischt jö koi' Schand, wenn-e s sag — hätt schau' lang gerā en Ma' ghet. s hdt au et

an Aſtänd gſehlt, aber ſe iſcht gar wählerrifch gwä ond hōt an jedem ebbes auszſeza' ghet: der oi' iſcht er et ſchö' gnuag gwä — ſia hōt nemlich a' noble Fraz em Gſicht ghet ond a' paar Auga em Kopf, wia Guierrädla; der ander et reich gnuag — ſe hōt ſich gar viel ei'bild auf des, was ſe hāb; der dritt z jong — ſo en o'bachene Grasaffa nemm ſe et; der viert z alt — alte kōnn ſe en zwanzg Jöhr noh hau' — ond fo iſch komma, daß ſe grad fo wenich wia der Jakob gheirt ghet hōt, mō der Beck ens Dorf komma-n iſcht.

Jetz lachet aber d Leut en der Stadt, weil i ſo en Lebtag mach von dem Becka. Narr, Ihr hent guat lach'a! Wann an jedem Eck a' Beck wohnt ond mer no s Mädle furthſchick'a därf: Maul was witt? Sell iſcht ebbes ganz anderschters, weder em-a' Fleck'a, wia z Altstadt, mō mer seit ewiche Zeita von koim Becka ebbes gwizt hōt, mō mer en dem alta Bachhaus mit viel Müah aifcht a' ſchleachis Brot kriagt hōt. Ond d Becka, mō a' Weib ommertra<sup>1)</sup>) hōt, ſend oft ſchau' vor der Sendflut bach'a gwä, ond ſeine ſchlechteschte hōt aifcht noh der Beck von Burgbach drüba romgſchickt: „ſe frefſet alles!“ hōt der gsait, mō-n-em amdl der Bachtrog auf da' dredicha Stubaboda nonter gſalla-n iſcht. Nei' tō hōt er da' Toig wieder, glachet ond derzua gsait: „s iſt ko' Bauer ebbes o'gsalza.“

Drom hent ſe au ſchau' lang en Altstadt en oigena Becka wölla', aber s hōt an dem ond ſellem gſehlt, ond ſchau' a' paarmdl, wo' mer gwiz gmoi't hōt, jetz komm oiner, nō iſcht ällamdl wieder ner draus woara. Drom

---

<sup>1)</sup> herumgetragen.

hōt mers gar nemme glaubt, daß a' Beck komm, ond ezet-  
ischt aischt oiner komma. Em ganza Flecka hōt mer vo'  
nix anderm maih gschwäzt, weder vom Becka, ond aparte  
de junge Mädla am Bronna, dene isch ganz bsonders  
wichtich fürkomma.

2.

So om d Kirbe rom ischt der Beck ens Dorf zoga.  
Er hōt des Häusle, mō-n-er se kauft hōt, schö' herrichta  
lau', ond der Jakob, mō-n en schau' vo' de Soldata hear  
kennt hōt, hōt em derzua a' paar Fuhra' to'. So send  
se näher mit anander bekannt worda, ond drom hōt der  
Beck au da' Jakob glei en de aischte Täg gfrögt, ob er  
a' Mädle em Dorf zuam Heira kriag.

„Mōrom et?“ sait der Jakob, „s geit wirklich<sup>1)</sup> gnuag;  
aber ob se de nemmet, sell woik e et.“

„So? Was hent se wider me?“ sait der Beck ond  
richt sich holzgrad auf. Mer siehts, daß er bei de Soldata  
gwā ischt; ond a' Poschtur hōt er na'gschmissa, dia de Mädla  
hōt gsalla müasha, ond en schöna Schnauzbart hōt er au  
ghet ond a' netts Häusle ond a' Geldle ond a' Gschäft,  
mō hōt gau' müasha, ond drom hōt er alles Reacht ghet,  
zuam Jakob z saga: „Was hent se wider me?“

Der Jakob krazt se henter de Auhra, sait zaischte nix  
ond nōcher rüast er:

„Gottfried, frög dia Luaderßmädla selber! Wa moi'scht,  
mi wöllst se au et. Ond mōrom et? I hau' a' für-  
nehms Haus ond Vieh ond a' Schuier äll Jöhr voll ond

<sup>1)</sup> gegenwärtig.

be' a' guater Kerl — s iſcht wôhr, Gottfried, i be's, frôg  
wen dâ witt — ond oina'weg<sup>1)</sup> wöllet se me - et. Dô  
ſchlag doch!" macht er ond ſetzt nô derzua':

„Daß ders sag, Gottfried, dô hau'-n-e aifcht vor a'  
paar Täg wieder Dine woll'a'.

„So, Jakob," ſait der Beck, „ond wia iſch nô ganga?"

„Wias ganga-n-iſcht? Narr, wia murds ganga fei?"  
I gang zua' der Chriſchte' ihrem Vater ond sag mei'  
Sägle. „Dei' Chriſchte' will e," sag i. „So?" ſait ihr  
Vater. I sag mei' Sägle weiter. „D Chriſchte?" ſait  
er. „Dô d Chriſchte!" fa-n-i. „Also d Chriſchte?" ſait  
d Muater, mô derzua komma-n iſcht. Nellsmittelscht kommt  
der Better rei' ond ſait ällerhand, ond d Muater ſait  
au ihr Sägle. „So, Jakob," ſait ſe, „also des wär's?"  
„Dô," fa-n-i, „des wär's!" „Ha was tätet au d Leut  
ſaga, wenn du d Chriſchte' nähmescht?" ſait ihr Vater.  
„Dô, was tätet ſe ſaga?" ſait d Muater. „Was ſe ſaga  
tätet?" fa-n-i, „narr ner weder was ſe ſaga tätet!" „Dô  
wärle!" ſait der Better. „Ha nô muaz mer eba geh  
d Chriſchte' frôga," ſait der Vater. „So?" fa-n-i. „Dô!"  
ſait d Muater, „d Chriſchte' muaz ma' geh frôga."  
„Wärle, s Mädle muaz mer frôga," ſait der Better.  
Ond nô iſcht natürlich ſchau' de ganz Gſchicht ner gwâ.  
Guck, Beck, ſo gôhts mir. Ond dir gôhts grad a'-ſo, ſell  
fa-n-e der."

„So? Ond mîrom denn?" frôgt der Gottfried.

„Wenns hardu wiſſa witt, weil dâ a' Beck biſcht," ſait  
der Jakob.

---

1) dennoch.

„Ja, so send se!“ sait der Gottfried, „Ond bei mir hättet se s aischt viel besser weder bei uich, Jakob. Was hent denn uire Weiber? Schaffa, nerz als schaffa, em Haus ond em Feld, en der Küche ond em Stall, des ond jenes, dies ond sell. Bei mir höts a' Weib guat.“

„Sö, se derf da' ganza Tag Becka-n effa!“ lachet der Jakob, „Narr bei dir wurd mer au blos en de aischte Täg ndch der Hauchzich „Mulle!“ saga, ond ndchher —“

„Schwäz et, Jakob,“ rüaft em der Beck drei', „sag mer, wüßtesth mer gar loine?“

„Mei' Margret,“ sait der Jakob.

„Dia gfiel mer aischt mit ihre schwarze Auga,“ sait der Beck, „ond des reacht! Aber wie isch? Mei'scht i solls probira? Sags er amöd, Jakob, was se sait.“

„s isch reacht,“ Gottfried, „aber mir bischt et bais, wann se et will. Gelt? Zwör a' reachts Weib tätescht an'er kriaga, se ka' ebbes ond isch willich ond mi täts jö freua, aber d Mädla, o Gottfried, d Mädla!“

Ond er stöhnt auf ond schüttelt da' Kopf ond sait Bhuet-Gott ond gôht hoi'.

En der Schuier trifft er d Margret.

„Wa isch, Margret,“ frôgt der Jakob, „was saget d Mädla en der Konkelstub?“

„Möchtesch wissa, Jakob?“ räzt en d Margret, „Seit wann frôgst du ndch de Mädla?“

„Ihr send freile et fürwizich ond et nasa'weis,“ geiht er der Jakob zurück, „ihr möchtest bloß alles seha ond alles haira.“

„Aparte,“ sait d Margret ond lachet, „was der Beck für a' Mädle nemmt!“

Der Jakob ischt ganz perplex. Dia Mädla wisset doch au alles. Môher jezt no au wider dia Margret woîß, was er grad se frôga will! Daz seit der Beck em Flecka ischt, dia Mädla nex gschwätz hent weder vom Becka ond wer en nemm, hôt se der Jakob et ei'bildt. Wann er freile gwîst hätt, wia se über-en schwätz! Zwôr gfalla hätt er en schau', dô send se et domm gwä, aber ob se Beckena'<sup>1)</sup> werda wöllet, dôrüber send se noh gar et oinich gwä. W' reachte Bäure mit-ema' Hof sei halt doch ebbes anderschters, hent se gmoit, weder so a' Beckawieb. Ond dia paar Mädla, mô en glei gnomma hättet, wann er no si a gwöllt hätt, send vo' de andere reacht ausglachet woara. Aparte vo' der Margret; dia hös aber derbei et laffa könna', mô se könnt hôt, nôch dem Becka z guck — s ischt halt a' netter Kerle gwä, ond wa'-mer-us em Dorf nôch sotte Sacha überhaupt beim Heira frôgt, nô frôget d Mädla aihnder<sup>2)</sup> bernôch, weder d Buaba.

Wia aber ezet der Jakob frôgt, ob se da' Becka woll, nô gucket s en a', wia wann s en fressa' wott ond sait:

„J, da' Becka? Jakob, sell ischt wieder anderschter!“

„Sei et domm, Margret,“ sait der Jakob, „narr, dô kriegsch guat, besser weder wann dâ a' Bäure wurscht. Moi'scht eitâ?“

„Jô Becka em Flecka rom tra,“ geit d Margret zurück, „Toig macha, bei Nacht em Zwölfe usftau' — ond vornaweg, i werd foii' Becke!“ sait se ond stemmt d Hä'd en d Seita, wia wann se s mit alle Becka vo' der Welt

<sup>1)</sup> Bäckersfrauen.

<sup>2)</sup> eher.

ufnemma wött. Ond wia se so döftöht, hót der Jakob aischt denka müaßa, sei' Schweste sei bereits de schöft em Fleck aond — er ischt halt au a' Bauer gwä — für en Becka sei se doch z guat.

„Ond mer woiß jō et amöl, ob er no au ebbes reacht's bacha' ka“, sait se, „ond —“

„Ond,“ macht der Jakob furt, „so en grauße Baura möcht ma' halt gerå, ka' sei langts au zua-ma' Herra vo' der Stadt für d schö' Margret! s Notars sei' Schreiber, Margret, mō als kommt — wa isch?“

Der Jakob hót nöch na' glangt an des, was se au schau' hehlenga' dächt hót: en der Stadt wärts halt nöch schöner, ond passa tät se en Stadt, aparte für den Schreiber, ond schö' gnuag wär se au derzua. Ond wann se ällamöl an de Sonntich dia Mädla vo' der Stadt hót durchs Dorf geha seha vo' ihrem Stüble aus, nō hót se da' Kopf romgschmissa, ond hót lenks nüberguckt en des Klei' Spiagele, mō se us-em letschta Märkt triagt hót, ond hót denkt: „So schö', wia-n Ihr, ischts Weberbaura' Margret noh lang!“ Aber fotte Gedanka hót koi' Mensch wissa dürlsa, ond drom, mō ezet der Jakob dra' na' tupft, wurd se giftich ond sait:

„Was verstöht a' Daps wia du vo' dem, ob d Mädla schö' send oder et! Rois de<sup>1)</sup> mit dei'm Becka!“

Ond nō dreht se se rom, lauft stolz zur Schuier naus ond sait:

„Ond aischt ben-e schö'!“

Der Jakob lachet ond rüast:

---

<sup>1)</sup> geh.

„So schö', daß dā bereits en Schei' en d Schuiert  
nei' schmeißt!"

Ond d Margret, et faul, dreht se rom ond sait:

„So moi'scht, Jakob? Nô tât jô dei' Beck mit mir a'  
Laterna verspara!"

3.

Wia bei der Margret, so ischt's em Becka der Roih  
nôch bei alle Mädla ganga; zaischte hent alle, mō-n-er  
höt wölla, noi' grait; mer ka' jô nôcher emmer noh  
jô saga, hent se denkt, ond mer muß doch au wissa, was  
der Beck für a' Ma' ischt ond was er au ka'! So-ma'  
Becka schadts au ner, wann er a' Weile warta' muß —  
s ischt jô bloß a' Beck!

Der aber, wia-n-er sieht, daß d Altsiädter Mädla-n  
et wöllet, — a' Weib höt er amôl braucht — gôht da'  
kurza Weg ond suacht sich mō anderschtoine. s ischt em  
ei'gfalla, daß sei' Nôchber en Herrabühl — dôher ischt er  
gwâ — zwei nette Mädla hâb, ond koine acht Täg isch  
a'gstanda, nô sait er zuam Jakob, morga kommet se ond  
bschauet s Sächle, er brauchs aber noh neamerz z saga.  
Der Jakob krazt sich henter-em Auhr: der Beck ischt doch a'  
Blizkerl; der dreht der Hau en a' paar Woch'a' en Stiel,  
ond er braucht a' paar Jôhr derzua!

„Zwoi sends?" frôgt er, „De wel nemmischt nô?"

„Der Vater will de Mester herto' — "

„So isch au reaht," sait der Jakob.

„Wann se mer gfällt, Jakob!" sait der Gottfried,  
„Gfällt se mer et, nô nemm-e de Klei', de oi' kriagt s  
gleich wia de a'der."

Am Sonntich Mittag send se komma', der Beck hót  
s Bescht bacha ghet, was mer bacha ka', daß mer au seh,  
was er könn. Mit-em Vater ond der Muater ond der  
Bäs send dia zwoi Mädla' komma, vo' Altstadt ischt  
neamerz dō gwä, weder der Jakob.

D Tür gđht auf ond rei' spazieret se em schö'sta  
Sonntichshäss — bliz, hót der Jakob Auga gmacht! De  
Dir' von dene Mädla', d Marie, hót em glei so gfalla, daß  
er dächt hót: Jakob, dia nemmisch! Mit ihre schwarze  
Auga' hót se die boide jonge Ma'sbilder a'gudet, daß  
dena ganz warm oms Herz rom woara-n ischt. Ond  
schwäza hót se könna über alles, was mer no hót a'gfanga,  
schier so gscheit wia s Pfarrers sei' Magd. Em Becka-n  
aber hót se grad so gfalla, wia-n-em Jakob, ond koiner  
hót Auga ghet für de ander Schwestern, d Lisbeth. Dia  
ischt still auf-em Ba'k gseßa, hót bloß schwätz, wa'-mer se  
gsrögt hót, ond nô et viel, aber wann dia Burscht reacht  
en ihra blöde Auga gseha häitet, nô häitet se dren lesa  
könn': des gibt a' guats Weib! De wel vo' beide de  
älter gwä ischt, hót mer en et a'gseha': so a'fangs de  
Zwanzga send d Mädla baiss schwätz.

Der Diskurſch gđht so rom ond nom, mer schwätz  
über des ond sell, mer bſchaut d Ei'richteng vom Häusle,  
mer gđht ens Gärtle naus ond nôcher au' mit anander  
ens Wirtshaus. Ond der Beck verzählt vom Preuſſicha  
ond wias dō sei, halt ganz anderschter, weder bei ons,  
ond d Marie, mō amol bei-ra' Bäs en Stuagert gwä ischt,  
schwätz von Stuagert, ond der Jakob ischt gar et bei-n-er  
a'komma'. So schwätz er halt mit der Lisbeth ond dia  
mit em, et vom Preuſſicha ond et vo' Stuagert, noi', vom

Biech ond vo' de Necker, ond wia' s Drescha ausfall ond was halt so Sacha send. Ond d Lisbeth geit em reachte Antwort, sell hōt er saga' müasha; aber wia-n-er-en öbeds Bhüat-Gott sait, er müash noh Fuater schneida, nō send em emmer dia schwärza Auga vo' der Marie em Kopf gsteckt ond vo' der Lisbeth hōt er et amol gwizt, was se für Auga hōt.

Wann aber der Beck d Marie nemmt? denkt er enwährend em Fuaterschneida; stoßt mit-em Fuaz en Hauſa Fuater weg, wia wanns der Beck wär, ond sait reacht oba ra:

„So a' Beck!“

Was isch, Jakob? Gelt jetzt moi'scht du au, a' Beck sei wenicher weder ihr Baura, ond wann a' Mädle, wia d Marie, d Wahl häb, nō lang se älstabfer nōch ema' Baura? Dō könntesch de aber brenna! Narr, der liederlichsch Beck, mō de Mädra' s Mule streicht, ischt-en liaber weder a' guater Kerle, wia du, der nez ka', weder sennira. Sennir so viel dā witt, mit dem kriagscht loi' Weib! s Maul muaz mer aufmach'a, schwäza muaz mer — des wöllet d Mädra. Du schneidscht Fuater ond sennirst, wia dā d Marie kriagscht ond em Becka da' Rank alaufesch't — wann d hentere guck'a tätest ens Gärtle vom Becka! Der Gottfried hōt dia Leut noh amol en sei' Häusle gführ't ond en en grauzmächticha Gogelhopfa na'gsezt ond en Kaffee. Ond nō hōt er gsait, d Marie müash doch au noh en Strauß mitnemma aus sei'm Gärtle. Se ganget mit ander naus. Dō send noh a' paar Aschter gstanda' ond noh a' Ros, s ander ischt alles verblühet gwā, ond dia Ros hōt der Gottfried ronterbrocha. S sei schad om se, hōt

d Marie gsait, aber schau' ischt se weg gwä ond schau' hōt se au der Beck er selber ans Miader gsteckt ghet. Ond dernd? D Jakob dei' Huaterhaus wird emmer graiser, dā schneidescht jō wia wüatich, aber was nutz de s? D Marie, mō dā gerā möchtest, hōt der schau' der Gottfried weg-gfischt; der hōt sein Arm om se glegt ond er gsait, se müaß sei' Weib werda. So schnell isch freile et ganga, s hōt oin Höcka ghet. D Marie ischt jenger gwä weder d Lisbeih, ond so send amdl d Baura, daß se de Jenger et vor der Aeltera hergä wöllet.

„Wursch seha, dā kriagscht me et,” sait d Marie.

„Ach was, so gefährlich wurds et sei’!”

„Jō s ischt,” sait d Marie, „mei' Vater tuats et anderschter. Komm mer ganget nei’!”

Aber em Gottfried hōts em Gärle ganz bsonders gfalla ond er hōt et glei wieder nei' wölla. Er hōt se bsonna', wia-n-ers mach, daß er d Marie kriag, ond uf oimdl ischt em a' Gedank komma, der hōt em wüatich gschheit däucht. Er nicket der Marie zua ond sait:

„Zejet woiß e ebbes!”

„Was woischt?”

„I woiß, was e woiß,” sait der Gottfried, lachet a' bisle ond sait nd so ane:

„Der Jakob, ja der Jakob!”

#### 4.

So lang der Jakob Huater gschnitta hōt, ond der Beck mit der Marie em Gärle gstanden ischt, ischt d Margret en ihrem Stüble gessa. D Obesonn hōt durch dia kleine Scheiba' rei' gschena ond hōt der Marie zuagudt

ond se verwonderet. Was tuat se? Des werdet mer glei  
haira. Nemlich da Becka hōt se halt et aus ihrem Kopf  
nausbrōcht ond schiergar hōt ses greut, daß se em Jakob  
et a'-n andere Antwort gā hōt, wia-n-ex se gfrōgt hōt.  
Ond ezet hōt se au ebbes dervo' ghairt ghet, daß der  
Gottfried mit zwei Mädlə vo' Herrabühl ond ihre Elter  
em Kreuz dronta siž. Wann a' Burscht alloi' mit de  
Mädlə-n-em Wirtshaus sižt, nō isch noh ei gefährlich,  
wann aber der Vater ond d Muater ond gar noh a' Vetter  
oder a' Väss derbei sent, nō hōt dia Sach a'-n anders  
Gſicht, nō wurd's ernſcht.

„Jezet muascht derzua to‘,“ sait se, „wann d en noh  
witt. Aber,“ fennirt se, „mer woiß jō et, was er ka‘! Ha,  
no‘ probirs!“ denkt se weiter, stōht uf, gōht na, rüaſt  
ema' Nöchbers Kend, geit em a' Geld, schic̄ts nonter zuam  
Becka ond läſt vo' allem, was er bac̄ha' hōt, ebbes hola:  
en Becka, a' Milchbrot, a' Brezetz, a' Stück Weißbrot,  
se soll aber et saga, für wen. Ond des Kend brengets ond  
noh a' Stück Gogelhopf derzua, ond jezet lieget dia Sacha  
vor-er ond se fangt a' z essa.

Sitzt dia Margret am hella Sonntiſchnöchmittag en  
ihrem Stüble ond iſt! Ond des hōt d Sonn gſeha ond  
drob hōt se ſich verwonderet.

Se iſt von dem Becka — „reacht guat, s gwöhnlich  
ka'-n-ex“; se beißt en des Milchbrot nei' — „aischt noh  
fei“; se bſchaut des Weißbrot — „koin Speck ond et  
ſeſcht, grad reacht ausbac̄ha“; se beißt dervo' ra — „s  
ſchmeckt guat, so a' Beck iſcht doch et fo übel“; se nemint  
des Stück Gogelhopf her — „au! des muäß a' gſchickter  
Ma' sei!“ se bricht dia Lauga'brezet von anander —

„grad reacht rösch, et z woich ond et z hert, et z herb  
ond et z salzig — so muß der Beck au sei!“

Wa isch, Margret, moi'sch dā könnescht-en nemma?  
Bačha-n ischt älles reacht, aber i moi', du seiest et reacht  
bačha''), daß dā ezet aischt witt, ond dā Ma' ndch dem  
tarirst, was er bačha ka! So a' Beck, Mäble, ja, so  
a' Beck!

Wia se so dōsigt ond se bnennt, wia macha, daß se  
da' Becka kriag, gōht d Tür auf ond der Jakob kommt  
rei'. Der woiz gar et, was saga, wia-n-er d Margret so  
vor dene Sačha siza sieht. Er sperrt Maul ond Nas auf  
ond sait endlich:

„Margret, kriagscht du' dronta nemme gauag z effa?“

„Freile jō,“ geit dia zur Antwort, „aber des dō ischt  
vom Becka!“

„Sell glaub-e,“ sait der Jakob, „vom Mezger et.“

„Aber s ischt guat, Jakob!“

„Des hau-n-e der am aischta Tag gsait, daß der Beck  
ebbes könn, er ischt jō bereits em Preußischa brenna gwä.“

D Margret woiz et reacht, wia se em Jakob ihr  
Säčle saga soll, schäzwol se hdt se doch a' bisle gschämt;  
zletschta brengt se aber doch raus, was se woll. Der  
Jakob lachet:

„So, Margret, jezet witt. Wann d aber z spät  
kommesch?“

„Ha sell wär! Der Beck muß froh sei', wann er  
me kriagt.“

„Natürlich, d schö' Margret!“ räzt se der Jakob.“

---

<sup>1)</sup> bei Verstand.

„Schwäz et!“ sait dia, „Jezet gôhscht glei na zua-n-em  
ond fâischt —“

„Was, Margret?“

„S könn vielleicht doch sei', daß e en nemm.“

„S könn vielleicht doch sei', daß e en nemm,“ macht  
se der Jakob nôch ond sezt derzua:

„Wann er aber schau' a'-n-andere hôt.“

„Was wurd er?“

„Dô guck,“ rüast ezet der Jakob ond streckt da' Kopf  
zua dem Feaschterle naus. Mer hôt naus gseha uf dia  
henter Strôß, mo nôch Herrabühl gföhrt hôt, ond dô  
hôt grad der Gottfried sei' Ei'kehx ausgfolgt.<sup>1)</sup> D Sonn  
ischt grad am Nontergeha gwâ, aber des hôt der Jakob  
doch noh gseha, wia der Gottfried hehlenga' der Marie ihr  
Hand verdrückt. Wanns amôl so weit ischt, nô Guat  
Nacht Jakob, Guat Nacht Margret! Der Jakob schwäzt ner,  
er denkt wieder sei' Sächle, gôht naus zur Kammertür  
ond brommt: „Ond aischt wöllet mer noh seha!“

D Margret aber guckt em Becka nôch, wia-n-er des  
Wegle zua sei'm Haus nonter gôht, so lang s en gseha hôt.  
Nô dreht se se rom, ond gibt dene Becka ond Berezeta ond  
älem en Schuck, daß se auf da' Boda nafallet. Nô aber  
buckt se se, hebt ihren Schurz auf, tuats nei' ond gôht  
langsam d Stiag na ond henta zuam Haus naus. Dô  
lockt se ihre Henna ond nô broklet se en langsam s ei'  
Stückle oms ander na', ond wia se fertich ischt, sait se —  
gar et stolz, noi' fascht traurisch —

„So a' Beck!“

---

<sup>1)</sup> begleitet.

5.

„Du, Jakob, komm au dô rei?“ sait am andera Tag der Gottfried zuam, wia-n-er an sei'm Haus vorbei gôht.

Ond wia nô der Jakob zua-n-em an da' Bachofa na' kommt, sait er:

„I moi', oine von dene zwoi Mädla könntescht du au nemma.“

„Jô, Gottfried.“

„Aber bei dir ischts vom Denka bis zuam Heira weit.“

„Jô, Gottfried.“

„Wa isch, witts ei probira?“

„Eijô.“

„Soll e der helfa?“

„Noi.“

„Môrom et?“

„Ôdrom!“

„Jakob, was hôscht?“

„Nex!“

„Wa witt?“

„W Weib!“

„Wen?“

„Dine von dene zwoi!“

„De wel?“

„Grad dia, mî mer gfällt!“

„Wann dia mir aber au gfällt?“ sait der Gottfried.

„Ha, nô gfällt se der halt!“ geit der Jakob zruck.

Jetzt sait der Gottfried nex maih, ond der Jakob hâlt's Maul. Der Beck schiabt vin Laib Brod om da'

and're en da' Dsa nei', ond der Jakob gudt-em zua ond spielt derbei mit-ema' Gertle. Nôf-ma' Weile sait er:

„Bach der oine, Beck!“

Der Gottfried sait drauf:

„Narr, we' mer dir koin'e bacht, nô kriagscht deiner Lebtag koin'e!“

„So, Beck, sell wöllet mer seha. Jezet nemm-e grad oine von selle zwoi.“

„De wel?“

„Grad dia, mô mer gfällt.“

„Wann dia mir aber au gfällt?“

„Nô gfällt se der hält, Gottfried!“ sait der Jakob, ond jezet send se wieder am alta Fleck gwä. Mit der Sprich hôt koiner reacht raus rücka wölla. Endlich sait der Beck:

„Du, d Lisbeth ischt doch a' reacht's Mädle.“

Ond der Jakob antwortet:

„D Marie au.“

„Gfällt dia dir?“ frôgt der Beck.

„Gfällt se dir?“ geit em der Jakob zruck.

„Jô!“ sait der Beck grad raus.

„Mir au!“ sait der Jakob.

„Ach was, Jakob, dia ischt viel z jong für di!“

„Z jong? So a' jonge möcht-e grad!“

„Aber dâ kriagscht se et?“

„Môrom et?“

„Weil se de jenger ischt!“

„So, Gottfried,“ sait der Jakob, „weil se de jenger ischt! Narr, nô kriagscht du se au et!“

Dô hôt no' der Jakob ganz Reacht ghet — aber des isch jô grad gwä!

„Also kriagt se koiner vo' ons“ — sait der Beck schlau.

„Ha, nô nemmscht halt d Margret; dia will ezet,“  
sait der Jakob grad so schlau.

„D Margret?“

„Ja, d Margret!“

„So, dia soll-e ezet nemma,“ rüast der Beck schlau  
halba bair, „gelt, jezet, mûd d Alsfälder Mädla merket, daß  
i sia et nahtich hau', ezet laufet se. Jez will-e grad koinen  
von-en! Jez nemm-e grad d Marie —“ fährt em raus.

„So also, d Marie ischt de oi!“ sait der Jakob, „Ond  
i soll d Lisbeth nemme, daß de Alt weg ischt, ond du de  
Klei' kriagscht. O Beck, du bist em Preußischa drenn  
gwâ, aber so schnell schießet d Preußa et! D Maris ischt  
grad dia, mû-n-i möcht!“

„So, ond deswega soll i dei' Margret nemma, daß du  
bei der Marie na' ka'scht. Dâ bist et so domm, Jakob,  
wia dâ aussiehst!“

Des verzürnt jetzt da' Jakob ond er sait:

„I gieb grad so gscheit aus wia du! Ond ezet wöllet  
mer aischt seha, wen d Marie nemmt, en Baura oder so  
en Becka!“

„A' Beck ischt grad so viel wia —“

„Wia wer?“

„Wia so a tappicher Bauer!“ sait der Beck, schmeißt  
s Bachofatürle zua ond gôht naus.

Ond der Jakob stöhnt au auf ond sucht mit seiner  
Gerta, haut mit-er uf en Mehlsack em Dehnr nei', daß s  
Mehl raus fliegt, ond gôht zuam Hauß naus.

D Freu'dschast hôt a' Loch ghet, des hôt der Jakob  
gmerkt, drôm hôt er se au gar ner maih om da' Becka

Kemmret ond ischt seine eigene Weg ganga. Dia aber hent en ge' Herrabühl gführ. D Woch über ischt er wia verwandlet gwä: er hót gschwätz, was er hót verlöenna, wia wenn er sich üaba' wött uf da' Sonntich, ond de schö'sche Reda hót er sich ausdächt ond bloß oi' Angst ghet, daß s em nemme ei'sallet, wann d Marie mit ihre schwarza Auga en a'guck. Aber au uf des hót er se ei'güabt, ond iner hót den Jakob gar nemme kennt, wia-n-er alle Mäbla so leck a'gucket, se em Feld dussa stellt ond mit-en schwätz, wia wanns alte Weiber wäret. So hót se der Jakob uf da' nächscha Sonntich vorbereitet, an dem er hót bei der Marie sei' Glück versuacha wollä.

Aber der Beck ischt au et faul gwä. Er hót se na'-gsezt ond a' Briaſle an d Marie gschrieba. ond wia-n-er dronter sezt: „dein bis in den Tod getreuer Gottfried“ ond en schöna Schnirkel om a' Herz rom he'mölt, nô hót er so aneglachet. Ond sei'm Beckabuaba, mö-n-er nüber gschickt hót, hót er au mit ema' ganz knüza Gſicht nôch-gseha ond nô brommlet:

„s ischt a' guater Kerl der Jakob, sell ischt wôhr,  
ond a' Weib braucht er au, ond wenn i et wär, er tät  
seiner Lebtag koi's kriaga.“

## 6.

Wia der Jakob am nächsta Sonntich en seim schö'scha Häss Herrabühl zua gđht, nô stđht der Gottfried am Weg. Der nicht, wia wann ner gwä wär, ond sait:

„Mô na', Jakob?“

„Dô na!“ geit em der zur Antwort.

„Wei'sch<sup>1)</sup> Glück!“ sait der Gottfried.

„Groß Dank!“ sait der Jakob und geht weiter. Aber gewondret holt er sie doch, daß der Beck noch lachhaft ist; denn holt sich doch ein Bild von dem, was er zu Herrabühl will! Und da' ganzer Weg über holt er über des Sennirt und noch denkt, und sieht auf einen Mönch, eh er sichs versehen kann, er holt Herrabühl gestanden. So sieht ihm fast so schnell gangen, er holt sie so gar viel ausdenken wollte und holt es jetzt vor allem noch denkt nicht.

Wia-n-er eins Haus vor' der Marie neu' kommt, und merkt er gleich, daß dort ebbes Extras sieht. So holt sie noch Kaffee geschmeckt und noch Zigaretten gekauft, und daß Schmalzbäckchen Küachla um da' Weg sendt, holt er am Brozla vom Schmalz ghairt. Des macht ein schau' verwirrt, noch perplexer aber wird er, wia-n-er ein d' Stub neu' kommt, und der alte Bauer sagt:

„So sieht reicht, daß du kommst, mer wartet schau' a' paar Schoppalängen.“

Eb der Jakob noch holt ebbes sagt können, sieht er hinterem Tisch gesessen und holt eine Schüssel voll Kaffee vor sich, und mer holt von sei'm Säckle und von dene Mädla dort ihrem schwätz, halt grad wie mer schwätz, was mer Heiratstag machen will. No', auf des sieht ja der Jakob au aus grün, bloß siehts-em merkwürdig fürkomm, daß dia alle schau' wissen, zua was er kommt. So domm sieht doch der Beck gewiß et gewiß, daß er-en dia Sach gesagt holt, und er doch selber holt die Marie wollte!

---

<sup>1)</sup> Wünsche.

„Aber mō ischt denn s Mädle?“ sait jezet der Vater,  
„se soll au hergau!“

D Muater gôht naus ond rüaft ond rei' kommt d Lisbeth. Se hôt d Auga z aischta et reacht aufgmacht  
ond uf da' Boda-n abeguckt ond am Schurz romzopft.

„Also des wär der Jakob —“ sait der Vater.

Der Jakob gudet d Lisbeth gschwend a' ond wieder  
weg ond schwätz ner. Er will ebbes saga, aber er brengt  
ner raus weder: „Halt Bauer —“. Dô gudet er der  
Lisbeth en d Auga, ond dia hent en so guat ond treu  
a'guckt, ond s ischt so-n-a' Schei' vo' Glück dren gwä, daß  
er hôt emmer fort nei' guck'a müasha, ond sein Saz et  
fertig brôcht hôt. s ischt em gwä, als dürf er ond könn  
er dem Mädle et saga: „Du, i hau' dei' Schweschter  
wölla!“ ond wann er sonst äls dentk hôt: „Jakob, dia  
gsiel der!“ nô sait em jezet sei' Herz: „Jakob, dia ghairt  
der!“ Ond drom sait er zuam Baura:

„So, Bauer, des wär d Lisbeth!“ stöhnt auf, und geit  
er d Ha'd. Ond nô sitzt se neba-n na' uf da' Ba'k ond  
schwätz wieder mit-em, wia vor acht Täg en Altstadt,  
grad vo' dene Sacha', mō mer au verstdôht, et von dem  
domma' Stuagert ond dem noh demmerra Preußischa. Ond  
wia-n-er so neba-n-er sitzt, nô ischts em so wol ond  
hoi'lich gwä, wia schau' lang nemme, ond er hôt gmerkt,  
daß er jezet de reacht hâb.

Zwoi andere ischts aber au wol gwä. D Marie  
hôt gschwend ihrn Kopf zuer Ramertür rei' gestreckt —  
an derâ hôt se gloßnet<sup>1)</sup> — ond wia se dia hoiba neba-n

---

<sup>1)</sup> gehorcht.

anander so vergnüagt siça sieht, witscht<sup>1)</sup> se tapfer wieder naus ond en d henter Kamer nom. Ond wer ischt dô gwä? Der Gottfried. Der ischt nemlich henter em Jakob drei' komma ond au ge' Herrabühl ganga.

„Was isch, Marie?“ rüast er ond reibt se d Hä'd, „dô henta isch elend kalt. Könnet mer et bald füre?“

„Er nemmt se!“ sait d Marie ond lachet.

„Des hent mer gscheit gmacht, Marie,“ sait der Beck ganz stolz. „Daß aber no deine Alte ner merket!“

„Wa werdet se merka? I hau'-en dein Brief gä, ond s en verklärst, daß der Jakob d Lisbeth wollt, aber so o=gschickt sei em Schreiba ond em Schwäza, daß er dir d Sach auftra häb.“

„So,“ sait der Gottfried, „jezet ischt de Aelter weg, jez mülaßet se mer di gä.“

„Freile mülaßet se!“ sait Marie.

„I moi', mer ganget glei nüber,“ sait der Gottfried, „mer muß s Brot nei'schiaba, so lang der Osa' warm ischt!“

„Nô komm!“ sait d Marie.

Aber dia hent gußt en der Stub drüba, wia d Tür usgöhrt, ond der Beck und Marie rei' kommet ond der Beck sei' Säckle sait! Er hót to', wia wenn des ganz so sei' mülaßt, daß er jezet, mò de Alt weg sei, de Klei' kriag.

Zô Mule bloß d Gerschta! Der Vater sait, er häb' ner derwider, wann der Beck amöd sei Marie nemum, aber jezet könns et sei'. Et' Mädle brauch er, ond weil jezet d Lisbeth da' Jakob nemm, nô müaß d Marie noh a'

---

<sup>1)</sup> schlüpft.

paar Jöhr derhoimda bleiba. Wär der Beck vor-eni Jakob komma, sezt er derzua, wenns em au ka' sei' et Ernsticht gwä ischt, ond hätt d Marie wölla, nô wärs ebbes anderseiters gwä, aber jetzt — noi' s könn et sei', mer brauch des gozich Mädle.

Ond älles Bittla ond älles Bettla hilft ner: der Bauer bleibt auf sei'm Kopf, ond so en Bauerakopf reift koi' Beck ond koi' Marie ra, ond wenn se noh so arg ient.

Aber i brauch glei a' Weib!" sait der Gottfried.

"Nô muascht der halt nôch-râ andra seha," sait der Bauer, „d Marie bleibt noh ledich!"

Jetzt legt sich der Jakob, guatmüätig wia-n-er ischt, drei' ond bittet au; s hót aber ner gholfa. s ischt em zwör komma, daß der Gottfried ond d Marie dia ganz Sach so a'zettlet häbet, aber er hót no om so feschter d Ha'd vo' der Lisbeth druct ond em Stilla Gott dankt, daß er d Marie et kriagt hót.

Der Beck hót wieder azieha' müaha, ond se send mit anander hoi'; s ischt schau' senkede<sup>1)</sup> Nacht grä, ond lang send se neba-n anander hergloffa, ond koiner hót a' Wort gschwätz. Endlich sait der Beck em Jakob wia dia Sach ganga sei, ond jomret, daß er d Marie et kriagt häb.

„Guck, Beck," sait dô der Jakob, „des ischt Sendaschuld!"

„Ach was Sendaschuld! I hau' ner bats to'!"

„Wärle mir et," sait der Jakob, „mir hödscht guats to'; d Lisbeth ischt a' Brächtsmädle, extra wia für mi gmacht. Aber O'reach't ischt doch gwä vo' dir gega mi, ond vo' der Marie gega Vater ond Muater. Ond woischt:

---

<sup>1)</sup> sinkende.

a' Mädle, mö ihre Eltera a'lüagt ond betrüagt, dia betrüagt amöl au ihren Ma'! Hau'-n-e et Reacht; Gottfried?"

„Könntesch't Reacht hau', Jakob!" sait der Gottfried ond schwäzt da' ganza Weg ner maih.

## 7.

„Wa isch, Jakob? Du lachest jô mit-em ganza Gsicht!" sait am andera Morga d Margret zuam Jakob.

„Siehscht mer ner a', Margret?" frôgt der Jakob ganz vergnüagt.

„Wa werd-e?"

„Gang a'möl nauf ond frôg da' Vater, was am nächſtta Sonntich ischt."

„Was wurd sei?"

„Heiretstag ischt!" rüast der Jakob. „I mach Heiretstag!"

„Du?" sait d Margret.

„Hôt amöl, mit wem?"

D Margret bsennt se; se denkt an d Marie ond nô denkt se weiter, daß wenn der Jakob dia kriag, der Beck se et kriag, ond nô —

„Margret, was denkscht?" sait der Jakob. „Ber-rôtheschts et?"

„Nemmscht d Marie?" frôgt d Margret schnell.

Der Jakob lachet ond sait:

„Noi', Margret, aber d Lisbeth. I sag der, descht a' Mädle!"

„So d Lisbeth," sait d Margret so ane; se hôt, i muâß saga', maih dra' denkt, daß der Beck ezet wahrscheinlich d Marie kriag, ond ischt drob nôdenksam woara,

weder döra', daß der Jakob jezt endlich a' Weib häb,  
wia-n-ers brauch ond wia-n-ers verden.<sup>1)</sup> S ischt er au  
uf der Zong glä, daß se gfrögt hätt: „Nemmt nô der  
Gottfried d Marie?“ aber Noi! hdt se denkt, koi'  
Wort maih!

Ond jezet ischts beis Weberbaura' grad omkaihrt gwä,  
weder vorher: Der Jakob hdt gschwätz ond glachet ond  
d Margret ischt emmer still gwä ond hdt ihr Sächle so  
ane gschaffet. Der Jakob hdt gmerkt, wias bei der Margret  
unter ihrem Bruschtuach aussieht, ond daß der Beck ers  
halt a'to' hdt, ond er hätt mit oi'm Wort se tröschta'  
köenna, wann-er-er gsait hätt, daß der Gottfried d Marie  
et kriag, aber er hdt denkt, s ghair er, mōrom ischt se  
so hauffärtich gega da' Becka' gwä! Mit dem ischt er  
wieder ganz guat Freu'd gwä seit sellem Hoi'weg, aber  
vom Heira hdt der Beck au koi' Wörtle maih gschwätz  
ond ischt still seiner Arbet ndchgang.

So ischt s Jakobs Hauhzich komma, ond der Jakob  
hdt gstrahlet vor Glück. Am Sonntich vorher hent se vo'  
Herrabühl d Brautstück bröcht, d Nähere<sup>2)</sup>), mōs gnäht  
hdt, ond d Kamerädenna' vo' der Lisbeth: em Jakob s  
Brauthemed, sei' ond nobel mit so Zacka' vorna' ronter,  
der Margret a' grauß seides Tüachle, ond au em Vater  
ond der Muater, was en ghairt hdt. D Marie ischt na-  
türlich au mitkomma, ond s aischtmöls hent dia hoibe Mädlia  
anander näher gseha. D Marie, mō et gwist hdt, wias  
der Margret oms Herz gwä ischt, hdt mit derā glei Ram-

<sup>1)</sup> verbiene.

<sup>2)</sup> Näherin.

rädles to' wölla, aber d Margret hót et so reacht mitto'; se hót se zwenga' müasha', no reacht freundlich gega se z sei', wia se doch ghairt hót.

Wias dōmōls noh Mode gwä ischt, hót der Bräuticham mit der Nähere ond de Kamerädenna' vo' seiner Braut ens Wirtshaus müasha ond fürs zahlra. D Margret hót gsait, se gang et mit, se häb noh em Haus z to', ond bleibt dō. Se guckt der Marie so durchs Fenster noch, wia se s Dorf nonter gōht ond sait:

„Sauber ischt se, sell ischt wöhr, ond wenn se halt em Becka gfällt“ — se tuat en Seufzer, ond wenn se a' Stadtmädchen gwä wär, von dene mer ölls en dene Geschichta em Blättle liest, hätt se schäzwol derzua gesetzt: „so will ich das schwere Opfer bringen und auf ihn verzichten, ob mir auch das Herz bricht. Mögen sie glücklich sein! Der Himmel segne sie!“ Weil se aber a' Mädel gwä ischt, et wia se en de Büächer standet, noi', wia se em Dorf romlaufet, sait se:

„Noi', i gonn<sup>1)</sup> se em et. Ond se hót knüze Auga, ond falsch ischt se au!“

Ond se stampft mit-em Fuß us da' Boda. Nō aber gōht se naus ond brommlet: „Aber dir, Margret, gschiehts reacht, mōrom bicht so hauhfärtich gwä.“

Wia se durch da Dehrn na'lauft, sieht se uf oi'mol da' Becka reikomma. Wa will der? Nez vo' dir, Margret, brauchschet et so bloich z werda. Er frögt noch-em Jakob. Em Wirtshaus sei-n-er mit dene Mädla. Mit wele? Ha dene vo' Herrabühl.

„Ischt Marie au derbei?“ frögt er.

---

<sup>1)</sup> gönne.

„Freile ischt se derbei, mach no, daß dā nonterkommst!“  
rüast d Margret.

Em Becka höts aber et so pressirt. Er schwäzt noh  
von ällerhand mit der Margret.

„Mōrom bischt du et mit ens Kreuz naganga?“ frögt  
er se nō.

„Weil e hau' et möga!“ sait d Margret.

„Mōrom höschet et möga, Margret?“ frögt der Beck.

„Muascht du alles gwisht hau', Gottfried?“ frögt d  
Margret derwider.

„Nelles et, aber des! Sag mers, Margret.“

„Dir? Grad dir am wenichsta!“

„Mōrom et?“ frögt er ond gucket der Margret en  
ihre schwarze Auga, dia gfonllet hent, „mōrom grad  
mir et?“

Ond er langt nōch ihrer Ha'd, d Margret aber zieht  
se zurück ond sait:

„Laß mei' Ha'd en Ruah, Beck! Druck deiner Marie  
de ihr!“

Dia Stemm, mit der se des gsait hōt, hōt em Becka  
verdīha, wias mit der Margret stöhnt. Er guckt se scharfs  
a', dia wird raut, dreht se halba rom ond sait:

„Was stöhst na', wia na'bacha? Gang, lauf, spreng  
zua dei'm Schaz ens Kreuz na, ond laß andere Mädla  
en Ruah!“

Ond stolz lauft se von-em weg. Der Beck rüast:

„Halt, Margret, i will der ebbes saga.“

Se bleibt stan' ond gucket en frögweis a'. Der Beck  
macht a' paar Schritt zua-n-er na' ond sait:

„Margret, i gang et ens Kreuz na!“

„Môrom et?“

„Wega der Marie. Guck i kriag se am End doch et —“

D Margret schauft auf. Was er kriagt se et? Ka' sei, daß er nô — Aber noi', der Guatgnug will e au et sei', denkt se, ond eb se se reacht bsonna hôt, kommis raus:

„So, d Marie kriagscht et, ond ezet kommt der Herr zua mir, ond ezet soll i der Guatgnug sei! Gang furt, Beck!“

Der aber bleibt stau' ond sait:

„Margret, du bisch gwä, mö mer zaischta gsalla hôt, am beschta vo' alle Mädla em Fleck. Aber wer isch gwä, der s graischt Maul ghet hôt über den Becka? Du! Ond wer hôt zuam Jakob gsait: so en Becka nemm se et? Du! Wer hôt gmoi't, se sei z guat für mi? Du, neamerz anderschters weder du! Ond i sag, a' Beck ischt so guat, wia-n-a' Bauer, ond was reachte Mädla send, dia frôget et zaischta nôch-em Handwerk, et nôch-em Geld, noi' nôch dem, was a' rechter Ma' ischt. Ond des be'-n-e, Margret.“

Ond er guckt se so treuherzich a', aber d Margret sait ner ond zopft an ihre Schurzbändel rom. Ond der Beck macht furt:

„Isch et wôhr, Margret? Hau'-n-e et Reacht? Bsenn de drüber, Margret! Bhuet Gott!“

Ond er gôht naus ond läßt d Margret stau', ond dia gucket emmer noh uf den Fleck na', mö der Gottfried gstanda-n ischt, ond nô dreht se se rom ond sait:

Er hôt Reacht, bigott er hôt Reacht. Ond i be' domm gwä, demmer weder mei' demmschte Ga's.“

„Sö, Margret, grad so bischt gwä! I hättet et grad so  
gsait, aber weil dā s selber saischt, mußt-e der Reacht  
gä: Denner weder dei' demmschte Ga's!

8.

Auf der Hauhzich vom Jakob isch hauch herganga ond  
älles hōt gsait: Der Jakob hāb noh de nöbelicht kriagt,  
mer könn lang suacha, bis mer a' Mädla fend, dia besser  
zua-n-em passa tät als d Lisbeth. Der Gottfried hōt emmer  
bloß nōch der Margret gucket. Ond wia dia au ausgseha  
hōt en dene schnaibluaschtweiße<sup>1)</sup> weite Hemedärmel, dem  
raute Nieder ond dem dicke kurza Stock mit dem broita  
sammeta Saum drom rom! S ischt wärle wōhr, se ischt  
de schö'scht vo' alle gwä, ond d Marie hōt et neba se  
na' dürsa. Dia hōt, wia ölls wirklich dia domme Mädla  
uf de Dörfer, se gschämt, en dene Kloider z komma, mō  
mer vo' Alters ghet hōt, ond hōt se a'to' ghet, wia d Mägd  
en der Stadt. Wenn d Mädla wißtet, wia schö' se send  
en ihre alte echte Baurakloider, koi' goziche tät dia domme  
Stadtakloider a'zihaha. Aber dō send se grad wia dia für-  
nehme Mädla en der Stadt: d Mode muß halt mit-  
gmacht sei', ond wenn dia Fegla oms rom hanget wia dene  
Affa' uf-em Märkt ihre Jäfla'.

Mit der ewicha Treu, mō d Marie selbichsmöl z  
Herrabühl em Gottfried versprocha hōt, isch et arg weit  
hergwä. Bsonders oiner vo' dene Herrabühler Burscht  
muß bereits an der Treu a' bisle gnottlet<sup>2)</sup> ghet hau'.

<sup>1)</sup> schneeblütenweiße.

<sup>2)</sup> gerüttelt.

Ond wias später woara-n-ischt ond mer tanzt hót, ond der Gottfried amdl a' bisle naus göht zuam Verschnaufa', sieht er sei' Ewichtreue bei dem Burscht stav', ond der hót sein Arm om se glegt ghet, ond — hosc̄ gseha, Gottfried? — grad hent se sich en Kuß gä. Der Gottfried hót a' reachte Froid an dem Kuß ghet. Er hót alls noh a' bisle dra' rom gmacht, ob er net halt doch uf d Marie warta soll, weil ers amdl versprocha hót; wia-n-er aber sieht, daß sich dō Diner ebbes bei derā holt, was er noh et von-er verlangt ond kriagt hót, nô denkt er: dia Denge läscht laufa, der Jakob hót selbichsmol uf-em Hoi'weg am End doch Reacht ghet! Ond er göht wieder nei', ond grad hent d Musikanta wieder a'ghebt z blösa, ond er göht uf d Margret zua ond nemmt se en Arm ond sliagt mit-er em Tanzsal rom. Ond nô führt er se wieder en de a'der Stuba nüber ond göht nemme von-er weg da' ganza Obed. Ond nô hót er se au noh hoi' gsüört. s ischt a' kalte Nacht gwä, ond der We'b hót-en en ihre hois̄a Gsichter blösa ond gschwätz hent se nex. Bloß an der Haustür, wia der Gottfried omdreht, nemmt en d Margret gschwend an der Achsel, zieht en her ond sait em ganz leis ens Auhr:

„Gottfried, i be' sendlich domm gwä.“

Ond nô witscht se ens Haus nei'. Ond der Gottfried — wia doch dia Becka gspässich send! — stöhlt en derā kalta Nacht na', bis droba em Rämerle vo' der Margret Liacht ischt; nô nemmt er a' Stoile ond schmeifts nauf. Ond wia d Margret s Liacht en der Ha'd da' Kopf rausstreckt, rüaft er nauf:

„Margret, aber jezt bischt de gschleitscht, ond de schobscht em Fleck a ohnedem. Ond heu't en vier Wočha bischt mei' Weib!“

Ond d Margret nicket ond lachet ond macht's Feaschter zua ond schlüpft ens Bett eine. Ond se lachet emmer noh so vergnüagt aue, ond nô sait se schau' halba-n em Schlöf:

„So a' Beck!“

---

